

欽定元史

卷一百二十四之二百三十二

卷之二

元史卷一百二十四

明翰林學士亞中大夫知制誥兼修國史宋 濂等修

列傳第十一

塔本

塔本伊吾廬人人以其好揚人善稱之曰揚公父宋五設託陀託陀者其國主所賜號猶華言國老也塔本初從太祖討諸部屢阨艱危復從圖燕征遼西下平灤白靨諸城軍士有妄殺人者塔本戒之曰國之本民也殺人得地何益於國且殺無罪以堅敵心非上意太祖聞而喜之賜金虎符俾鎮撫白靨諸郡號行省都元帥管內得承制除縣吏死囚得專決久之徙治興平興平兵火傷殘民慘無生意塔本召父老問所苦爲除之薄賦斂役有時民大悅乃相與告教無違約束歸者四集塔本始至戶止七百不一二年乃至萬戶出己馬以寬驛人貸廉吏銀其子錢不能償者焚其券農不克耕亦與之牛比歲告稔民用以饒庚寅詔益中山平定平原隸行省甲午盜李仙趙小哥等作亂塔本止誅首惡宥其誣誤癸卯立春日宴羣僚歸而疾作遂卒是夕星隕隱隱有聲遣命葬以紙衣瓦棺贈推誠定遠佐運功臣太師開府儀同三司上柱國追封營國公謚忠武子阿里乞失鐵木兒

阿里乞失鐵木兒嗣父職爲興平等處行省都元帥其爲治一遵先政興學養士輕刑薄徭雖同僚不敢私役一民從大軍伐高麗有功歲丙辰卒贈宣忠輔義功臣榮祿大夫平章政事柱國追封營國公諡武襄子阿台

阿台嘗襲父職適罷行省爲平灤路總管府丁巳憲宗命阿台爲平灤路達魯花赤始至請蠲銀鹽酒等稅課八之一細民不征世祖卽位來朝賜金虎符諸侯王道出平灤供給費銀七千五百兩戶部不卽償阿台自陳上前盡取償以歸置甲乙籍籍民丁力民甚便之至元十年進階懷遠大將軍歲饑發粟賑民或持不可阿台曰朝廷不允願以家粟償官於是全活甚衆僚屬始至阿台必遺之鹽米羊畜什器曰非有他也欲其不剝民耳姻族窮者月有常給民有喪不能葬者與之棺槨布帛資糧灤爲孤竹故國乃廟祀伯夷叔齊以厲風俗二十一年進昭武大將軍二十四年乃顏叛獻馬五百疋佐軍太祖大喜已而得乃顏銀鬻亟以賜之二十五年入朝以疾卒賜宣力功臣資德大夫中書右丞上護軍追封永平郡公諡忠亮子迭里威失

迭里威失少好讀書成宗時入宿衛授河西廉訪司僉事拜監察御史遷淮西廉訪副使召爲中書左司員外郎改樞密院參議陞判官延祐四年授翰林侍講學士出爲河間路總管屬歲饑出俸金及官庫所

積賑之活數十萬人河間當水陸要衝四方供億皆取給焉迭里威失立法調遣民便之復建會增置便習弓馬尉一人益選兵之數於是盜賊屏息陵州羣凶爲官民害悉收繫死獄中後陞遼陽行省參知政事子鎖咬兒哈的迷失

鎖咬兒哈的迷失年十二宿衛英宗潛邸掌服御諸物英宗卽位拜監察御史至治元年春詔起大利于京西壽安山鎖咬兒哈的迷失與御史觀音保成珪李謙亨上章極諫以爲東作方始而興大役以耗財病民非所以祈福也且歲在辛酉不宜興築初司徒劉夔妄獻浙右民田冒出內帑鈔六百萬貫丞相帖木迭兒分取其半監察御史發其姦由是疾忌臺諫至是帖木迭兒之子瑣南爲治書侍御史密奏曰彼宿衛舊臣聞事有不便弗卽入白今訕上以揚己之直大不敬帝乃殺鎖咬兒哈的迷失與觀音保成珪謙亨諒之竄諸遐裔泰定初贈鎖咬兒哈的迷失資德大夫御史中丞上護軍追封永平郡公諡貞愍賜其妻子鈔五百貫良田千畝仍詔樹碑神道

哈刺亦哈赤北魯

哈刺亦哈赤北魯畏兀人也性聰敏習事國王月仙帖木兒亦都護聞其名自唆里迷國徵爲斷事官月仙帖木兒卒子八兒出阿兒忒亦都護年幼西遼主鞠兒可汗遣使據其國且召哈刺亦哈赤北魯至則

以爲諸子師八兒出阿兒忒聞太祖明聖乃殺西遼使更遣阿憐帖木兒都督等四人使西遼阿憐帖木兒都督者哈刺亦哈赤北魯也也具語以其故於是與其子月朶失野訥馳歸太祖一見大悅卽令諸皇

子受學焉仍令月朶失野訥以質子入宿衛從帝西征至別失八里東獨山見城空無人帝問此何城也

對曰獨山城往歲大饑民皆流移之它所然此地當北來要衝宜耕種以爲備臣昔在峻里迷國時有戶

六十願移居此帝曰善遣月朶失野訥佩金符往取之父子皆留居焉後六年太祖西征還見田野墾闢

民物繁庶大悅問哈刺亦哈赤北魯則已死矣迺賜月朶失野訥都督印章兼獨山城達魯花赤月朶失

野訥卒子乞赤宋忽兒在太宗時襲爵賜號塔刺罕子四人曰塔塔兒曰忽塔曰火兒思蠻曰月兒思蠻

世祖命火兒思蠻從雪雪的斤鎮雲南月兒思蠻事憲宗襲父爵兼領僧人後因軍帥札忽兒台據別失

八里盡室徙居平涼與其子阿的迷失帖木兒入覲世祖詔入宿衛爲必闕赤命從安西王忙哥刺出鎮

六盤安西王薨其子阿難荅嗣成宗卽位遣使入朝因奏阿的迷失帖木兒父子本先帝舊臣來事先王

服勤二十餘年矣若終老王府非所以盡其才也願以露陞下用之成宗可其奏授阿的迷失帖木兒汝

州達魯花赤積官祕書太監卒子阿憐帖木兒

可憐古大邑魯國齊多爾載慈其履月派翁木寺開... 卷之二... 寺以... 寺

左右陳說祖宗以來及古先哲王嘉言善行翻譯諸經紀錄故實總治諸王駙馬番國朝會之事天厯初北迎明宗入正大統一見歡甚顧左右曰此朕師也天厯三年進光祿大夫知經筵事子曰沙刺班曰禿忽魯曰六十曰咱納祿沙刺班累拜中書平章政事大司徒宣政院使

塔塔統阿

塔塔統阿畏兀人也性聰慧善言論深通本國文字乃嚙天馱可汗尊之爲傅掌其金印及錢穀太祖西征乃嚙國亡塔塔統阿懷印逃去俄就擒帝詰之曰大馱人民疆土悉歸於我矣汝負印何之對曰臣職也將以死守欲求故主授之耳安敢有他帝曰忠孝人也問是印何用對曰出納錢穀委任人材一切事皆用之以爲信驗耳帝善之命居左右是後凡有制旨始用印章仍命掌之帝曰汝深知本國文字乎塔塔統阿悉以所蘊對稱旨遂命教太子諸王以畏兀字書國言太宗卽位命司內府玉璽金帛命其妻吾和利氏爲皇子哈刺察兒乳母時加賜予塔塔統阿召諸子諭之曰上以汝母鞠育太子賜予甚厚汝等豈宜有之當先供太子用有餘則可分受帝聞之顧侍臣曰塔塔統阿以朕所賜先供太子其廉介可知矣由是數加禮遇以疾卒至大元年贈中奉大夫追封鴈門郡公子四人長玉笏迷失次力渾迷失次速羅海次篤蘇玉笏迷失少有勇略渾都海叛於三盤時玉笏迷失守護皇孫脫脫營壘率其衆與渾都海

戰敗之迫至只必勒適遇阿藍苔兒與之合兵復戰玉芴迷失死之力渾迷失有膂力嘗獵于野與衆相失遇盜三人欲奪其衣力渾迷失搏之盡仆遂縛以還帝召見選力士與之角無與敵者帝壯之賜金令備宿衛速羅海襲父職仍命司內府玉璽金帛篤綿舊事皇子哈刺察兒世祖卽位從其母入見欲官之以無功辭命統宿衛奉使遼東卒封鴈門郡公子阿必實哈陝西行省平章政事

岳璘帖穆爾

岳璘帖穆爾回鶻人畏兀國相敵欲谷之裔也其兄叱理伽普華年十六襲國相蒼刺罕時西契丹方強威制畏兀命太師僧少監來臨其國驕恣用權奢淫自奉畏兀王患之謀於叱理伽普華曰計將安出對曰能殺少監挈吾衆歸大蒙古國彼且震駭矣遂率衆圍少監斬之以功加號叱理傑忽底進授明別吉妻號赫思迭林左右有疾其功者譖于其王曰少監珥珠先王寶也叱理伽普華匿之盍急索勿失其王怒索寶甚急叱理伽普華度無以自明乃亡附太祖賜以金虎符獅紐銀印螭金椅一衣金直孫校尉四人仍食三十三郡繼又賜銀五萬兩以弟岳璘帖穆爾爲質叱理伽普華以疾卒岳璘帖穆爾從太祖征討多戰功皇弟幹眞求師傅帝命岳璘帖穆爾往訓導諸王子以孝弟敦睦仁厚不殺爲先帝聞而嘉之從平河南徙鄆縣民萬餘戶入樂安俄授河南等處軍民都達魯花赤佩金虎符并賜宮女四人所得上

方賞賚悉輦歸故郡以散親舊且盛陳漢官儀衛以激厲之國人羨慕道出河西所過榛莽或時乏水爲之鑿井置堠居民使客相慶稱便太祖卽位以中原多盜選充大斷事官從幹眞出鎮順天等路布德化寬征徭盜迺羣州郡清寧尋復監河南等處軍民年六十七卒于保定後贈宣力保德功臣日東宣慰
楨諡莊簡子合刺普華見忠義傳

李楨

李楨字幹臣其先西夏國族子也金末楨以經童中選既長入爲質子以文學得近侍太宗嘉之賜名玉出于必賙赤從皇子闊出伐金帝命之曰凡軍中事須訪楨以行及下河南諸郡闊出遣楨偕吉登哥往唐鄧二州數民實兵餘歲凶流散十八九楨至賑恤饑寒歸者如市十年從大將察罕下淮甸楨以功佩金符授軍前行中書省左右司郎中楨奏尋訪天下儒士令所在優贍之十三年師圍壽春天雨不止楨冒於察罕曰頓師城下暑雨疫作將有不利且城久拒命破必屠之則生靈何辜請退舍數里身往招之從之楨遂單騎入敵壘曉以利害明日與其將二人率衆來降以功賜銀五千兩楨表言襄陽乃吳蜀之要衝宋之喉襟得之則可爲他日取宋之基本定宗嘉其言庚戌賜虎符授襄陽軍馬萬戶丙辰憲宗命楨率師巡哨襄樊戊午帝親征召楨同議事秋九月卒于合州年五十九

速哥

速哥蒙古怯烈氏世傳李唐外族父懷都事太祖嘗從飲班朮居河水速哥爲人外若質直而內實沈勇有謀雅爲太宗所知命使金因俾覘其虛實語之曰卽不還子孫無憂不富貴也速哥頓首曰臣死職耳奉陛下威命以行可無慮也帝悅賜所常御馬至河金人閉之舟中七日始登南岸又三旬乃達汴及見金主曰天子念爾土地日狹民力日疲故遣我致命爾能共修歲幣通好不絕則轉禍爲福矣謁者令下拜速哥曰我大國使爲爾屈乎金主壯之取金卮飲之酒曰歸語汝主必欲加兵敢率精銳以相周旋哉幣非所聞也速哥飲畢卽懷金卮以出速哥雖佯爲不智而默識其地理阨塞城郭人民之疆弱旣復命備以虛實告且以所懷金卮獻帝喜曰我得金於汝手中矣復以賜之始下令徵兵南伐兵至河北岸方舟欲渡金軍陣於河南帝令儀衛導速哥居中行親率偏師乘陣西策馬沙河會睿宗軍亦由襄鄧至兩軍夾攻之及金亡詔賜金護駕士五人曰此以旌汝爲使之不辱也昔使過崞州崞人盜殺其良馬至是兼以醇民賜之歲乙未帝從容謂速哥曰我將官汝西域中原惟汝擇之速哥再拜曰幸甚臣意中原便帝曰西山之境八達以北汝其主之汝於城中構大樓居其上使人皆仰望汝俯而諭之願不倖乎乃以爲山西大遼魯花赤受命方出有回回大人訟事不實將抵罪遇諸途急止監者曰姑緩其刑當日奏

復見帝曰此大人者名著西域徒以小罪盡誅之恐非所以懷遠人也願以賜臣臣得意辱之使自悔悟遷善爲他日用殺之無益也帝意解召大人謂之曰生汝者速哥也其竭力事之至雲中皆釋之後有至大官者其寬大愛人多類此卒年六十二贈推忠翊運同德功臣太師開府儀同三司上柱國追封宣寧王諡忠襄子大人曰長罕曰玉呂忽都撒曰合里都曰忽蘭曰忽都兒不花曰不花長罕玉呂忽都撒合里都皆從兀魯赤太子出征以戰功顯忽蘭之母以后戚故得襲職鉏疆植弱均役平刑闔郡賴以安輯乙未之抄戶籍也前賜惇人已入官籍更賜山西戶三百西方多盜郡縣捕不得則法當計所失物直償郡縣苦之有甄軍判者率羣盜往來阜平曲陽間殺人渾源界而奪之財縣以失捕當償忽蘭曰此大盜也縣豈能制哉卽遣千人捕甄殺之勦捕其餘黨其害乃除忽蘭性純篤然酷好佛嘗施千金修龍宮寺建金輪大會供僧萬人卒年四十二贈太保金紫光祿大夫上柱國追封雲國公諡康忠子天德于思穎悟過人世祖聞其賢令襲父爵養母完顏氏以孝聞自中山北來適有邊釁天德于思督造兵甲撫循其民無有寧息形容盡瘁帝聞而嘉之賜馴豹名鷹使得縱獵禁地當時眷顧最號優渥卒年三十九贈太傅儀同三司上柱國追封雲國公諡顯毅子孫世多顯貴云

忙哥撒兒

忙哥撒兒察哈札刺兒氏曾祖赤老溫愷赤祖搠阿父那海並事烈祖及太祖嗣位年尙幼所部多叛亡
搠阿獨不去皇弟朮只哈撒兒陰隨之去亦謝不從搠阿精騎射帝甚愛之號爲默爾傑華言善射之尤
者也帝嘗與賊遇將戰有二飛鷲至帝命搠阿射之請曰射其雄乎抑雌者乎帝曰雄者搠阿一發墜其
雄賊望見驚曰是善射若此飛鳥且不能逃況人乎不戰而去從征乃蠻敵率銳兵鼓而進搠阿按兵屹
不動敵止俄復鼓而進搠阿亦不動敵卒疑畏不敢前世祖征篋里吉兵潰搠阿與其弟左右力戰以衛
帝會兀良罕哲里馬來援敵乃引退那海事太祖備歷艱險未嘗形於言帝嘉其忠且念其世勲詔封懷
洛陽百七十五戶忙哥撒兒事睿宗恭謹過其父嘗從攻鳳翔首立奇功定宗陞爲斷事官剛明能舉職
憲宗在藩邸深知其人從征斡羅思阿刺欽察諸部常身先諸將及以所俘寶玉頒諸將則退然一無所
取憲宗由是益重之使治藩邸之分民間出游獵則長其軍士動如紀律雖太后及諸嬪御小有過失知
無不言以故邸中人咸敬憚之迺以爲斷事官之長其位在三公之上猶漢之大將軍也既拜命出帳殿
外欽囊坐熊席其僚列坐左右者四十人忙哥撒兒問曰主上以我長此官諸公其爲我言當以何道守
官衆皆默然又問之有夏人和幹居下坐進曰夫札魯忽赤之道猶宰之刲羊也解肩者不使傷其脊在
持平而已忙哥撒兒聞之卽起入帳內衆不知所爲皆咎和幹失言既入乃爲帝言和幹之言善帝召和

幹命之步曰是可用之才也和幹由是知名定宗崩宗王八都罕大會宗親議立憲宗長兀八刺曰失烈門皇孫也宜立且先帝嘗言其可以君天下諸大臣皆莫敢言忙哥撒兒獨曰汝言誠是然先皇后立定宗時汝何不言耶八都罕固亦遵先帝遺言也有異議者吾請斬之衆乃不敢異八都罕乃奉憲宗立之憲宗之幼也太宗甚重之一日行幸天大風入帳殿命憲宗坐膝下撫其首曰是可以君天下他日用特按約皇孫失烈門尙幼曰以特按約則慎將安所養太宗以爲有仁心又曰是可以君天下其後太宗崩大皇后攝政竟立定宗故至是一人各舉以爲言云憲宗旣立察哈台之子及按赤台等謀作亂劄車轅藏兵其中以入轅折兵見克薛傑見之上變忙哥撒兒卽發兵迎之按赤台不虞事遽覺倉卒不能戰遂悉就擒憲宗親簡其有罪者付之鞠治忙哥撒兒悉誅之帝以其奉法不阿委任益專有當刑者輒以法刑之乃入奏帝無不報可帝或臥未起忙哥撒兒入奏事至帳前扣箭房帝問何言卽可其奏以所御大帳行扇賜之其見親寵如此癸丑冬病酒而卒帝以忙哥撒兒當國時多所誅戮及是咸騰謗言迺詔諭其子略曰汝高祖赤老温愷赤暨汝祖搠阿事我成吉思皇帝皆著勞績惟朕皇祖實褒嘉之汝父忙哥撒兒自其幼時事我太宗朝夕忠勤罔有過咎從我皇考經營四方迨事皇妣及朕兄弟亦罔有過咎暨朕討定斡羅思阿速穉兒別里欽察之域濟大川造方舟伐山通道攻城野戰功多於諸將俘馘寶玉

大賚諸將則退然無欲得之心惟朕言是用修我邦憲治我蒐田輯我國家罔不咸乂惟厥忠雖其私親與朕嬪御小有過咎一是無有比私故朕皇妣迨朕昆弟無不嘉賴朝之老臣宿衛蓄舊無不嚴畏錄其勤勞命爲札魯忽赤治朕皇考受民布昭大公以辨獄慎民爰作朕股肱耳目衆無譁言朕聽以安自時厥後察哈台阿哈之孫太宗之裔定宗闢出之子及其民人越有他志賴天之靈時則有克薛傑者以告于朕汝父肅將大旅以遏亂略按赤台等謀是用潰悉就拘執朕取有罪者使辨治之汝父體朕之公其刑其宥克比于法又使治也速不里獄亦克比于法惟爾脫歡脫兒赤自朕用汝父用法不阿兄弟親姻戚麗于憲今衆罔不怨曰爾亦有死耶若有慊志人則雖死朕將寵之如生肆朕訓汝爾克明時朕言如是而有福不如是而有禍惟天惟君能禍福人惟天惟君是敬是畏立身正直制行貞潔是汝之福反是勿思也能用朕言則不墜汝父之道人亦不能間汝矣不用朕言則人將仇汝伺汝間汝怨汝父者必曰汝亦與我夷矣汝則殆哉汝於朕言弗慎釋之汝則有咎克慎釋之人將敬汝畏汝無間伺汝無慢汝怨汝者矣又而母而婦有讒欺巧佞構亂之言慎勿聽之則盡善矣至順四年追封忙哥撒兒爲亮國公子四人長脫歡次脫兒赤次也先帖木爾次帖木兒不花脫歡爲萬戶無子脫兒赤子明禮帖木兒累官翰林學士承旨從征乃顏有功明禮帖木兒子咬住咬住子也先延徽寺卿也先帖木兒子曰哈剌合孫帖

大兒不花子曰塔朮納曰哈里哈孫曰伯蒼沙

伯蒼沙幼入宿衛爲寶兒赤歷事成宗武宗由光祿少卿擢同知宣徽院事陞銀青光祿大夫宣徽院使
遙授左丞相武宗崩護梓宮葬于北守山陵三年乃還仁宗卽位眷顧益厚延祐二年拜中書右丞相時
承平日久朝廷清明君臣端拱廟堂之上而百姓又安於下一時號稱極治仁宗崩帖木迭兒執政改授
集賢大學士仍開府儀同三司錄軍國重事未幾以大宗正札魯忽赤出鎮北方亦以清靜爲治邊民接
堵泰定間還朝加太保及倒刺沙構兵上都兵潰伯蒼沙奉璽紱來上文宗嘉之拜太傅仍爲札魯忽赤
至順三年薨伯蒼沙爲人清慎寬厚號稱長者其歿也貧無以爲斂人皆歎其廉詔贈推忠佐理正德秉
義功臣開府儀同三司太師上柱國追封威平王三子長馬馬的斤次潑皮次八郎八郎期而孤其母乞
咬契氏二十而寡守節不他適八郎後爲大宗正府札魯忽赤能繼其先有成立者母氏之教也

孟速思

孟速思畏兀人世居別失八里古北庭都護之地幼有奇質年十五盡通本國書太祖聞之召至闕下一
見大悅曰此兒目中有火宅日可大用以授睿宗使視顯懿莊聖皇后分邑歲賦復事世祖於潛藩日見
親用憲宗崩孟速思言于世祖曰神器不可久曠太祖嫡孫唯王最長且賢宜卽皇帝位諸王塔察兒也

孫哥合丹等咸是其言世祖卽位眷顧益重南征時與近臣不只兒爲斷事官及諸王阿里不哥叛相拒漠北不只兒有二心孟速思知之奏徙之於中都親監護以往帝以爲忠數命收召豪俊凡所引薦皆極其選詔與安童並拜丞相固辭帝語安童及丞相伯顏御史大夫月魯那演等曰賢哉孟速思求之彼族誠爲罕也孟速思爲人剛嚴謹信蚤居帷幄謀議世莫得聞至元四年卒年六十有二帝尤哀悼特諡敏惠武宗朝贈推忠同德佐理功臣太師開府儀同三司上柱國追封武都王改諡智敏子九人多至大官

明翰林學士亞中大夫知制誥兼修國史宋濂等修

列傳第十二

賽典赤瞻思丁

子納速刺丁 忽辛附

賽典赤瞻思丁一名烏馬兒回回人別庵伯爾之裔其國言賽典赤猶華言貴族也太祖西征瞻思丁率

千騎以文豹白鶻迎降命入宿衛從征伐以賽典赤呼之而不名太宗卽位授豐靖雲內三州都達魯花

赤改太原平陽二路達魯花赤入爲燕京斷事官憲宗卽位命同搭刺渾行六部事遷燕京路總管多惠

政擢採訪使帝伐蜀賽典赤主饋餉供億未嘗闕乏世祖卽位立十路宣撫司擢燕京宣撫使中統二年

拜中書平章政事皆降制獎諭至元元年置陝西五路西蜀四川行中書省出爲平章政事蒞官三年增

戶九千五百六十五軍一萬二千二百五十五鈔六千二百二十五錠屯田糧九萬七千二十一石撥節

和買鈔三百三十一錠中書以聞詔賞銀五千兩仍命陝西五路四川行院大小官屬並聽節制七年分

鎮四川宋將皆萬壽擁疆兵守嘉定與賽典赤軍對壘一以誠意待之不爲侵掠萬壽心服未幾賽典赤

召還萬壽請置酒爲好左右皆難之賽典赤竟往不疑酒至左右復言未可飲賽典赤笑曰若等何見之

小即督將軍能毒我其能盡毒我朝之人乎萬壽曠服八年有旨大軍見圍襄陽各道宜進兵以牽制之於是賽典赤偕鄭鼎率兵水陸並進至嘉定獲宋將二人順流縱筏斷其浮橋獲戰艦二十八艘尋命行省事于興元專給糧餉十一年帝謂賽典赤曰雲南朕嘗親臨比因委任失宜使遠人不安欲選謹厚者撫治之無如卿者賽典赤拜受命退朝卽訪求知雲南地理者畫其山川城郭驛舍軍屯夷險遠近爲圖以進帝大悅遂拜平章政事行省雲南賜鈔五十萬緡金寶無算時宗王脫忽魯方鎮雲南感於左右之言以賽典赤至必奪其權具甲兵以爲備賽典赤聞之乃遣其子納速刺丁先至王所請曰天子以雲南守者非人致諸國背叛故命臣來安集之且戒以至境卽加撫循今未敢專願王遣一人來共議王聞遽罵其下曰吾幾爲汝輩所誤明日遣親臣撒滿位哈乃等至賽典赤問以何禮見對曰吾等與納速刺丁偕來視猶兄弟也請用子禮見皆以名馬爲贄拜跪甚恭觀者大駭乃設宴陳所賜金寶飲器酒罷盡以與之二人大喜過望明日來謝語之曰二君雖爲宗王親臣未有名爵不可以議國事欲各授君行省斷事官以未見王未敢擅授令一人還先稟王王大悅由是政令一聽賽典赤所爲十二年奏雲南諸夷未附者尙多今擬宣慰司兼行元帥府事並聽行省節制又奏哈刺章雲南壤地均也而州縣皆以萬戶千戶主之宜改置令長並從之十三年以所改雲南郡縣上聞雲南俗無禮儀男女往往自相配偶親死則

火之不爲喪祭無秬稷黍麻子弟不知讀書賽典赤教之拜跪之節婚姻行媒死者爲之棺槨奠祭教民播種爲陂池以備水旱創建孔子廟明倫堂購經史授學田由是文風稍興雲南民以貝代錢是時初行鈔法民不便之賽典赤爲聞于朝許仍其俗又患山路險遠盜賊出沒爲行者病相地置鎮每鎮設土酋吏一人百夫長一人往來者或值劫掠則罪及之有土吏數輩怨賽典赤不已用至京師誣其專僭數事帝顧侍臣曰賽典赤愛國愛民朕洞知之此輩何敢誣告卽命械送賽典赤處治之既至脫其械且諭之曰若曹不知上以便宜命我故訴我專僭我今不汝罪且命汝以官能竭忠自贖乎皆叩頭拜謝曰某有死罪平章旣生之而又官之誓以死報交趾叛服不常湖廣省發兵屢征不利賽典赤遣人諭以逆順禍福且約爲兄弟交趾王大高親至雲南賽典赤郊迎待以賓禮遂乞永爲藩臣蘿槃甸叛往征之有憂色從者問故賽典赤曰吾非憂出征也憂汝曹冒鋒鏑不幸以無辜而死又憂汝曹劫虜平民使不聊生及民叛則又從而征之耳師次蘿槃城三日不降諸將請攻之賽典赤不可遣使以理論之蘿槃主曰謹奉命越三日又不降諸將奮勇請進兵賽典赤又不可俄而將卒有乘城進攻者賽典赤大怒遽鳴金止之召萬戶叱責之曰天子命我安撫雲南未嘗命以殺戮也無主將命而擅攻於軍法當誅命左右縛之諸將叩首請俟城下之日從事蘿槃主聞之曰平章寬仁如此吾拒命不祥乃舉國出降將卒亦釋不誅由

是西南諸夷翕然款附夷酋每來見例有所獻納賽典赤悉分賜從官或以給貧民秋毫無所私爲酒食勞酋長製衣冠襪履易其卉服草履酋皆感悅賽典赤居雲南六年至元十六年卒年六十九百姓巷哭葬鄯闕北門交趾王遣使者十二人齊經爲文致祭其辭有生我育我慈父慈母之語使者號泣震野帝思賽典赤之功詔雲南省臣盡守賽典赤成規不得輒改大德元年贈守仁佐運安遠濟美功臣太師開府儀同三司上柱國咸陽王諡忠惠子五人長納速刺丁次哈散廣東道宣慰使都元帥次忽辛亥苦速丁兀默里建昌路總管次馬速忽雲南諸路行中書省平章政事

納速刺丁累官中奉大夫雲南路宣慰使都元帥至元十六年遷帥大理以軍抵金齒蒲驪曲蠟緬國招安夷寨三百籍戶十二萬二百定租賦置郵傳立衛兵歸以馴象十二入貢有旨賞金五十兩衣二襲麾下士賞銀有差會其父瞻思丁歿雲南省臣於諸夷失撫綏之方世祖憂之近臣以納速丁爲言十七年授資德大夫雲南行中書省左丞尋陞右丞建言三事其一謂雲南省規措所造金薄貿易病民宜罷其一謂雲南有省有宣慰司又有都元帥府近宣慰司已奏罷而元帥府尙存臣謂行省旣兼領軍民則元帥府亦在所當罷其一謂雲南官員子弟入質臣謂違官子弟當遣餘宜罷奏可二十一年進榮祿大夫平章政事奏減合刺章冗官歲省俸金九百餘兩屯田課程專人掌之歲得五千兩三十二年以合刺章

蒙古軍千人從皇太子脫歡征交趾論功賞銀二千兩二十八年進拜陝西行省平章政事二十九年以疾卒贈推誠佐理協德功臣太師開府儀同三司上柱國中書左丞相封延安王子十二人伯顏中書平章政事烏馬兒江瀚行省平章政事劄法兒荆湖宣慰使忽先雲南行省平章政事沙的雲南行省左丞阿容太常禮儀院使伯顏察兒中書平章政事佩金虎符贈太師開府儀同三司上柱國中書左丞相奉元王諡忠憲

忽辛至元初以世臣子備宿衛世祖善其應對至元十四年授兵部郎中明年出爲河南等路宣慰司同知河南多疆盜往往羣聚山林劫殺行路官軍收捕失利忽辛以招安自任遣土豪持檄諭之未幾賊二人來自歸忽辛賜之冠巾且諭之曰汝昔爲賊今旣自歸卽良民矣俾侍左右出入房闥無間悉放還令遍諭其黨數日後招集其爲首者十輩來身長各七尺餘羅拜庭下顧視異常衆悉驚怖失措忽辛命吏籍其姓名爲民俾隨侍左右夜則令臥戶外時呼而飲食之各得其歡心羣盜聞之相繼款附二十一年授雲南諸路轉運使明年轉陝西道又明年授燕南河北道宣慰司同知尋除南京總管三十年授兩湖鹽運使大德九年進江東道宣慰使改陝西行臺御史中丞再改雲南行省右丞旣至條具諸不便事言于宗王請更張之王不可忽辛與左丞劉正馳還京師有旨令宗王協力施行由是一切病民之政悉革

而新之豪民規避徭役往往投充王府宿衛有司不勝供給忽辛按朝廷元額所無者悉籍爲民去其宿衛三分之一馬龍州曾謀叛陰與外賊通持所受宣勅納賊以示信事覺宗王爲左右所蔽將釋不問忽辛與劉正反覆研鞫姦狀盡得竟斬之軍糧支給地理遠近不同吏員緣爲姦忽辛籍軍戶姓名及倉廩處所爲更番支給吏姦始除先是贖思丁爲雲南平章時建孔子廟爲學校撥田五頃以供祭祀教養贖思丁卒田爲大德寺所有忽辛按廟學舊籍奪歸之乃復下諸郡邑遍立廟學選文學之士爲之教官文風大興王府畜馬繁多悉縱之郊敗民禾稼而牧人又在民家宿食室無寧居忽辛度地置草場構屋數十間使爲牧所民得以安廣南會沙奴素強悍宋時嘗賜以金印雲南諸部悉平獨此梗化忽辛遣使誘致待之以禮留數月不遣曾請還忽辛曰汝欲還可納印來曾不得已齎印以納忽辛置酒宴勞諷令偕印入覲帝大悅大德五年緬國主貢固不臣忽辛遣人諭之曰我老賽典赤平章子也惟先訓是遵凡官府於汝國所不便事當一切爲汝更之緬國主聞之遂與使者偕來獻白象一且曰此象古來所未有今聖德所致敢效方物既入帝賜緬國主以世子之號烏蠻等租賦歲發軍徵索乃集忽辛以利害榜諭諸蠻不遺一卒而租賦咸足俄有爲飛語及符讖以惑宗王者忽辛引劉正密爲奏馳報朝廷遣使臨問凡違旨之徒悉誅之忽辛偕使者還覲大德八年出爲四川行省左丞改江湘行省至大元年拜榮祿大夫

江西行省平章政事明年以母老謝職歸養又明年正月卒天歷元年贈守德宣惠敏政功臣上柱國雍國公諡忠簡子二人伯杭中慶路達魯花赤曲列湖南道宣慰使

布魯海牙

布魯海牙畏吾人也祖牙兒八海牙父吉臺海牙俱以功爲其國世臣布魯海牙幼孤依舅氏家就學未幾卽善其國書尤精騎射年十八隨其主內附充宿衛太祖西征布魯海牙扈從不避勞苦帝嘉其勤賜以羊馬氈帳又以居里可汗女石抹氏配之太祖崩諸王來會選使燕京總理財幣使還莊聖太后聞其廉謹以名求之於太宗凡中宮軍民匠戶之在燕京中山者悉命統之又賜以中山店舍園田民戶二十授眞定路達魯花赤辛卯拜燕南諸路廉訪使佩金虎符賜民戶十未幾授斷事官使職如故時斷事官得專生殺多倚勢作威而布魯海牙小心謹密慎於用刑有民誤毆人死吏論以重法其子號泣請代死布魯海牙戒吏使擒于市懼則殺之旣而不懼乃曰誤毆人死情有可宥子而能孝義無可誅遂併釋之使出銀以資葬埋且呼死者家諭之其人悅從是時法制未定奴有罪者主得專殺布魯海牙知其非法而不能救嘗出金贖死者數十人征討之際隸軍籍者憚於行役往往募人代之又軍中多逃歸者朝廷下制募代者杖百逃歸者死命布魯海牙與斷事官十只兒按順天等路及至州縣得募人代者萬一千

戶逃者十一人然募者聞命將下已潛遣家人易代募者布魯海牙聞之歎曰募者已懼罪往易逃者因單弱思歸情皆可矜吾可不伸理耶遂奏其狀皆得輕減有丁多產富而家人不往及未至役所而卽逃者則曰此而不殺何以戒後有竊妓逃者吏論當死布魯海牙曰敗亂綱常罪固宜死此妓也豈可例論命杖之其執法平允類如此世祖卽位擇信臣宣撫十道命布魯海牙使眞定眞定富民出錢貸人者不踰時倍取其息布魯海牙正其罪使償者息如本而止後定爲令中統鈔法行以金銀爲本本至乃降新鈔時莊聖太后已命取眞定金銀由是眞定無本鈔不可得布魯海牙遺幕僚邢澤往謂平章王文統曰昔奉太后旨金銀悉送至上京眞定南北要衝之地居民商賈甚多今舊鈔旣罷新鈔不降何以爲政且以金銀爲本豈若以民爲本又太后之取金帛以賞推戴之功也其爲本不亦大乎文統不能奪立降鈔五千錠民賴以便俄遷順德等路宣慰使佩金虎符來朝帝命坐慰勞之賜以海東青鶻至元二年秋卒年六十九布魯海牙性孝友造大宅於燕京自畏吾國迎母來居事之得祿不入私室幼時叔父阿里普海牙欺之盡有其產及貴顯築室宅旁迎阿里普海牙居之弟益特思海牙以宿憾爲言常慰諭之終無間言帝嘗賜以太府綾絹五千匹綵絮相等弟求四之一納其國賦盡與之無吝色初布魯海牙拜廉使命下之日子希憲適生喜曰吾聞古以官爲姓天其以廉爲吾宗之姓乎故子孫皆姓廉氏後或奏廉氏

仕進者多宜稍汰去世祖曰布魯海牙功多子孫亦朕所知非汝當預大德初贈儀同三司大司徒追封魏國公諡孝懿子希閔希憲希恕希尹希顏希愿希魯希貢希中希括孫五十三人登顯仕者代有之希憲自有傳

高智耀 子睿附

高智耀河西人世仕夏國曾祖逸大都督府尹祖良惠右丞相智耀登本國進士第夏亡隱賀蘭山太宗訪求河西故家子孫之賢者衆以智耀對召見將用之遽辭歸皇子闊端鎮西涼儒者皆隸役智耀謁藩邸言儒者給復已久一旦與厮養同役非便請除之皇子從其言欲奏官之不就憲宗卽位智耀入見言儒者所學堯舜禹湯文武之道自古有國家者用之則治不用則否養成其材將以資其用也宜蠲免徭役以教育之帝問儒家何如巫醫對曰儒以綱常治天下豈方技所得比帝曰善前此未有以是告朕者詔復海內儒士徭役無有所與世祖在潛邸已聞其賢及卽位召見又力言儒術有補治道反覆辯論辭累千百帝異其言鑄印授之命凡免役儒戶皆從之給公文爲左驗時淮蜀士遭俘虜者皆沒爲奴智耀奏言以儒爲驅古無有也陛下方以古道爲治宜除之以風厲天下帝然之卽拜翰林學士命循行郡縣區別之得數千人貴臣或言其詭濫帝詰之對曰士譬則金也金色有淺深謂之非金不可才藝有淺深

謂之非士亦不可帝悅更寵賚之智耀又言國初庶政草創綱紀未張宜倣前代置御史臺以糾肅官常至元五年立御史臺用其議也擢西夏中興等路提刑按察使會西北藩王遣使入朝謂本朝舊俗與漢法異今留漢地建都邑城郭儀文制度遵用漢法其故何如帝求報聘之使以析其問智耀入見請行帝問所答畫一敷對稱旨卽日遣就道至上京病卒帝爲之震悼後贈崇文贊治功臣金紫光祿大夫司徒柱國追封寧國公諡文忠子睿

睿資稟直亮智耀之北使也携之以行及卒帝問其子安在近臣以睿見時年十六授符寶郎出入禁闥恭謹詳雅久之授唐兀衛指揮副使歷翰林待制禮部侍郎除嘉興路總管境內有宿盜白晝掠民財捕者積十數輩莫敢近睿下令不旬日生擒之一郡以寧擢江東道提刑按察使部內草竊陸梁聲言圍宣城郡將怯懦城門不開睿召責之曰寇勢方熾官先示弱民何所憑卽命密治兵衛而洞開城門聽民出入貿易自便旣而寇以有備不敢進遂討平之除同僉行樞密院事遷浙西道肅政廉訪使鹽官州民有連結黨與持郡邑短長其目曰十老吏莫敢問睿悉按以法闔境快之拜江南行臺侍御史進御史中丞除惟東道肅政廉訪使盜竊真州庫鈔三萬緡有司大索追逮平民數百人吏因爲奸利睿躬自詳讞而得其情卽縱遣之未幾果得眞盜復拜南臺御史中丞務持大體有儒者之風焉延祐元年卒年六十有

大累贈推忠佐理功臣太傅開府儀同三司上柱國追封靈國公諡貞簡子納麟官至太尉江南諸道行御史臺大夫

鐵哥

鐵哥姓伽乃氏迦葉彌兒人迦葉彌兒者西域築乾國也父幹脫赤與叔父那摩俱學浮屠氏幹脫赤兄弟相謂曰世道擾攘吾國將亡東北有天子氣盍往歸之乃偕入見太宗禮遇之定宗師事那摩以幹脫赤佩金符奉使省民煥憲宗尊那摩爲國師授玉印總天下釋教幹脫赤亦貴用事領迦葉彌兒萬戶奏曰迦葉彌兒西陲小國尙未臣服請往諭之詔偕近侍以往其國主不從怒而殺之帝爲發兵誅國主元貞元年封代國公諡忠遂幹脫赤之歿鐵哥甫四歲性穎悟不爲嬉戲從那摩入見帝問誰氏子對曰兄幹脫赤子也帝方食雞輟以賜鐵哥鐵哥捧而不食帝問之對曰將以遺母帝奇之加賜一雞世祖卽位幸香山永安寺見書畏吾字於壁問誰所書僧對曰國師兄子鐵哥書也帝召見愛其容儀秀麗語音清亮命隸丞相學羅備宿衛先是世祖事憲宗甚親愛後以讒稍疎國師導世祖宜加敬慎遂友愛如初至是帝將用鐵哥曰吾以酬國師也於是鐵哥年十七詔擇貴家女妻之辭曰臣母漢人每欲求漢人女爲婦臣不敢傷母心乃爲娶冉氏女久之命掌饗膳湯藥日益親密至元十六年鐵哥奏曰武臣佩符古制

也今長民者亦佩符請省之以彰武職從之十七年進正議大夫尙膳監帝嘗諭之曰朕聞父飲藥子先嘗之君飲藥臣先嘗之今卿典朕膳凡飲食湯藥宜先嘗之又曰朕以宿衛士隸卿其可任使者疏其才能朕將用之詔賜第於大明宮之左留守段圭言逼木局不便帝曰俾居近禁闈以便召使木局稍隘又何害焉高州人言州境多野獸害稼願捕以充貢鐵哥曰捕獸充貢徒濟其私耳且擾民不可聽從之十九年遷同知宣徽院事領尙膳監有食尙食餘餅者帝察知之怒鐵哥曰失餅之罪在臣食者何與焉內府食用圓米鐵哥奏曰計粳米一石僅得圓米四斗請自今非御用止給常米帝皆善之進中奉大夫司農寺達魯花赤從獵百查兒之地獵人亦不刺金射兔誤中名駝駝死帝怒命誅之鐵哥曰殺人償畜刑太重帝驚曰誤耶史官必書亟釋之庾人有盜鑿秬米者罪當死鐵哥諫曰臣鞠庾人其母病盜秬欲食母耳請貸之牧人有盜割駝峯者將誅之鐵哥曰生割駝峯誠忍人也然殺之恐乖陛下仁恕心詔皆免死二十二年進正奉大夫奏司農寺宜陞爲大司農司秩二品使天下知朝廷重農之意制可進資善大夫司農時司農供膳有司多擾民鐵哥奏曰屯田則備諸物立供膳司甚便從之桓州飢民鬻子女以爲食鐵哥奏以官帑贖之二十四年從征乃顏至撒兒都之地叛王塔不台率兵奄至鐵哥奏曰昔李廣一將耳尙能以疑退敵况陛下萬乘之威乎今彼衆我寡不得地利當設疑以退之於是帝張曲蓋據胡牀

鐵哥從容進酒塔不台按兵覘伺懼有伏遂引去帝以金章宗玉帶賜之二十九年進榮祿大夫中書平章政事以病足聽輿轎入殿門帝嘗憶北征事不能悉記鐵哥條舉甚詳帝悅以金束帶賜之初詔遣宋新附民種蒲萄於野馬川晁火兒不刺之地既獻其實鐵哥以北方多寒奏歲賜衣服從之成宗卽位以鐵哥先朝舊臣賜銀一千兩鈔十萬貫他日又賜以瑪瑙椀謂鐵哥曰此器先皇所用朕今賜卿以卿久侍先皇故也大德元年加光祿大夫三年乞解機務從之仍授平章政事議中書省事時諸王朝見未有知典故者帝曰惟鐵哥知之俾專其事凡廩餼金帛之數皆遵世祖制詔自今懷諸王之禮悉命鐵哥掌之七年復拜中書平章政事平灤大水鐵哥奏曰散財民聚古之道也今平灤水災不加賑恤民不聊生矣從之十年丁母憂詔奪情起復遼王脫脫入朝從者執兵入大明宮鐵哥劾止之王懼謝從幸晉山饑民相望鐵哥輒發廩賑之既乃陳疏自劾帝稱善不已武宗卽位賜金一百兩加金紫光祿大夫遙授中書右丞相有訴寧遠王闊闊出有逆謀者命誅之鐵哥知其誣廷辨之由是得釋徙高麗二年領度支院尋賜江州稻田五千畝仁宗皇慶元年授開府儀同三司太傅錄軍國重事乃進奏世祖子惟寧遠王在宜賜還從之二年奉命詣萬安寺祀世祖感疾歸皇太后令內臣問疾鐵哥附奏曰臣死無日願太后輔陛下布惟新之政社稷之福也是年薨賜賻禮加厚勅有司治喪事贈太師開府儀同三司上柱國追封

秦國公諡忠穆加贈推誠守正佐理翊戴功臣封延安王改諡忠獻子六人忽察惟東宣慰使平安奴太平路達魯花赤也識哥同知山東宣慰司事虎里台同知真定總管府事亦可麻同知都護府事重喜隆禧院副使孫八人伯顏中書平章政事餘多居宿衛

元史卷一百二十六

明翰林學士亞中大夫知制誥兼修國史宋濂等修

列傳第十三

安童

安童木華黎四世孫霸突魯長子也中統初世祖追錄元勳召入長宿衛年方十三位在百寮上母弘吉刺氏昭睿皇后之姊通籍禁中世祖一日見之問及安童對曰安童雖幼公輔器也世祖曰何以知之對曰每退朝必與老成人語未嘗狎一年少是以知之世祖悅四年執阿里不哥黨千餘將置之法安童侍側帝語之曰朕欲置此屬於死地何如對曰人各爲其主陛下甫定大難遽以私憾殺人將何以懷服未附帝驚曰卿年少何從得老成語此言正與朕意合由是深重之至元二年秋八月拜光祿大夫中書右丞相增食邑至四千戶辭曰今三方雖定江南未附臣以年少謬膺重任恐四方有輕朝廷心帝動容有間曰朕思之熟矣無以踰卿冬十月召許衡至傳旨令衡入省議事衡以疾辭安童卽親候其館與語良久旣還念之不釋者累日三年帝諭衡曰安童尙幼未更事善輔導之汝有嘉謨當先告之以達朕朕將擇焉衡對曰安童聰敏且有執守告以古人所言悉能領解臣不敢不盡心但慮中有人間之則難行姚

用勢力納人其中則難行臣入省之日淺所見如此四年三月安童奏內外官須用老成人宜令儒臣外
樞等入省議事帝曰此輩雖閒猶當優養其令入省議事五年廷臣密議立尙書省以阿合馬領之乃先
奏以安童宜位三公事下諸儒議商挺倡言曰安童國之柱石若爲三公是崇以虛名而實奪之權也甚
不可衆曰然事遂罷七年四月奏曰臣近言尙書省樞密院各令奏事並如常制其大政令從臣等議定
然後上聞既得旨矣今尙書一切徑奏似違前旨帝曰豈阿合馬以朕頗信用之故爾專權耶不與卿議
非是勅如前旨八年陝西省臣也速迭兒建言比因饑饉盜賊滋橫若不顯戮一二無以示懲勅中書詳
議安童奏曰強竊均死恐非所宜罪至死者宜仍舊待報從之十年春三月奏以玉冊玉寶上皇后弘吉
刺氏以玉冊金寶立燕王爲皇太子兼中書令判樞密院事冬十月帝諭安童及伯顏等曰近史天澤姚
樞纂定新格朕已親覽皆可行之典汝等亦當一一留心參考豈無一二可增減者各令紀錄促議行之
時天下待報死囚五十人安童奏其中十三人因鬪毆殺人餘無可疑於是詔以所奏十三人死從軍
十一年奏阿合馬盡國害民數事又奏各部與大都路官多非才乞加黜汰從之十二年七月詔以行中
書省樞密院事從太子北平王出鎮極邊在邊十年二十一年三月從王歸待罪闕下帝卽召見慰勞之
頓首謝曰臣奉使無狀有累聖德遂留寢殿語至四鼓乃出冬十一月和禮哲孫罷復拜中書右丞相加

金紫光祿大夫二十二年右丞盧世榮敗詔與諸儒條其所用人及所爲事悉罷之二十三年夏中書奏擬漕司諸官姓名帝曰如平章右丞等朕當親擇餘皆卿等職也安童奏曰比聞聖意欲倚近侍爲耳目臣猥承任使若所行非法從其舉奏罪之輕重惟陛下裁處今近臣乃伺隙援引非類曰某居某官某居某職以所署奏目付中書施行臣謂銓選之法自有定制其尤無事例者臣常廢格不行慮其黨有短臣者幸陛下詳察帝曰卿言是也今後若此者勿行其妄奏者卽入言之奏徵前吏部尙書李昶不起復奏賜田十頃二十四年宗王乃顏叛世祖親討平之宗室誑誤者命安童按問多所平反嘗退朝自左掖門出諸免罪者爭迎謝或執轡扶上馬安童毅然不顧有乘間言於帝曰諸王雖有罪皆帝室近親也丞相雖尊人臣也何悖慢如此帝良久曰汝等小人豈知安童所爲特辱之使改過耳是歲復立尙書省安童切諫曰臣力不能回天乞不用桑哥別相賢者猶或不至虐民誤國不聽二十五年見天下大穰盡歸尙書屢求退不許二十八年罷相仍領宿衛事三十年春正月以疾薨于京師樂安里第年四十九雨水冰三日世祖震悼曰人言丞相病朕固弗信果喪予良弼詔大臣監護喪事大德七年成宗制贈推忠同德勳運功臣太師開府儀同三司上柱國東平忠憲王碑曰開國元勳命世大臣之碑子兀都帶

兀都帶器度宏達世祖時襲長宿衛父安童歿凡賻賻之物一無所受以素車樸馬歸葬只蘭禿先塋事

母以孝聞成宗卽位拜銀青光祿大夫大司徒領太常寺事爲請謚尙郊攝太尉奉冊上尊號廟號皇后尊號常侍掖庭贊畫大政帝及中宮咸以家人禮待之大德六年正月薨年三十一至大二年制贈輸誠保德翊運功臣太師開府儀同三司上柱國東平王謚忠簡子拜住自有傳

廉希憲

廉希憲字善甫布魯海牙子也幼魁偉舉止異凡兒九歲家奴四人盜五馬逃去旣獲時於法當死父怒將付有司希憲泣諫止之俱得免死又嘗侍母居中山有二奴醉出惡言希憲曰是以我爲幼也卽送繫府獄杖之皆奇其有識世祖爲皇弟希憲年十九得入侍見其容止議論恩寵殊絕希憲篤好經史手不釋卷一日方讀孟子聞召急懷以進世祖問其說遂以性善義利仁暴之旨爲對世祖嘉之目曰廉孟子由是知名嘗與近臣校射世祖前希憲腰插三矢有欲取以射者希憲曰汝以我爲不能耶但吾弓力稍弱耳左右授以勁弓三發連中衆驚服曰眞文武材也歲甲寅世祖以京兆分地命希憲爲宣撫使京兆控制隴蜀諸王貴藩分布左右民雜羌戎尤號難治希憲講求民病抑強扶弱暇日從名儒若許衡姚樞輩諮訪治道首請用衡提舉京兆學校教育人材爲根本計國制爲士者無隸奴籍京兆多豪強廢令不行希憲至悉令著籍爲儒有民妻與卜者厭阻其夫殺之獄成僚佐皆言方大旱卜者宜減死希憲議當

伏法已而大雨立應初世祖受命憲宗經理河南關右居數歲讒者謂王府人多專擅不法至是命阿藍
荅兒劉太平檢覈所部用酷吏分領其事大開告訐希憲曰宣撫司事由己出有罪固當獨任僚屬何預
及事竟卒無獲罪者己未憲宗駐蹕合州世祖渡江取鄂州命希憲入籍府庫希憲引儒生百餘拜伏軍
門叩首今王師渡江凡軍中俘獲士人宜官購遣還以廣異恩世祖嘉納之還者五百餘人憲宗崩訃音
至希憲啟曰殿下太祖嫡孫先皇母弟前征雲南尅期撫定及今南伐率先渡江天道可知且殿下收召
才傑悉從人望子惠黎庶率土歸心今先皇奄棄萬國神器無主願速還京正大位以安天下世祖然之
且命希憲先行審察事變對曰劉太平霍魯海在關右渾都海在六盤征南諸軍散處秦蜀太平要結諸
將其性險詐素畏殿下英武倘倚關中形勝設有異謀漸不可制宜遣趙良弼往覘人情事宜從之阿里
不哥搆亂北邊遣脫忽思發兵河朔大肆凶暴真定名士李榮膏奉莊聖太后命侍阿里不哥講讀脫忽
忠怒榮不附己械之希憲訪榮於獄言於世祖而釋之世祖命希憲賜膳於宗王塔察兒希憲卽以己意
白王宜首建翊戴之謀王然之許以身任其事歸啟其言世祖曰若此重事卿何不懼之甚耶庚申至開
平宗室諸王勸進謙讓未允希憲復以天時人事進言且曰阿里不哥於殿下爲母弟居守朔方專制有
年或覬望神器事不可測宜早定大計世祖然之明日卽位建元中統希憲上言高麗王子偃久留京師

今聞其父死宜立爲王遣還國以恩結之又言鄂兵未還宜遣使與宋講好勅諸軍北歸帝皆從之趙良弼還自關右奏劉太平霍魯海反狀皆如希憲言初分漢地爲十道乃併京兆四川爲一道以希憲爲宣撫使太平霍魯海聞之乘驛急入京兆密謀爲變後三日希憲至宣布詔旨遣使安諭六盤未幾斷事宜關闕出遣使來告渾都海已反殺所遣使者朶羅台遣人諭其黨密里火者於成都乞台不花於青居使各以兵來援又多與蒙古軍奧魯官兀奴忽等金帛盡起新軍且約太平霍魯海同日俱發希憲得報召僚屬謂曰上新卽位責任吾等正爲今日不早爲之計殆將無及遣萬戶劉黑馬京兆治中高鵬晉華州尹史廣掩捕太平霍魯海及其黨獲之盡得其奸謀悉置於獄復遣劉黑馬誅密里火者總帥汪惟正誅乞台不花具以驛聞時關中無兵備命汪惟良將秦鞏諸軍進六盤惟良以未得上旨爲辭希憲卽解所佩虎符銀印授之曰此皆身承密旨君但辦吾事制符已飛奏矣又付銀一萬五千兩以充功賞出庫幣襲軍衣惟良感激遂行又發蜀卒更戍及在家餘丁推節制諸軍蒙古官八春將之謂之曰君所將之衆未經訓練六盤兵精勿與爭鋒但張聲勢使不得東則大事濟矣會有詔赦至希憲命絞太平等於獄戶於通衢方出迎詔人心遂安乃遣使自劾停赦行刑徵調諸軍擅以惟良爲帥等罪帝深善之曰經所謂行權此其是也別賜金虎符使節制諸軍且詔曰朕委卿以方面之權事當從宜毋拘常制坐失事機西

川將紐隣與魯官將舉兵應渾都海八春獲之繫其黨五十餘人于乾州獄送二人至京兆請并殺之二人自分必死希憲謂僚佐曰渾都海不能乘勢東來保無他慮今眾志未一猶懷反側彼軍見其將校執囚或別生心爲害不細今因其懼死並加寬釋使之感恩効力就發此軍餘丁往隸八春上策也初八春既執諸校其軍疑懼駭亂四出莫可禁遏及知諸校獲全紐隣與魯官得釋大喜過望切諭其屬出兵効力人人感悅八春亦釋然開悟果得精騎數千將與俱西詔以希憲爲中書右丞行秦蜀省事渾都海聞京兆有備遂西渡河趨甘州阿藍蒼兒復自和林提兵與之合分結隴蜀諸將又使紐隣兄宿敦爲書招紐隣於是成都帥百家奴興元忙古台青居汪惟正欽察俱遣使言人心危疑事不可測希憲遣使深諭戒之兩川諸將素憚希憲威名按堵從命渾都海阿藍蒼兒合軍而東諸將失利河右大震西土親王執畢帖木兒輜重皆空就食秦雍朝議欲棄兩川退守興元希憲力言不可乃止會親王合丹及汪惟良八春等合兵復戰西涼大敗之俘斬略盡得二叛首以送臬之京兆市事聞帝大嘉之曰希憲眞男子也進拜平章政事賜宅一區時希憲年三十矣希憲奏四川降民皆散處山谷宜申勅軍吏禁止俘掠違者千戶以下與犯人同罪又禁諸人無販易生口由是四川遂安降者益衆又罷解鹽戶所摘軍及京兆諸處無籍戶之戍靈州屯田者以寬民力欽察獲宋臣張炳震王政二人俱以母老願賜矜放希憲皆遣之還

因爲書與宋四川制置余玠諭以天道人事玠得書愧感自守不敢復輕動鞏昌帥府言鎮戎州有謀爲
叛者連引四百餘人希憲詳推之惟誅首惡五人宋將劉整以瀘州降盡繫前歸宋者數百人待報希憲
奏釋之且致書宰臣待整以恩當得其死力整後首建取襄陽之策果立勳効宋將家屬之在北者希憲
歲給其糧仕於宋者子弟得越界省其親人皆感之李壇反山東事連王文統平章趙璧素忌希憲勳名
因言文統爲張易希憲薦引遂至大用且關中形勝之地希憲得民心有商挺趙良弼爲之輔此事宜關
聖慮帝曰希憲自幼事朕朕知其心挺良弼皆正士何慮焉蜀伶人費正寅以私怨譖希憲因李壇叛亦
修城治兵潛畜異志帝因惑之命中書右丞南合代希憲行省且覆視所告事卒無實狀詔希憲還京師
陛見言曰方關陝叛亂川蜀未寧事急星火臣隨宜行事不謀佐貳如寅所言罪止在臣臣請逮繫有司
帝撫御牀曰當時之言天知之朕知之卿果何罪慰諭良久進拜中書平章政事一日夜半召希憲入禁
中從容道藩邸時事因及趙璧所言希憲曰昔攻鄂時實似道作木柵環城一夕而成陛下顧慮從諸臣
曰吾安得如似道者用之劉秉忠張易進曰山東王文統才智士也今爲李壇幕僚詔問臣臣對亦聞之
實未嘗識其人也帝曰朕亦記此希憲在中書振舉綱維綜駁名實汰逐冗濫裁抑僥倖興利除害事無
不便當時翕然稱治典章文物粲然可考又建言國家自開創已來凡納土及始命之臣咸令世守至今

將六十年子孫皆奴視部下都邑長吏皆其皂隸僮使前古所無宜更張之使者課黜陟始議行遷轉法至元元年丁母憂率親族行古喪禮勺飲不入口者三日慟則嘔血不能起寢臥草土廬于墓傍宰執以憂制未定欲極力起之相與詣廬聞號痛聲竟不忍言未幾有詔奪情起復希憲雖不敢違旨然出則素服從事入必纒絰及喪父亦如之奸臣阿合馬領左右部專總財賦會其黨相攻擊帝命中書推覆衆畏其權莫敢問希憲窮治其事以狀聞杖阿合馬罷所領歸有司帝諭希憲曰吏廢法而貪民失業而逃工不給用財不贍費先朝患此久矣自卿等爲相朕無此憂對曰陛下聖猶堯舜臣等未能以臯陶稷契之道贊輔治化以致太平懷愧多矣今日小治未足多也因論及魏徵對曰忠臣良臣何代無之顧人主用不用爾有內侍傳旨入朝堂言某事當爾希憲曰此閹宦預政之漸不可啟也遂入奏杖之言者訟丞相史天澤親黨布列中外威權日盛漸不可制詔罷天澤政事使待鞫問希憲進曰天澤事陛下久知天澤深者無如陛下始自潛藩多經任使將兵牧民悉有治効陛下知其可付大事用爲輔相小人一旦有言陛下當熟察其心跡果有肆橫不臣者乎今日信臣故臣得預此旨他日有訟臣者臣亦遭疑矣臣等備員政府陛下之疑信若此何敢自保天澤旣罷亦當罷臣帝良久曰卿且退朕思之明日帝召希憲諭曰昨思之天澤無對訟者事遂解又有訟四川帥欽察者帝勅中書急遣使誅之明日希憲覆奏帝怒曰尙

爾遲回耶對曰欽察大帥以一小人言被誅民心必駭收繫至此與訟者廷對然後明其罪於天下爲宜
詔遣使者接問其後事竟無實欽察得免希憲每奏議帝前論事激切無少回惜帝曰卿昔事朕王府多
所容受今爲天子臣乃爾木強耶希憲對曰王府事輕天下事重一或面從天下將受其害臣非不自愛
也方士請煉大丹勅中書給所需希憲具以秦漢故事奏且曰堯舜得壽不因大丹也帝曰然遂却之時
方尊禮國師帝命希憲受戒對曰臣受孔子戒矣帝曰孔子亦有戒耶對曰爲臣當忠爲子當孝孔子之
戒如是而已五年始建御史臺繼設各道提刑按察司時阿合馬專總財利乃曰庶務責成諸路錢穀付
之轉運今繩治之如此事何由辦希憲曰立臺察古制也內則彈劾奸邪外則察視非常訪求民瘼裨益
國政無大於此若去之使上下專恣貪暴事豈可集耶阿合馬不能對七年詔釋京師繫囚西域人匿贊
馬丁用事先朝資累鉅萬爲怨家所告繫大都獄既釋之矣時希憲在告實不預其事是秋車駕還自上
都怨家訴於帝希憲取堂判補署之曰天威莫測豈可幸其獨不署以苟免耶希憲入見以詔書爲言帝
曰詔釋囚耳豈有詔釋匿贊馬丁耶對曰不釋匿贊馬丁臣等亦未聞有此詔帝怒曰汝等號稱讀書臨
事乃爾宜得何罪對曰臣等忝爲宰相有罪當罷退帝曰但從汝言卽與左丞相耶律鐸同罷一日帝問
侍臣希憲居家何爲侍臣以讀書對帝曰讀書固朕所教然讀之而不肯用多讀何爲意責其罷政而不

復求進也阿合馬因譏之曰希憲日與妻子宴樂爾帝變色曰希憲清貧何從宴設希憲嘗有疾帝遣醫三人診視醫言須用沙糖作飲時最艱得家人求於外阿合馬與之二斤且致密意希憲却之曰使此物果能活人吾終不以奸人所與求活也帝聞而遣賜之嗣國王頭戴哥行省鎮遼陽有言其擾民不便者十二年詔起希憲爲北京行省平章政事將行肩輿入辭賜坐帝曰昔在先朝卿深識事機每以帝道啟朕及鄂漢班師屢陳天命朕心不忘丞相卿實宜爲顧退托耳遼書戶不下數萬諸王國壻分地所在彼皆素知卿能故命卿往鎮體朕此意遼東多親主使者傳令官吏立聽希憲至始革正之有西域人自稱駙馬營于城外繁富民誣其祖父嘗貸息錢索償甚急民訴之行省希憲命收捕之其人怒乘馬入省堂坐榻上希憲命猝下跪而問之曰法無私獄汝何人敢擅繫民令械繫之其人惶懼求哀國王亦爲之請乃稍寬令待對舉營夜遁俄詔國王歸國希憲獨行省事朝廷降鈔買馬六千五百希憲遣買於東州得羨餘馬千三百希憲曰上之則若自衛卽與他郡之不及者以其直還官長公主及國壻入朝縱獵郊原擾民爲甚希憲面諭國壻欲入奏之國壻驚愕入語公主公主出飲希憲酒曰從者擾民吾不知也請以鈔萬五千贖斂民之直幸勿遣使者自是貴人過者皆莫敢縱十二年右丞阿里海牙下江陵圖地形上於朝請命重臣開大府鎮之帝急召希憲還使行省荆南賜坐諭曰荆南入吾版籍欲使新附者感

恩未來者向化未知我朝有臣如此亦足以降其心南土卑濕於卿非宜今以大事付託度卿不辭賜田以養居者馬五十以給從者希憲曰臣每懼才識淺近不能勝負大任何敢辭疾然敢辭新賜復有詔令希憲承制授三品以下官希憲冒暑疾驅以進至鎮阿里海牙率其屬郊迎望拜塵中荆人大駭即日禁剽奪通商販興利除害兵民按堵首錄宋故宣撫制置二司幕僚能任事者以備采訪仍擇二十餘人隨材授職左右難之希憲曰今皆國家臣子也何用致疑時宋故官禮謁大府必廣致珍玩希憲拒之且語之曰汝等身仍故官或不次遷擢當念聖恩盡力報効今所饋者若皆己物我取之爲非義一或係官事同盜竊若歛於民不爲無罪宜戒慎之皆感激謝去令凡俘獲之人敢殺者以故殺平民論爲軍士所虜病而棄之者許人收養病愈故主不得復有立契券質賣妻子者重其罪仍沒入其直先時江陵城外蓄水扞禦希憲命決之得良田數萬畝以爲貧民之業發沙市倉粟之不入官籍者二十萬斛以賑公安之饋大綱既舉乃曰教不可緩也遂大興學選教官置經籍旦日親詣講舍以厲諸生西南溪洞及思播田楊二氏重慶制置趙定應俱越境請降事聞帝曰先朝非用兵不可得地今希憲能令數千百里外越境納土其治化可見也關吏得江陵人私書不敢發上之樞密臣發之帝前其中有曰歸附之初人不聊生皇帝遣廉相出鎮荆南豈惟人漸德化昆蟲草木咸被澤矣帝曰希憲不嗜殺人故能爾也希憲疾久不

愈十五年春近臣董文忠言江陵濕熱如希憲病何卽召希憲還江陵民號泣遮道留之不得相與畫像建祠希憲還囊橐蕭然琴書自隨而已帝知其貧特賜白金五千兩鈔萬貫五月至上都太常卿田忠良來問疾希憲謂曰上都聖上龍飛之地天下視爲根本近聞龍岡遺火延燒民居此常事耳慎勿令妄談地理者感動上意未幾果有數輩以徙置都邑事奏樞密副使張易中書左丞張文謙與之廷辨力言不可帝不悅明日召忠良質其事忠良以希憲語對帝曰希憲病甚猶慮及此耶其議遂止詔徵揚州名醫王仲明視希憲疾既至希憲服其藥能杖而起帝喜謂希憲曰卿得良醫疾向愈矣對曰醫持善藥以療臣疾苟能戒慎則誠如聖諭設或肆情良醫何益蓋以醫諷諫也會議立門下省帝曰侍中非希憲不可遣中使諭旨曰鞍馬之任不以勞卿坐而論道時至省中事有必須執奏肩輿以入可也希憲附奏曰臣疾何足卹輸忠効力生平所願皇太子亦遣人諭旨曰上命卿領門下省無憚羣小吾爲卿除之竟爲阿合馬所沮十六年春賜鈔萬貫詔復入中書希憲稱疾篤皇太子遣侍臣問疾因問治道希憲曰君天下在用人用君子則治用小人則亂臣病雖劇委之於天所甚憂者大奸專政羣小阿附誤國害民病之大者殿下宜開聖意急爲屏除不然日就沉痾不可藥矣戒其子曰丈夫見義勇爲禍福無預於己謂臯夔稷契伊傅周召爲不可及是自棄也天下事苟無牽制三代可復也又曰汝讀狄梁公傳乎梁公有大節

爲不肖子所墜汝輩宜慎之十七年十一月十九夜有大星隕于正寢之旁流光照地久之方滅是夕希憲卒年五十大德八年贈忠清粹德功臣太傅開府儀同三司追封魏國公諡文正加贈推忠佐理翊運功臣太師開府儀同三司上柱國恆陽王諡如故子大人爭僉遼陽等處行中書事恪台州路總管忬中書平章政事忱邵武路總管恆御史中丞惇江西等處行中書省叅知政事從弟希賢

希賢字達甫一名中都海牙伯父布魯海牙嘗曰是兒剛果當大吾家年二十餘與從兄希憲同侍世祖出入禁中小心慎密至元初北部王拘殺使者世祖選使往諭之廷臣推希賢至則布上意辭旨條暢王悔謝爲設宴贈貂裘一襲白金一笏還奏帝喜賜以御膳尋進中議大夫兵部尙書左丞相伯顏伐宋旣渡江至元十二年春授希賢禮部尙書佩金虎符與工部侍郎嚴忠範秘書丞柴紫芝持國書使宋三月丙戌至廣德軍獨松關守關者不知爲使襲而殺之張濡以爲己功受賞知廣德軍明年宋亡獲張濡殺之詔遣使護希賢喪歸後復籍濡家賞付其家希賢死時年二十九

元史卷一百二十七

明翰林學士亞中大夫知制誥兼修國史宋 濂等修

列傳第十四

伯顏

伯顏蒙古八隣部人曾祖述律哥圖事太祖爲八隣部左千戶祖阿剌襲父職兼斷事官平忽禪有功得食其地父曉古台世其官從宗王旭烈兀開西域伯顏長於西域至元初旭烈兀遣入奏事世祖見其貌偉聽其言厲曰非諸侯王臣也其留事朕與謀國事恆出廷臣右世祖益賢之勅以中書右丞相安童女弟妻之若曰爲伯顏婦不慚爾氏矣二年七月拜光祿大夫中書左丞相諸曹白事有難決者徐以一二語決之衆服曰真宰輔也四年改中書右丞七年遷同知樞密院事十年春持節奉玉冊立燕王眞金爲皇太子十一年大舉伐宋與史天澤並拜中書左丞相行省荆湖時荆湖淮西各建行省天澤言號令不一或致敗事詔改淮西行省爲行樞密院天澤又以病表請專任伯顏乃以伯顏領河南等路行中書省所屬並聽節制秋七月陛辭世祖諭之曰昔曹彬以不嗜殺平江南汝其體朕心爲吾曹彬可也九月甲戌朔會師于襄陽分軍爲三道並進丙戌伯顏與平章阿朮由中道循漢江趨郢州萬戶武秀爲前鋒遇

水灤霖雨水溢無舟不能涉伯顏曰吾且飛渡大江而憚此潢潦耶乃召一壯士負甲仗騎而前導磨諸軍畢濟癸巳次鹽山距郢州二十里郢在漢水北以石爲城宋人又於漢水南築新郢橫鐵繩鎖戰艦密樹椿木水中下流黃家灣堡亦設守禦之具堡之西有溝南通藤湖至江僅數里乃遣總管李庭劉國傑攻黃家灣堡拔之破竹席地盪舟由藤湖入漢江諸將請曰郢城我之喉襟不取恐爲後患伯顏曰用兵緩急我則知之攻城下策也大軍之出豈爲此一城哉遂舍郢順流下伯顏阿朮殿後不滿百騎十月戊午行大澤中郢將趙文義范興以騎二千來襲伯顏兀朮未及介冑亟還軍迎擊之伯顏手殺文義擒范興殺之其士卒死者五百人生獲數十人甲子次沙洋乙丑命斷事官楊仁風招之不應復使一俘持黃榜檄文傳趙文義首入城招其守將王虎臣王大用虎臣等斬俘焚黃榜裨將傅益以水軍十七人來降虎臣等又斬其軍之欲降者伯顏復命呂文煥招之又不應日暮風大起伯顏命順風擊金汁礮焚其廬舍烟焰漲天城遂破萬戶忙古歹生擒虎臣大用等四人餘悉屠之丙寅次新城令萬戶帖木兒史彌列沙洋所馘於城下射黃榜檄文於城中以招之其守將邊居誼邀呂文煥與語丁卯文煥至城下飛矢中右臂奔還戊辰其總制黃順踰城出降卽授招討使佩以金符令呼城上軍其部曲卽縋城下居誼邀入城悉斬之己巳其副都統制任寧亦降居誼終不出乃令總管李庭攻破其外堡諸軍蟻附而登拔之餘

衆三千獨力戰而死居誼舉家自焚遂併誅王虎臣王大用等四人十一月丙戌次復州知州翟貴以城降諸將請點視其倉庫軍籍遣官鎮撫伯顏不聽諭諸將不得入城違者以軍法論阿朮使右丞阿里海牙來言渡江之期伯顏不荅明日又來又不荅阿朮乃自來伯顏曰此大事也主上以付吾二人可使餘人知吾實乎潛刻期而去乙未軍次蔡店丁酉住觀漢口形勢宋淮西制置使夏貴等以戰艦萬艘分據要害都統王達守陽邏堡荆湖宣撫朱禩孫以游擊軍扼中流兵不得進千戶馬福建言淪河口可通沙蕪入江伯顏使覘沙蕪口夏貴亦以精兵守之乃圍漢陽軍聲言由漢口渡江貴果移兵援漢陽十二月丙午軍次漢口辛亥諸將自漢口開壩引船入淪河先遣萬戶阿刺罕以兵拒沙蕪口逼近武磯巡視陽羅城堡徑趨沙蕪遂入大江壬子伯顏戰艦萬計相踵而至以數千艘泊于淪河灣口屯布蒙古漢軍數十萬騎於江北諸將言沙蕪南岸彼戰船在焉可攻而取伯顏曰吾亦知其可必取慮汝輩貪小功失大事一舉渡江收其全功可也遂令脩攻具進軍陽羅堡癸丑遣人招之不應甲寅再遣人招之其將士皆曰我輩受宋厚恩戮力死戰此其時也安有叛逆歸降之理備吾甲兵決之今日我宋天下猶賭博孤注輸贏在此一擲爾伯顏摩諸將攻之三日不克有術者來言天道南行金木相犯若二星交過則江可渡伯顏却之使勿言乃密謀於阿朮曰彼謂我必拔此堡方能渡江此堡甚堅攻之徒勞汝今夜以鐵騎三

千泛舟直趨上流爲掃虛之計請巨渡江襲南岸已過則速遣人報我乙卯分遣右丞阿里海牙督萬戶張弘範忽失海牙折的迷失等先以步騎攻陽羅堡夏貴來援遂俾阿朮出其不意率萬戶晏徹兒忙古歹史格賈文備四翼軍泝流西上四十里對青山磯而泊是夜雪大作遙見南岸多露沙洲阿朮登舟指示諸將令徑趨是洲載馬後隨萬戶史格一軍徑渡爲其都統程鵬飛所却阿朮橫身蕩決血戰中流擒其將高邦顯等死者無算鵬飛彼七創敗走得舩千餘艘遂得南岸阿朮與鎮撫何瑋等數十人攀岸步關開而復合者數四南軍阻水不得相薄遂起浮橋成列而渡阿里海牙繼遣張榮寶解汝楫等四翼軍舩艘相銜直抵夏貴引麾下軍數千先遁諸軍乘之殺溺不可數計追至鄂州東門而還丙辰阿朮遣使馳報伯顏大喜揮諸將急攻破陽羅堡斬王達宋軍大潰數十萬衆死傷幾盡夏貴僅以身免走至白虎山諸將謂貴大將不可使逸去請追之伯顏曰陽羅之捷吾欲遣使前告宋人而貴走代吾使不必追也丁巳伯顏登武磯山大江南北皆我軍也諸將稱賀伯顏辭謝之阿朮還渡江議兵所向或欲先取蘄黃阿朮曰若赴下流退無所據先取鄂漢雖遲旬日可爲萬全計伯顏從之己未師次鄂州遣呂文煥楊仁風等諭之曰汝國所恃者江淮而已今我大兵飛渡長江如履平地汝輩何不速降鄂恃漢陽將戰乃焚其戰艦三千艘火照城中兩城大恐庚申知鄂州張晏然知漢陽軍王儀知德安府來與國皆以城降

程鵬飛以其軍降壬戌定新附官品級撤宋兵分隸諸將先是邊民戍卒陷入宋境者悉縱遣之丁卯遣萬戶也的哥總管忽都歹入奏渡江之捷分命阿剌罕先鋒黃頭取壽昌糧四十萬斛以充軍餉留右丞阿里海牙等以兵四萬分省于鄂規取荆湖己巳伯顏與阿朮以大軍水陸東下俾阿朮先據黃州十二年春正月癸酉朔至黃州甲戌沿江制置副使知黃州陳奕降伯顏承制授奕沿江大都督奕遣書至漣水招其子巖巖降遣呂文煥陳奕以書招蘄州安撫使管宗模復遣阿朮以舟師造其城下癸未伯顏至蘄州宗模出降卽承制授以淮西宣撫使留萬戶帶塔兒守之阿朮復以舟師先趨江州兵部尙書呂師夔在江州與知州錢真孫遣人來迎降丙戌伯顏至江州卽以師夔爲江州守師夔設宴庾公樓選宋宗室女數人盛飾以獻伯顏怒曰吾奉聖天子明命興仁義之師問罪於宋豈以女色移吾志乎斥遣之知南康軍葉闓來降殿前都指揮使知安慶府范文虎亦奉書納款阿朮遂率舟師造安慶文虎出降伯顏至湖口遣千戶寧玉繫浮橋以渡風迅水駛橋不能成乃禱于大孤山神有頃風息橋成大軍畢渡二月壬寅朔伯顏至安慶承制授文虎兩淞大都督文虎以其從子友信知安慶府事命萬戶喬珪戍之丁未次池州都統制張林以城降戊申通判權州事趙昂發與其妻自經死伯顏入城見而憐之令具衣衾葬焉宋宰臣賈似道遣宋京致書請還已降州郡約貢歲幣伯顏遣武略將軍囊加歹同其介阮思聰報命

止京以待且使謂似道曰未渡江議和入貢則可今沿江諸郡皆內附欲和則當來面議也囊加牙還乃釋宋京庚申發池州壬戌次丁家洲賈似道都督諸路軍馬十三萬號百萬步軍指揮使孫虎臣爲前鋒淮西制置使夏貴以戰艦二千五百艘橫亘江中似道將後軍伯顏命左右翼萬戶率騎兵夾江而進礮聲震百里宋軍陣動貴先遁以扁舟掠似道船呼曰彼衆我寡勢不支矣似道聞之倉皇失措遽鳴金收軍軍潰衆軍大呼曰宋軍敗矣諸戰艦居後者阿朮促騎召之挺身登舟手棹衝敵船舳艫相盪乍分乍合阿朮以小旗麾何瑋李庭等並舟深入伯顏命步騎左右犄之追殺百五十餘里溺死無算得船二千餘艘及其軍資器仗圖籍符印似道東走揚州貴走廬州虎臣走泰州甲子攻太平州丁卯知州孟之縉及知無爲軍劉權知鎮巢軍曹旺知和州王喜俱以城降庚午師次建康之龍灣大賚將士三月癸酉宋沿江制置趙潛遁潛兄淮起兵溧陽就執而死都統徐王榮翁福等以城降命招討使唆都守之知鎮江府洪起長遁總管石祖忠以城降知盩厔府趙與可遁知饒州唐震死而江東諸郡皆下淮西滁州諸郡亦相繼降丙子國信使廉希憲至建康傳旨令諸將各守營壘毋得妄有侵掠希賢與嚴忠範等奉命使宋請兵自衛伯顏曰行人以言不以兵兵多徒爲累使事希賢固請與之丙戌至獨松嶺果爲宋人所殺庚寅伯顏遣左右司員外郎石天麟詣闕奏事世祖大悅悉可其奏伯顏以行中書省駐建康阿塔海董

文炳以行樞密院駐鎮江阿朮別奉詔攻揚州江東歲饑民大疫伯顏隨賑救之民賴以安宋人遣都統
拱模移書徐王榮等言殺使之事太皇太后及嗣君實不知皆邊將之罪當按誅之恩輸幣請罷兵通好
伯顏曰彼爲譎詐之計以視我之虛實當擇人以同往觀其事體宣布威德令彼速降乃命議事官張羽
等持王榮答書至平江驛宋人又殺之四月乙丑有詔以時暑方熾不利行師俟秋再舉伯顏奏曰宋人
之據江海如獸保險今已扼其吭少縱之則逸而逝矣世祖語使者曰將在軍不從中制兵法也宜從丞
相言五月丁亥復命奉御愛先傳旨召伯顏赴闕以阿剌罕爲參政留治省事伯顏至鎮江會諸將計事
令各還鎮乃渡江北行入見於上都七月癸未進中書右丞相讓功於阿朮遂以阿朮爲左丞相八月癸
卯受命還行省付以詔書傳諭宋主乃取道益都行視沂州等軍壘調淮東都元帥孛魯歡副都元帥阿
里伯以所部兵沂淮而進九月戊寅會師淮安城下遣新附官孫嗣武叩城大呼又射書城中諭守將使
降皆不應庚辰招討別里迷失拒北城西門伯顏與孛魯歡阿里伯親臨南城堡揮諸將長驅而登拔之
潰兵欲奔大城追襲至城門斬首數百級遂平其南堡丙戌次寶應軍戊子次高郵十月庚戌圍揚州召
諸將指授方略留孛魯歡阿里伯守灣頭新堡衆軍南行壬戌至鎮江罷行院以阿塔海董文炳同署事
十一月乙亥伯顏分軍爲三道期會于臨安參政阿剌罕等爲右軍以步騎自建康出四安趨獨松嶺參

政董文炳等爲左軍以舟師自江陰循海趨澠浦華亭伯顏及右丞阿塔海由中道節制諸軍水陸並進壬午伯顏軍至常州先是常州守王宗洙遁通判王虎臣以城降其都統制劉師勇與張彥王安節等復拒之推姚晝爲守固拒數月不下伯顏遣人至城下射書城中招諭勿以已降復叛爲疑勿以拒敵我師爲懼皆不應乃親督帳前軍臨南城又多建火礮張弓弩晝夜攻之瀾西制置文天祥遣尹玉麻士龍來援皆戰死甲申伯顏叱帳前軍先登豎赤旗城上諸軍見而大呼曰丞相登矣師畢登宋兵大潰拔之屠其城姚晝及通判陳炤等死之生獲王安節斬之劉師勇變服單騎奔平江諸將請追之伯顏曰勿追師勇所過城守者膽落矣以行省都事馬恕爲常州尹遣蒙古軍都元帥闊里帖木兒萬戶懷都先據無錫州萬戶忙古歹晏徹兒巡太湖遣監戰亦乞里歹招討使唆都宣撫使游顯會闍里帖木兒先趨平江庚寅遣降人游介寶奉詔書副本使于宋仍以書諭宋大臣十二月辛丑次無錫宋將作監柳岳等奉其國主及太皇太后書併宋之大臣與伯顏書來見垂泣而言曰太皇太后年高嗣君幼冲且在衰經中自古禮不伐喪哀恕班師敢不每年進奉脩好今日事至此者皆奸臣賈似道失信誤國耳伯顏曰主上即位之初奉國書脩好汝國執我行人一十六年所以興師問罪去歲又無故殺害廉奉使等誰之過歟如欲我師不進將効錢王納土乎李主出降乎爾宋昔得天下於小兒之手今亦失於小兒之手蓋天道也

不必多言岳頓首泣不已遣招討使抄兒赤以柳岳來使事及嚴奉使所齎國書入奏先是平江守潛說友遁通判胡玉等既以城降而復爲宋人所據甲辰衆軍次平江都統王邦傑通判王矩之率衆出降庚戌遣囊加歹同其使柳岳還臨安以忙古歹范文虎行兩浙大都督事遣寧玉脩吳江長橋不旬日而成庚申囊加歹同宋尙書夏士林侍郎呂師孟宗正少卿陸秀夫以書來請尊世祖爲伯父而世脩子姪之禮且約歲幣銀二十五萬兩帛二十五萬匹癸亥遣囊加歹同師孟等還臨安遣忙古歹范文虎會阿剌罕昔里伯取湖州知州趙良淳死之丙寅趙與可以城降伯顏發平江留游顯懷都忽都不花屯兵鎮守別遣甯玉守長橋十三年正月己巳次嘉興安撫劉漢傑以城降留萬戶忽都虎等戌之癸酉宋軍器監劉庭瑞以其宰臣陳宜中等書來卽遣回乙亥宜中遣御史劉呂奉宋主稱臣表文副本及致書伯顏約會長安鎮辛巳衆軍至崇德宜中又令都統洪模持書同囊加歹來見壬午次長安鎮宜中等不至癸未進軍臨平鎮甲申次阜亭山宋主遣知臨安府賈餘慶同宗室保康軍承宣使尹甫和州防禦使吉甫奉傳國璽及降表詣軍前伯顏受訖遣囊加歹以餘慶等還臨安召宋宰臣出議降事時宜中已遁以文天祥代爲丞相不拜自請至軍前乙酉進軍至臨安北十五里分遣董文炳呂文煥范文虎巡視城堡安諭軍民囊加歹洪模來報宜中與張世傑蘇義劉師勇等以益王廣王下浙江航海而南惟謝太后及幼主

在宮中伯顏亟遣使諭右軍阿剌罕與魯赤左軍董文炳范文虎據守淞江以勁兵五千人追之不及而還丙戌禁軍士毋入城遣呂文煥持黃榜諭臨安中外軍民俾安堵如故先是三衛衛士白晝殺人閭里小民乘亂剽掠至是民皆安之丁亥遣程鵬飛洪雙壽等入宮慰諭謝后戊子謝后遣丞相吳堅文天祥樞密謝堂安撫賈餘慶內官鄧惟善來見伯顏慰遣之顧天祥舉動不常疑有異志留之軍中天祥數請歸伯顏笑而不荅天祥怒曰我此來爲兩國大事彼皆遣歸何故留我伯顏曰勿怒汝爲宋大臣責任非輕今日之事政當與我共之令忙古歹唆都館伴羈縻之令程鵬飛洪雙壽同賈餘慶易宋主削帝號降表己丑駐軍臨安城北之湖州市遣千戶囊加歹等以宋傳國璽入獻唐質伯顏建大將旗鼓率左右翼萬戶巡臨安城觀潮於淞江暮還湖州市宋宗室大臣皆來見辛卯萬戶張弘範郎中孟祺同程鵬飛以所易降表及宋主謝后諭未附州郡手詔至軍前令鎮撫唐古歹罷文天祥所招募義兵二萬餘人壬辰伯顏登獅子峯觀臨安形勢命唆都撫諭軍民部分諸將共守其城護其宮癸巳謝后復使人來勞問仍以溫言慰遣之甲午分置其三衛諸司兵于各翼以俟調遣其生募等軍愿歸者聽分遣蕭郁王世英等招諭衢信諸州二月丁酉遣劉頤等往淮西招夏貴仍遣別將徇地淞東西於是知嚴州方回知婺州劉怡知台州楊必大知處州梁椅並以城降命右丞張惠參政阿剌罕董文炳呂文煥入見謝后宣布德意

以慰諭之辛丑宋主率文武百僚望闕拜發降表伯顏承制以臨安爲兩浙大都督府忙古歹范文虎入治府事復命張惠阿刺罕董文炳呂文煥等入城籍其軍民錢穀之數闔寶倉庫收百官誥命符印圖籍悉罷宋官府取宋主居之別室分遣新附官招諭南北兩廣四川未下州郡部分諸將分屯要害仍禁人不得侵壞宋民山陵是日進軍淞江之滸潮不至者二日人以爲天助癸卯謝后命吳堅賈餘慶謝堂家鉉翁劉昂與文天祥並爲祈請使楊應奎趙若秀爲奉表押璽官赴闕請命伯顏拜表稱賀曰臣伯顏言國家之業大一統海岳必明主之歸帝王之兵出萬全蠻夷敢天威之抗始干戈之爰及迄文軌之會同區宇一清普天均慶臣伯顏等誠懼誠怵頓首頓首恭惟皇帝陛下道光五葉統接千齡梯航日出之邦冠帶月支之域際丹崖而述職奄瀚海而爲家獨此島夷弗遵聲教謂江湖可以保逆命舟楫可以敵王師連兵負固逾四十年背德食言難一二計當聖主飛渡江南之日遣行人乞爲城下之盟速凱奏之冒旋輒詐謀之復肆拘囚我信使忘乾坤再造之恩招納我叛臣盜漣海三城之地我是以有六載襄樊之討彼居然無一介行李之來禍旣出于自求怒致聞于斯赫臣伯顏等肅將禁旅恭行天誅爰從襄漢之上流復出武昌之故渡藩屏一空于江表烽烟直接於錢塘尙無度德量力之心荐有殺使毀書之事屬廟謨之親稟謂根本之宜先乃命阿刺罕取道于獨松董文炳屯師于海渚臣與阿塔海忝司中閫直指

僞都掎角之勢既成水陸之師並進常州已下列郡傳檄而悉平臨安爲期諸將連營而畢會彼知窮感
透致哀鳴始則有爲姪納幣之祈次則有稱藩奉璽之請顧甘言何益於實事率銳卒直抵于近郊召來
用事之大臣放散思歸之衛士嘯強心在四郊之橫草都無飛走計窮一片之降旛始豎其宋國主已於
二月初五日望闕拜伏歸附訖所有倉廩府庫封籍待命外臣奉揚寬大撫戢吏民九衢之市肆不移一
代之繁華如故茲惟睿算卓冠前王視萬里如目前運天下於掌上致令臣等獲對明時歌七德以告成
深切龍庭之想上萬年而爲壽敬陳虎拜之詞臣伯顏等無任瞻天望聖激切屏營之至謹奉表稱賀以
聞戊申堅等發臨安堂不行癸丑宋福王與芮奉書于伯顏辭甚懇切伯顏曰爾國旣以歸降南北共爲
一家王勿疑宜速來同預大事且遣迓之戊午夏貴以淮南降庚申命囊加歹傳旨召伯顏借宋君臣入
朝三月丁卯伯顏入臨安俾郎中孟祺籍其禮樂祭器冊寶儀仗圖書庚午囊加歹至甲戌與芮來伯顏
議以阿剌罕董文炳留治行省事以經略閩粵忙古歹以都督鎮淪西陵都以宣撫使鎮淪東唐兀歹李
庭護送宋君臣北上乙亥伯顏發臨安丁丑阿塔海等宣詔趣宋王母后入覲聽詔畢卽日俱出宮惟謝
后以疾獨留口國夫人黃氏宮人從行者百餘人福王與芮沂王乃猷謝堂楊鎮而下官屬從行者數千
人三學之士數百人宋主求見伯顏曰未入朝無相見之禮五月乙未伯顏以宋主至上都世祖御大安

關受朝降授宋主鼎開府儀同三司檢校大司徒封瀛國公宋平得府三十七州百二十八關監三縣七百三十三命伯顏告于天地宗廟大赦天下帝勞伯顏伯顏再拜謝曰奉陛下成算阿朮効力臣何功之有復拜同知樞密院賜銀鼠青鼠只孫二十襲裨校有功者百二十三人賞銀有差初海都稱兵內向詔以右丞相安童佐皇子北平王那木罕統諸軍於阿力麻里備之十四年諸王昔里吉劫北平王拘安童齊宗王以叛命伯顏率師討之與其衆遇於幹魯歡河夾水而陳相持終日俟其懈磨軍爲兩隊掩其不備破之昔里吉走死十八年二月世祖命燕王撫軍北邊以伯顏從仍諭之曰伯顏才兼將相忠於所事故俾從汝不可以常人遇之燕王每與論事尊禮有加是歲殞羣臣食邑詔益以藤州等處四千九百七十七戶伯顏之取宋而還也詔百官郊迎以勞之平章阿合馬先百官半會道謁伯顏解所服玉鈎條遺之且曰宋寶玉固多吾實無所取勿以此爲薄也阿合馬謂其輕己思中傷之乃誣以平宋時取其玉桃盞帝命按之無驗遂釋之復其任阿合馬既死有獻此盞者帝愕然曰幾陷我忠良別吉里迷失嘗誣伯顏以死罪未幾以它罪誅勅伯顏臨視伯顏與之酒愴然不顧而返世祖問其故對曰彼自有罪以臣臨之人將不知天誅之公也二十二年秋宗王阿只吉失律詔伯顏代總其軍先是邊兵嘗乏食伯顏令軍中採葭快葉兒及稽敦之根貯之人四斛草粒稱是盛冬雨雪人馬賴以不饑又令軍士有捕塔刺不歡

之獸而食者積其皮至萬人莫知其意既而遣使輦至京師帝笑曰伯顏以邊地寒軍士無衣欲易吾纒帛耳遂賜以衣二十四年春二月或告乃顏反詔伯顏窺覘之乃多載衣裘入其境輒以與驛人既至乃顏爲設宴謀執之伯顏覺與其從者趨出分三道逸去驛人以得衣裘故爭獻健馬遂得脫馳還白狀夏四月乃顏反從世祖親征奏李庭董士選將漢軍得以漢法戰乃顏之黨金家奴塔不歹進遇乘輿漢軍力戰乃皆潰卒擒乃顏二十六年進金紫光祿大夫知樞密院事出鎮和林和林置知院自伯顏始二十九年秋宗王明理鐵木兒挾海都以叛詔伯顏討之相值于阿撒忽禿嶺矢下如雨衆軍莫敢登伯顏令之曰汝寒君衣之汝饑君食之政欲効力於此時爾於此不勉將何以報麾諸軍退後者斬伯顏先登陷陣諸軍望風爭奮大破之明里鐵木兒挺身走命速哥梯迷禿兒等追之伯顏引軍夜還至必失禿卒遇伏兵伯顏堅壁不動黎明遂引去伯顏輕騎追至別竭兒速哥梯迷禿兒等兵亦至乃夾擊之斬首二千級俘其餘衆以歸諸將言古禮兵勝必禡旗于所征之地欲用囚虜爲牲伯顏不可衆皆歎服軍中獲牒者忻都欲殺之伯顏不許厚賜之遣賚書諭明里鐵木兒以禍福明里鐵木兒得書感泣以衆來歸未幾海都復犯邊伯顏留拒之廷臣有譖伯顏久居北邊與海都通好仍保守無尺寸之材者詔以御史大夫玉昔帖木兒代之居伯顏于大同以俟後命玉昔帖木兒未至三驛會海都兵復至伯顏遣人語玉昔帖

木兒曰公姑止待我翦此寇而來未晚也伯顏與海都兵交且戰且却凡七日諸將以爲怯憤曰果懼戰何不授軍於大夫伯顏曰海都懸軍涉吾地邀之則遁誘其深入一戰可擒也諸軍必欲速戰若失海都誰任其咎諸將曰請任之卽遣軍擊敗之海都果脫去乃召玉昔帖木兒至軍授以印而行時成宗以皇孫奉詔撫軍北邊舉酒以餞曰公去將何以教我伯顏舉所酌酒曰可慎者惟此與女色耳軍中固當嚴紀律而恩德不可偏廢冬夏營駐循舊爲便成宗悉從之三十年冬十二月驛召至自大同世祖不豫明年正月世祖崩伯顏總百官以聽兵馬司請日出鳴晨鐘日入鳴昏鐘以防變故伯顏呵之曰汝將爲賊邪其一如平日適有盜內府銀者宰執以其幸赦而盜欲誅之伯顏曰何時無盜今以誰命而誅之人皆服其有識成宗卽位于上都之大安閣親王有違言伯顏握劍立殿陞陳祖宗寶訓宣揚顧命述所以立成宗之意辭色俱厲諸王股栗趨殿下拜五月拜開府儀同三司太傅錄軍國重事依前知樞密院事賜金銀各有差時相有忌之者伯顏語之曰幸送我兩罌美酒與諸王飲於宮前餘非所知也江南三省累請罷行樞密院成宗問于伯顏時已屬疾張目對曰內而省院各置爲宜外而軍民分隸不便成宗是三院遂罷冬十二月丙申有大星隕于東北己亥雨水冰庚子伯顏薨年五十九伯顏深略善斷將二十萬衆伐宋若將一人諸帥仰之若神明畢事還朝歸裝惟衣被而已未嘗嘗功也大德八年特贈宣忠佐

命開濟功臣太師開府儀同三司追封淮安王諡忠武至正四年加贈宣忠佐命開濟翊戴功臣進封淮
王餘如故子買的僉樞密院事囊加歹樞密副使孫相嘉失禮同僉樞密院事集賢學士至治末省先塋
於白只刺山聞有變赴上都或勸少避之曰我與國同休戚今有難可避乎至上都果見囚久之得釋尋
拜河南江北行省平章政事遷江南行臺御史大夫曾孫普達失理皆能世其家

元史卷一百二十七考證

伯顏傳同其介阮思聰報命○臣祖庚按經世大典作袁克己

惟謝后以疾獨留○臣祖庚按下空一字南北板同無從查補

元史卷一百二十七考證

明翰林學士亞中大夫知制誥兼修國史宋 濂等修

列傳第十五

阿朮

阿朮兀良氏都帥兀良合台子也沉幾有智略臨陣勇決氣蓋萬人憲宗時從其父征西南夷率精兵爲
候騎所向摧陷莫敢當其鋒至平大理克諸部降交趾無不在行事見兀良合台傳憲宗嘗勞之曰阿朮
未有名位挺身奉國特賜黃金三百兩以勉將來世祖卽位留典宿衛中統三年從諸王拜出帖哥征李
璫有功九月自宿衛將軍拜征南都元帥治兵于汴復立宿州至元元年八月略地兩淮攻取戰獲軍聲
大振四年八月觀兵襄陽遂入南郡取僊人鐵城等柵俘生口五萬軍還宋兵邀襄樊間阿朮乃自安陽
灘濟江留精騎五千陣牛心嶺復立虛寨設疑火夜半敵果至斬首萬餘級初阿朮過襄陽駐馬虎頭山
宿漢東白河口曰若築壘於此襄陽糧道可斷也五年遂築鹿門新城等堡繼又築臺漢水中與夾江堡
相應自是宋兵援襄者不能進六年七月大霖雨漢水溢宋將夏貴范文虎相繼率兵來援復分兵出入
水岸林谷間阿朮謂諸將曰此張虛形不可與戰宜整舟師備新堡諸將從之明日宋兵果趨新堡大破

之殺溺生擒五千餘人獲戰船百餘艘於是治戰船分水軍築圍城以逼襄陽文虎復率舟師來救來興國又以兵百艘侵百丈山前後邀擊於湍灘俱敗走之九年三月破樊城外郭增築重圍以逼之宋裨將張順張貴裝軍衣百船自上流入襄陽阿朮攻之順死貴僅得入城俄乘輪船順流東走阿朮與元師劉整分泊戰船以待燃薪照江兩岸如晝阿朮追戰至樞門關擒貴餘衆盡死是年九月加同平章事先是襄樊兩城漢水出其間宋兵植木江中聯以鐵鎖中設浮梁以通援兵樊恃此爲固至是阿朮以機鋸斷木以斧斷鎖焚其橋襄兵不能援十二月遂拔樊城襄守將呂文煥懼而出降十年七月奉命略淮東抵揚州城下宋以千騎出戰阿朮伏兵道左佯北宋兵逐之伏發擒其騎將王都統十一年正月入覲與參政阿里海牙奏請伐宋帝命相臣議久不決阿朮進曰臣久在行間備見宋兵弱於往昔失今不取時不再來帝乃可其奏詔益兵十萬與丞相伯顏參政阿里海牙等同伐宋三月進平章政事秋九月師次郢之鹽山得俘民言宋沿江九郡精銳盡聚郢江東西兩城今舟師出其間騎兵不得護岸此危道也不若取黃家灣堡東有河口可由其中拖船入湖轉以下江爲便從之遂會攻郢而去行大澤中忽宋騎兵千人突至時從騎纔數十人阿朮卽奮槊馳擊所向畏避追斬五百餘級生擒其將趙范二統制進攻沙洋新城拔之前次復州守將翟貴迎降時夏貴鎖大艦扼江漢口兩岸備禦堅嚴阿朮用軍將馬福計回舟

淪河口穿湖中從陽羅堡西沙蕪口入大江十二月軍至陽羅堡攻之不克阿朮謂伯顏曰攻城下策也若分軍船之半循岸西上對青山磯止泊伺隙擣虛可以得志從之明日阿朮遙見南岸沙洲卽率衆趨之載馬後隨宋將程鵬飛來拒大戰中流鵬飛敗走諸軍抵沙洲急擊攀岸步鬪開而復合者數四敵小却出馬於岸遂力戰破之追擊至鄂東門而還夏貴聞阿朮飛渡大驚引麾下兵三百艘先遁餘皆潰走遂拔陽羅堡盡得其軍實伯顏議師所向或欲先取蘄黃阿朮曰若赴下流退無所據上取鄂漢雖遲旬日師有所依可以萬全己未水陸並趨鄂漢焚其船三千艘煙燄漲天漢陽鄂州大恐相繼皆降十二年正月黃蘄江州降阿朮率舟師趨安慶范文虎迎降繼下池州宋丞相賈似道擁重兵拒蕪湖遣宋京來請和伯顏謂阿朮曰有詔令我軍駐守何如阿朮曰若釋似道而不擊恐已降州郡今夏難守且宋無信方遣使請和而又射我軍船執我邏騎今日惟當進兵事若有失罪歸於我二月辛酉師次丁家洲遂與宋前鋒孫虎臣對陣夏貴以戰艦二千五百艘橫亘江中似道將兵殿其後時已遣騎兵夾岸而進兩岸樹砲擊其中堅宋軍陣動阿朮挺身登舟手自持旄突入敵陣諸軍繼進宋兵遂大潰以上詳見伯顏傳世祖以宋重兵皆駐揚州臨安倚之爲重四月命阿朮分兵圍守揚州庚申次真州敗宋兵于珠金砂斬首二千餘級旣抵揚州乃造樓櫓戰具于瓜洲漕粟于真州樹柵以斷其糧道宋都統姜才領步騎二萬

來攻柵敵軍夾河爲陣阿朮磨騎士渡河擊之戰數合堅不能却衆軍佯北才逐之遂奮而回擊萬矢雨集才軍不能支擒其副將張林斬首萬八千級七月庚午宋兩淮鎮將張世傑孫虎臣以舟師萬艘駐焦山東每十船爲一舫聯以鐵鎖以示必死阿朮登石公山望之舫艦連接旌旗蔽江曰可燒而走也遂選強健善射者千人載以巨艦分兩翼夾射阿朮居中合勢進擊繼以火矢燒其蓬檣煙燄漲天宋兵旣破舟死戰至是欲走不能前軍爭赴水死後軍散走追至圖山獲黃白鷄船七百餘艘自是宋人不復能軍矣十月詔拜中書左丞相仍諭之曰淮南重地李庭芝狡詐須卿守之時諸軍進取臨安阿朮駐兵瓜洲以絕揚州之援伯顏所以兵不血刃而平宋者阿朮控制之力爲多十三年二月夏貴舉淮西諸城來附阿朮謂諸將曰今宋已亡獨庭芝未下以外助猶多故也若絕其聲援塞彼糧道尙恐東走遁秦逃命汀海乃柵揚之西北丁村以扼其高郵寶應之餽運貯粟灣頭堡以備捍禦留屯新城以逼泰州又遣千口伯顏察兒率甲騎三百助灣頭兵勢且戒之曰庭芝水路旣絕必從陸出宜謹備之如丁村烽起當首尾相應斷其歸路六月甲戌姜才知高郵米運將至果夜出步騎五千犯丁村柵至曉伯顏察兒來援所將皆阿朮牙下精兵旗幟畫雙赤月衆軍望其塵連呼曰丞相來矣宋軍識其旗皆遁才脫身走追殺騎兵四百步卒免者不滿百人壬辰李庭芝以朱煥守揚州挾姜才東走阿朮率兵追襲殺步卒千人庭芝僅

入秦州遂築壘以守之七月乙巳朱煥以揚州降乙卯秦州守將孫良臣開北門納降執李庭芝姜才奉命戮揚州市揚秦既下阿朮申嚴士卒禁暴掠有武衛軍校掠民二馬卽斬以徇兩淮悉平得府二州二十二軍四縣六十七九月辛酉入見世祖於大明殿陳宋俘第功行賞實封秦興縣二千戶二十三年受命北伐叛王普剌木等明年凱旋繼又西征至哈刺霍州以疾卒年五十四追封河南王

阿里海牙

阿里海牙畏吾兒人也初生胞中剖而出其父以爲不祥將棄之母不忍比長果聰辨有膽略家貧常躬耕舍耒嘆曰大丈夫當立功朝廷何至效細民事吠畝乎去求其國書讀之逾月又棄去用薦者得事世祖于潛邸世祖卽位漸見擢用由左右司郎中遷參議中書省事至元二年立諸路行中書省進僉河南行省事五年命與元帥阿朮劉整取襄陽又加參知政事始帝遣諸將命毋攻城但圍之以俟其自降乃築長圍起萬山包百丈楚山盡鹿門以絕之宋兵入援者皆敗去然城中糧儲多圍之五年終不下九年二月破樊城外郭其將復閉內城守阿里海牙以爲襄陽之有樊城猶齒之有唇也宜先攻樊城樊城下則襄陽可不攻而得乃入奏帝始報可會有西域人亦思馬因獻新礮法因以其人來軍中十年正月爲礮攻樊破之先是宋兵爲浮橋以通襄陽之援阿里海牙發水軍焚其橋襄援不至城乃拔詳具阿朮傳

阿里海牙既破樊移其攻具以向襄陽一敵中其譙樓聲如雷霆震城中城中洶洶諸將多踰城降者劉整欲立碎其城執文煥以快其意阿里海牙獨不欲攻乃身至城下與文煥語曰君以孤軍城守者數年今飛鳥路絕主上深嘉汝忠若降則尊官厚祿可必得決不殺汝也文煥狐疑未決又折矢與之誓如是者數四文煥感而出降遂與入朝帝以文煥爲昭勇大將軍侍衛親軍都指揮使襄漢大都督阿里海牙行荆湖等路樞密院事鎮襄陽阿里海牙奏曰襄陽自昔用武之地也今天助順而克之宜乘勝順流長驅宋可必平平章阿朮亦贊其說帝命丞相史天澤議之天澤曰朝廷若遣重臣如丞相安童同知樞密院事伯顏者一人都督諸軍則四海混同可立待也帝曰伯顏可乃大徵兵拜伯顏爲行中書省左丞相阿朮爲平章阿里海牙進行省右丞賞鈔二百錠十一年九月會師襄陽遂破郢州及沙洋新城十二月師出沙蕪口宋制置夏貴守諸隘甚固阿里海牙磨兵攻武磯堡貴趨援之阿朮遂以兵西渡青山磯宋都統程鵬飛來迎戰敗之江中會貴兵亦敗走廬州宣撫朱禎孫夜遁還江陵知鄂州張晏然以城降鵬飛以水軍降伯顏與諸將會鄂城下議曰鄂襟山帶江江南之要區也且兵糧皆備今蜀江陵岳鄂皆未下不一大將鎮撫之上流一動則鄂非我有也乃以兵四萬遣阿里海牙戍鄂而與阿朮將大兵以東阿里海牙集鄂民宣上德惠禁將士毋侵掠其下恐懼無敢取民之菜者民大悅遣人徇壽昌信陽德安

諸郡皆下進徇江陵十有二年春三月與安撫高世傑兵遇巴陵命張榮寶擣其中堅解汝楫率諸翼兵左右角之世傑敗走追降之于桃花灘遂下岳州四月至沙市城不下縱火攻之沙市立破宣撫朱禎孫制置高達恐即以城降乃入江陵釋係囚放戍券軍除其徭賦及法令之繁細者傳檄郢歸峽常德澧隨辰沅靖復均房施荆門及諸洞無不降者盡奏官其所降官以兵守峽繕其戶口財賦來上帝喜大宴三日語近臣曰伯顏兵東阿里海牙以孤軍戍鄂朕甚憂之今荆南定吾東兵可無後患矣乃親作手詔褒之命右丞廉希憲守江陵促阿里海牙急還鄂且以沿江諸城新附者委之阿里海牙至鄂招潭州守臣李芾不聽乃移兵長沙拔湘陰冬十月至潭爲書射城中以示芾曰速下以活州民否則屠矣不答乃決陸水部分諸將以礮攻之破其木堡流矢中胷瘡甚督戰益急奪其城潭人復作月城以相拒凡攻七十日大小數十戰十有三年春正月芾力屈及轉運使鍾蜚英都統陳義皆自殺其將劉孝忠以城降諸將欲屠之阿里海牙曰是州生齒數百萬口若悉殺之非上諭伯顏以曹彬不殺意也其屈法生之復發倉以食饑者遣使徇郴全道桂陽永衡武岡寶慶袁韶南雄諸郡其守臣皆率其民來迎曰聞丞相體皇帝好生之德毋殺虜所過皆秋毫無犯民今復見太平各奉表來降丞相稱阿里海牙也奏官其降官皆如江陵獨宋經略使馬堅守靜江不下使總管俞全等招之皆爲所殺會宋主以國降降手詔遣湘山僧宗

魁論暨暨復殺之阿里海牙又爲書以天命地利人心開暨許以廣西大都督反覆千餘言終不聽因入朝賀平宋拜平章政事使持詔如靜江諭之十一月前兵至嚴關暨守關弗納破其兵又敗都統馬應麒於小溶江遂逼靜江錄上所賜靜江詔以示暨暨焚之斬其使靜江以水爲固乃築堰斷大陽小溶二江以遏上流決東南埭以涸其隍破其城民聞城破卽縱火焚居室多赴水死暨及其總制黃文政總管張虎以殘兵突圍走執之阿里海牙以靜江民易叛非潭比不重刑之則廣西諸州不服因悉坑之斬暨於市分遣萬戶脫溫不花徇賓融柳欽橫豈慶遠齊榮祖徇鬱林貴廉象脫鄰徇潯容藤梧皆下之特磨王儂士貴南丹州牧莫大秀皆奉表求內附奏官其降官如潭州以兵戍靜江昭賀梧豈融乃還潭旣而宋二王稱制海中雷瓊全永與潭屬縣之民文才喻周隆張虎羅飛咸起兵應之舒黃斬相繼亦起大者衆數萬小者不下數千詔命討之且略地海外阿里海牙旣定才喻等至雷州使人諭瓊州安撫趙與珞降不聽遂自航大海五百里執與珞冉安國黃之紀皆裂殺之盡定瓊南寧萬安吉陽地降八蕃羅甸蠻以

其總管文龍兒入見置宣慰司八蕃羅甸臥龍羅蕃大龍遏蠻蘆蕃小龍石蕃方蕃玳蕃程蕃並置安撫以鎮之十八年奏請徙省鄂州所定荆南淮西江西海南廣西之地凡得州五十八峒夷山獠不可勝計大率以口舌降之未嘗專事殺戮又其取民悉定從輕賦民所在立祠祀之二十三年入朝加光祿大夫

湖廣行省左丞相卒年六十贈開府儀同三司上柱國封楚國公諡武定至正八年進封江陵王子忽失海牙湖廣行中書省左丞貫只哥江西行中書省平章政事

相威

相威國王速渾察之子也性弘毅重厚不飲酒寡言笑喜延士大夫聽讀經史論古今治亂至直臣盡忠
賈將制勝必爲之掣節稱善以故臨大事決大議言必中節至元十一年世祖命相威總速渾察元統弘
吉刺等五投下兵從伐宋由正陽取安豐略廬克和攻司空山平野人原道安慶渡江東下會丞相伯顏
兵于潤州分三道並進相威率左軍參政董文炳爲副部署將校申明約束江陰華亭澈浦上海悉望風
歎附吏民按堵如故進屯鹽官伯顏已駐師臨安城下得宋幼主降表相威乃移兵瓜洲與阿朮兵合臨
揚州都統姜才以兵二萬攻楊子橋率諸將擊敗之十三年夏驛召相威秋入覲大饗賚功授金虎符征
西都元師仍賜弓矢甲鞍文錦表裏四鈔萬貫從者賞賜有差時親王海都叛命領汪總帥兵以鎮西土
十四年召拜江南諸道行臺御史大夫乃上奏曰陛下以臣爲耳目臣以監察御史按察司爲耳目倘非
其人之人之耳目先自閉塞下情何由上達帝嘉之命御史臺清其選每除目至必集幕僚御史議其可
否不協公論者卽劾去之繼陳便民一十五事其略曰併行省削冗官鈐鎮戍拘官船業流民錄故官職

饋遺淮浙鹽運司直隸行省行大司農營田司併入宣慰司理訟勿分南北公田召佃仍減其租革宋公吏勿容作弊帝皆納焉浙東盜起浙西宣慰使昔里伯縱兵肆掠俘及平民乃遣御史商瓌據錢唐津渡闊治之得釋者以數千計昔里伯遁還都奏執還揚州治其罪十六年入覲會左丞崔斌等言平章阿合馬不法事有旨命相威及知樞密院博羅自開平馳驛大都共鞠之阿合馬稱疾不出博羅欲回相威厲聲色曰奉旨按問敢回奏耶令輿疾赴對首責數事既引伏有旨釋免仍喻相威曰朕知卿不惜顏面復命還南行臺十七年有旨命相威檢覈阿里海牙忽失帖木兒等所俘三萬二千餘口並放爲民十八年左丞范文虎參政李庭以兵十萬航海征倭七晝夜至竹島與遼陽省臣兵合欲先攻太宰府遲疑不發八月朔颶風大作士卒十喪六七帝震怒復命行省左丞相塔海征之一時無敢諫者相威遣使入奏曰倭不奉職貢可伐而不可恕可緩而不可急向者師行迫期戰船不堅前車已覆後當改轍今爲之計預修戰艦訓練士卒耀兵揚武使彼聞之深自備禦遲以歲月俟其疲怠出其不意乘風疾往一舉而下萬全之策也帝意始釋遂罷其役又陳皇太子既令中書宜領撫軍監國之任選正人端士立詹事賓客諭德贊善衛翼左右所以樹國本也帝深然之十九年又奏阿里海牙占降民一千八百戶爲奴阿里海牙以爲征討所得有旨果降民也還之有司若征討所得令御史臺籍其數以聞量賜有功者阿里海牙又

自陳其功比伯顏當賜養老戶御史滕魯瞻劾之阿里海牙自辨有旨遣使赴行臺遠問相威曰爲臣敢爾欺誑耶滕御史何罪卽馳奏使者竟歸二十年以疾請入覲進譯語資治通鑑帝卽以賜東宮經筵講讀拜江淮行省左丞相二十一年啟行四月卒于蠡州年四十四敵闕帝悼惜不已子阿老瓦丁南行臺御史大夫孫脫歡集賢大學士

土土哈

土土哈其先本武平北折連川按荅罕山部族自曲出徙居西北玉里伯里山因以爲氏號其國曰欽察其地去中國三萬餘里夏夜極短日晡沒卽出曲出生唆末納唆末納生亦納思世爲欽察國主太祖征萬里乞其主火都奔欽察亦納思納之太祖遣使諭之曰汝奚匿吾負箭之麋亟以相還不然禍且及汝亦納思答曰逃鷁之雀叢薄猶能生之吾顧不如草木耶太祖乃命將討之亦納思已老國中大亂亦納思之子忽魯速蠻遣使自歸於太祖而憲宗受命帥師已扣其境忽魯速蠻之子班都察舉族迎降從征麥忒斯有功率欽察百人從世祖征大理伐宋以強勇稱嘗侍左右掌尙方馬畜歲時捫馬乳以進色清而味美號黑馬乳因目其屬曰哈刺赤土土哈班都察之子也中統元年父子從世祖北征俱以功受上賞班都察卒乃襲父職備宿衛宗王海都構亂世祖以國家根本之地命皇太子北平王率諸王鎮守之

至元十四年諸王脫脫木失烈吉叛寇抄諸部掠憲宗所御大帳以去土土哈率兵討之敗其將脫兒赤
額於納蘭不刺邀諸部以還應昌部族只兒瓦台構亂脫脫木引兵應之中途遇土土哈將戰先獲其候
騎數十脫脫木乃引去遂滅只兒瓦台追脫脫木等至禿兀刺河三宿而後返尋復敗之於斡歡河奪回
所掠大帳還諸部之衆於北平十五年大軍北征詔率欽察驍騎千人以從追失烈吉踰金山擒扎忽台
等以獻又敗寬折哥等裹瘡力戰獲羊馬輜重甚衆還朝帝召至榻前親慰勞之賜金銀酒器及銀百兩
金幣九歲時預宴只孫冠服全海東白鶻一仍賜以奪回所掠大帳而諭之曰祖宗武帳非人臣所得御
以卿能歸之故以授卿嘗有旨欽察人爲民及隸諸王者皆別籍之以隸土土哈戶給鈔二千貫歲賜粟
帛選其材勇以備禁衛十九年授昭勇大將軍同知太僕院事二十年改同知衛尉院事兼領羣牧司請
以所部哈刺赤屯田畿內詔給霸州文安縣田四百頃益以宋新附軍人八百俾領其事二十一年賜金
虎符并賜金貂裘帽玉帶各一海東青鶻一水磴壹區近郊田二千畝籍河東諸路蒙古軍子弟四千六
百人隸其麾下二十二年拜鎮國上將軍樞密院副使二十三年置欽察親軍衛遂兼都指揮使聽以宗
族將吏備官屬海都兵犯金山詔與大將朶兒朶懷共禦之二十四年宗王乃顏叛陰遣使來結也不干
勝刺哈爲土土哈所執盡得其情以聞勝刺哈設宴邀二大將朶兒朶懷將往土土哈以爲事不可測遂

止勝刺哈計不得行未幾有旨令勝刺哈入朝將由東道進土土哈言於北安王曰彼分地在東脫有不虞是縱虎入山林也乃命從西道進旣而有言也不干叛者衆欲先聞於朝然後發兵土土哈曰兵貴神速若彼果叛我軍出其不意可卽圖之否則與約而還卽日啟行疾驅七晝夜渡禿兀刺河戰于孛怯嶺大敗之也不干僅以身免世祖時親征乃顏聞之遣使命土土哈收其餘黨沿河而下遇叛王鐵哥軍萬騎擊走之獲馬甚衆并擒叛王哈兒魯等獻俘行在所誅之欽察康里之屬自叛所來歸者卽以付土土哈置哈刺魯萬戶府欽察之散處安西諸王部下者悉令統之時成宗以皇孫撫軍於北詔以土土哈從追乃顏餘黨於哈刺温誅叛王兀塔海盡降其衆二十五年諸王也只里爲叛王火魯哈孫所攻遣使告急復從皇孫移師援之敗諸兀魯灰還至哈刺温山夜渡貴烈河敗叛王哈丹盡得遼左諸部置東路萬戶府世祖多其功以也只里女弟塔倫妻之二十六年從皇孫晉王征海都抵杭海嶺敵先據險諸軍失利惟土土哈以其軍直前鏖戰翼晉王而出追騎大至乃選精銳設伏以待之寇不敢逼秋七月世祖巡幸北邊召見慰諭之曰昔太祖與其臣同患難者飲班朮河之水以記功今日之事何愧昔人卿其勉之還至京師大宴羣臣復謂土土哈曰朔方人來聞海都言杭海之役使彼邊將皆如土土哈吾屬安所置哉論功行賞帝欲先欽察之士土土哈言慶賞之典蒙古將吏宜先之帝曰爾毋飾讓蒙古人誠居汝右

力戰豈在汝右耶。召諸將頒賞有差。初世祖既取宋，命籍建康廬饒租戶千爲哈刺赤戶，益以俘獲千七百戶，賜土土哈仍官一子，以督其賦。二十八年，土土哈奏哈刺赤軍以萬數，足以備用。詔賜珠帽、珠衣、金帶、玉帶、海東青鶻各一，復賜其部曲毳衣、繡素萬匹。於是率哈刺赤萬人北獵於漢塔海邊，寇聞之皆引去。二十九年，秋，略地金山，獲海都之戶三千餘，還至和林，有詔進取乞里吉思。三十年，春，師次欠河水，行數日，始至其境，盡收其五部之衆屯兵守之。奏功加龍虎衛上將軍，仍給行樞密院印。海都聞取乞里吉思，引兵至欠河，復敗之，擒其將孛羅察。三十一年，成宗卽位，詔以邊境事重，其免會朝，遣使就賜銀五百兩、七寶金壺、盤盂各一鈔萬貫、白氈帳一、獨峯駝五、冬召至京師，賞賚有加，別賜其麾下土鈔千二百萬貫。元貞元年春，仍出守北邊。二年秋，諸王附海都者率衆來歸，邊民驚擾，身至玉龍罕界饋餉安集之。諸王岳木忽等入朝，帝解御衣以賜，又賜金五十兩、銀千五百兩、鈔五萬貫、輜輿各一。大德元年正月，拜銀青光祿大夫、上柱國、同知樞密院事、欽察親軍都指揮使，奉命還北邊。二月，至宣德府卒。年六十一。贈金紫光祿大夫、司空，追封延國公，諡武毅。後加封昇王子八人，其第三子曰牀兀兒。

牀兀兒初以大臣子，奉詔從太師月兒魯行軍，戰於百搭山，有功，拜昭勇大將軍、左衛親軍都指揮使。大德元年，襲父職，領征北諸軍，帥師躡金山，攻八隣之地，八隣之南有蒼魯忽河，其將帖良臺阻水而軍，伐

木柵岸以自庇土皆下馬跪坐持弓矢以待我軍矢不能及馬不能進牀兀兒命吹銅角舉軍大呼聲震林野其衆不知所爲爭起就馬於是磨師畢渡湧水拍岸木柵漂散因奮師馳擊追奔五十里盡得其人馬廬帳還次阿雷河與海都所遣援八隣之將孛伯軍過河之上有高山孛伯陣於山上馬不利下馳牀兀兒磨軍渡河感之其馬多顛躓急擊敗之追奔三十餘里孛伯僅以身免二年北邊諸王都哇徹徹禿等潛師襲火兒哈禿之地其地亦有山甚高敵兵據之牀兀兒選勇而善步者持挺刃四面上奮擊盡覆其軍三年入朝成宗親解御衣賜之慰勞優渥拜鎮國上將軍僉樞密院事欽察親軍都指揮使太僕少卿復還邊是時武宗在潛邸領軍朔方軍事必諮於牀兀兒及戰牀兀兒嘗爲先四年秋叛王禿麥幹魯思等犯邊牀兀兒迎敵於闊客之地及其未陣直前薄之敵不敢支追之踰金山乃還五年海都兵越金山而南止於鐵堅古山因高以自保牀兀兒急引兵敗之復與都哇相持于兀兒禿之地牀兀兒以精銳馳其陣左右奮擊所殺不可勝計都哇之兵幾盡武宗親視其戰乃嘆曰何其壯耶力戰未有如此者事聞詔遣御史大夫禿只等卽赤訥思之地集諸王軍將問戰勝功狀咸稱牀兀兒功第一武宗旣命尙雅思禿楚王公主察吉兒及使者以功簿奏帝復出御衣遣使臨賜之七年秋入朝帝親諭之曰卿鎮北邊累建大功雖以黃金周飾卿身猶不足以盡朕意賜以衣帽金珠等物甚厚拜驃騎衛上將軍樞密院副

先不花等軍于亦忒海迷失之地遣使入報賜以尙服二年敗也不花所遣將也不干忽都帖木兒于赤
麥于之地追出其境至鐵門關遇其大軍於扎亦兒之地又敗之四年帝念其功而憫其老召入商議中
書省事知樞密院事大理國進象牙金飾轎卽以賜之每見必賜坐每食必賜食待以宗室親王之禮牀
兀兒常曰老臣受朝廷之賜厚矣吾子孫當以死報國至治二年卒年六十三後累封揚王子六人燕帖
木兒蒼刺罕太師右丞相太平王撒敦左丞相蒼里襲封句容郡王

元史卷一百二十八

元史卷一百二十八考證

阿朮傳守將呂文煥懼而出降○臣宗楷按世祖紀及阿里海牙傳俱作十年事

土土哈傳因目其屬曰哈刺赤○臣祖庚按哈刺猶言黑也

牀兀兒傳至大二年入朝加封句容郡王○臣祖庚按武宗紀作至大三年正月事仁宗紀作延祐三年

六月與此互異

元史卷一百二十八考證

明翰林學士亞中大夫知制誥兼修國史宋 濂等修

列傳第十六

來阿八赤

來阿八赤盩夏人父朮速忽里歸太祖選居宿衛繼命掌膳事憲宗卽位大舉伐宋攻釣魚山命諸將議進取之計朮速忽里言於帝曰川蜀之地三分我有其二所未附者巴江以下數十州而已地削勢弱兵糧皆仰給東南故死守以抗我師蜀地巖險重慶合州又其藩屏皆新築之城依險爲固今頓兵堅城之下未見其利曷若城二城之間選銳卒五萬命宿將守之與成都舊兵相出入不時擾之以牽制其援師然後我師乘新集之銳用降人爲鄉導水陸東下破忠涪萬夔諸小郡平其城俘其民俟冬水涸盟唐三峽不日可下出荆楚與鄂州渡江諸軍合勢如此則東南之事一舉可定其上流重慶合州孤危無援不降卽走矣諸將曰攻城則功在頃刻反以其言爲迂卒不用於是博選宿衛中材力可任用者以阿八赤奉命往監元帥紐鄰軍遏宋人援兵駐重慶下流之銅羅峽夾江據崖爲壘宋都統甘順自夔州泝流西上乘舟來攻阿八赤預積薪於二壘明火鼓譟矢石如雨順流而進宋人力戰不能支退保西岸斂兵自

固黎明復至阿八赤身率精兵緣厓而下戰艦復進宋人敗走殺傷數千人帝聞而壯之賜銀二錠憲宗崩阿八赤從父倍道歸燕世祖卽位問以川蜀之事阿八赤歷陳始末誦其父前所言以對世祖撫掌曰當時若從此策東南其足平乎朕在鄂渚日望上流之聲勢耳至元七年南征襄樊發河南北器械糧儲悉聚于淮西之義陽慮宋人剽掠命阿八赤督運二日而畢旣還世祖大悅以銀一錠賜之十四年立尙膳院授中順大夫同知尙膳院事十八年佩三珠虎符授通奉大夫益都等路宣慰使都元帥發兵萬人開運河阿八赤往來督視寒暑不輟有兩卒自傷其手以示不可用阿八赤檄樞密并行省奏聞斬之以懲不律運河旣開遷膠萊海道漕運使二十一年調同僉宣徽院事遼左不寧復降虎符授征東招討使阿八赤招徠降附期以自新遠近帖然二十二年授征東宣慰使都元帥皇子鎮南王征交趾授湖廣等處行中書省右丞召見世祖親解衣衣之并金玉束帶及弓矢甲冑賜焉二十四年改湖廣等處行尙書省右丞詔四省所發士馬俾阿八赤閱視九月領中衛親軍千人翊導皇子至思明州賊阻險拒守於是選精銳與賊戰子女兒關斬馘萬計餘兵棄關走於是大軍深入進至交州諫日烜空其城而遁阿八赤曰賊棄巢穴而匿山海者意待吾之敝而乘之耳將士多北人春夏之交瘴癘作賊弗就擒吾不能持久矣今出兵分定其地招降納附勿縱士卒侵掠急捕日烜此策之善者也時日烜屢遣使約降欲以賂緩

我師諸將皆信其說且修城以居而待其至久之軍乏食日烜不降擁眾據竹洞安邦海口阿八赤率兵往攻之屢與賊遇晝夜迎戰賊兵敗遁會將士多疫不能進而諸蠻復叛所得關阨皆失守乃議班師還諸軍步騎命先啟行且戰且行日數十合賊據高險射毒矢將士裹瘡以戰諸軍護皇子出賊境阿八赤中毒矢三首頂股皆腫遂卒子寄僧爲水達達屯田總管府達魯花赤乃顏叛戰于高麗雙城調萬安軍達魯花赤平黎蠻有功遷雷州路總管卒孫完者不花同知潮州路總管府事次禿滿不花也先不花太不花

紐璘也速合兒附

紐璘珊竹帶人祖孛羅帶爲太祖宿衛從太宗平金成河南父太蒼兒佐憲宗征阿速欽察等國有功拜都元帥歲壬子率陝西西海鞏昌諸軍攻宋入蜀癸丑與總帥汪田哥立利州甲寅攻碭門黎雅等城乙卯入重慶獲都統制張實是歲卒紐璘偉貌長身勇力絕人且多謀略常從父軍中丁巳歲憲宗命將兵萬人略地自利州下白水過大獲山出梁山軍直抵夔門戊午還釣魚山引軍欲會都元帥阿蒼胡等於成都宋制置使蒲擇之遣安撫劉整都統制段元鑑等率眾據遂寧江箭灘渡以斷東路紐璘軍至不能渡自旦至暮大戰斬首二千七百餘級遂長驅至成都帝聞賜金帛勞之蒲擇之命楊大淵等守劍門及

靈泉山自將四川兵取成都會阿荅胡死諸王阿卜干與諸將脫林帶等謀曰今宋兵日逼聞我帥死必
悉衆來攻其鋒不可當我軍去朝廷遠待上命建大帥然後禦敵恐無及已不若推紐璘爲長以號令諸
將出彼不意敵可必破衆然之遂推紐璘爲長紐璘率諸將大破宋軍于靈泉山乘勝追擒韓勇斬之補
擇之兵潰進圍雲頂山城扼宋軍歸路其主將倉卒失計遂以其衆降城中食盡亦殺其守將以降成都
彭漢懷綿等州悉平威茂諸蕃亦來附紐璘奉金銀竹箭銀銷刀遣速哥入獻帝賜黃金五十兩卽軍中
眞拜都元帥時紐璘軍止二萬以五千命拜延八都魯等守成都自將萬五千人從馬湖趨重慶冬帝進
軍至大獲山紐璘率步騎號五萬戰船二百艘發成都遣張威以五百人爲前鋒水陸並進謀鎖重慶江
以絕吳蜀之路縛橋資州之口以濟師千戶暗都刺率舟師而下紐璘將步騎而南旌旗輜重百里不絕
鼓譟渡瀘放舟而東蒲擇之以兵分道要遮遇輒敗之紐璘至涪造浮橋駐軍橋南北以杜宋援兵聞大
軍多瘧癘遣人進牛犬豕各萬頭明年春朝行在所還討思播二州獲其將一人宋將呂文煥攻涪浮橋
時新立成都士馬不耐其水土多病死紐璘憂之密旨督戰不得已出師大敗文煥軍獲其將二人斬之
遂班師文煥以兵襲其後紐璘戰却之中統元年世祖卽位紐璘入朝賜虎符及黃金五十兩白金二千
五百兩馬二匹紐璘遣梁載立招降黎雅硯門巖州偏林關諸蠻得漢番二萬餘戶未幾詔速哥分西川

兵及陝西諸軍屬紐璘鎮秦鞏唐兀之地三年宋將劉整以瀘州降呂文煥圖之詔以兵往援文煥敗走遂徙瀘州民於成都潼川四年爲劉整所譖徵至上都驗問無狀詔釋之還至昌平卒子也速蒼兒也速蒼兒勇智類其父至元十一年入見世祖以屬行樞密院火都赤使習兵事從圍嘉定以三千人至三龜九頂山相地形勢敗宋安撫魯萬壽兵斬首五百級以功賜虎符授大翼遙魯花赤魯萬壽尋遣部將李立以嘉定三龜九頂紫雲諸城皆降又從行樞密副使忽敦率兵徇下流諸城皆望風來附忽敦以兵二萬會東川行樞密院合荅圍重慶歲餘不下帝命行樞密副使不花代將不花將兵萬餘至城下也速蒼兒率二十餘騎攻其門宋都統趙安出戰也速蒼兒三入其軍再挾猛士以出大兵四集斬首五百餘級趙安開門降制置使張珏遁追至涪州擒之捷聞帝賜玉帶鈔五千貫授西川蒙古軍馬大翼新附軍招討使遷四川西道宣慰使加都元帥羅氏鬼國亦奚不薛叛詔以四川兵會雲南江南兵討之至會靈關亦奚不薛遣先鋒阿麻阿豆等將數萬衆迎敵也速蒼兒馳入其軍挾阿麻阿豆出斬之亦奚不薛懼率所部五萬餘戶降以功拜西川等處行中書省右丞加賜金帛鞍轡西南夷雄左都掌蠻得關右叛詔以兵討降之改四川等處行樞密副使冬烏蒙蠻陰連都掌蠻以叛詔以兵會雲南行院拜蒼力進討也速蒼兒擒烏蒙蠻帝賜玉帶織金服遷蒙古軍都萬戶復賜銀鼠裘鎮唐兀之地進同知四川等處行樞密

院事仍居鎮成宗卽位拜四川等處行中書省平章政事武宗時由四川遷雲南加左丞相仍爲平章政事南征叛蠻感瘴毒還至成都卒弟八剌襲爲蒙古軍萬戶八剌卒次子拜延襲拜四川行省左丞長子南加台官至四川行省平章政事

阿剌罕

阿剌罕札刺兒氏祖撥徹事太祖爲火而赤又爲博而赤攻城掠地數有戰功太宗卽位仍以其職從征隴北陝西身先戰士死焉父也柳干幼隸皇子岳里吉爲衛士長歲乙未從皇子闊出忽都禿南征累功授萬戶遷天下馬步禁軍都元帥及大將察罕卒也柳干領其職拜諸翼軍馬都元帥統大軍攻淮東西諸郡戊午戰死揚州阿剌罕襲爲諸翼蒙古軍馬都元帥己未從世祖渡江至鄂而還世祖卽位從至末黎伯顏罕刺宗王阿里不哥稱兵內向阿剌罕以所部軍擊破阿監帶兒渾都海之兵於昔門禿追至河西以功賜金五十兩中統三年李璫叛據濟南大軍討之阿剌罕與璫戰於老倉口敗之璫伏誅授都元帥賜金虎符銀印四年春改上萬戶從都元帥阿朮伐宋九月師次襄陽西安陽灘逆戰宋兵敗之五年大軍圍襄樊阿剌罕守南面百丈山漫河灘兵累交宋不能師十年春樊城破襄陽降十一年秋丞相伯顏與阿朮會師襄陽遣阿剌罕率諸翼軍攻郢復諸州十月奪郢州南門堡丞相伯顏阿朮親率騎兵行

福漢陽城巖欲取漢口渡江宋人以精兵扼漢口乃遣阿剌罕帥蒙古騎兵倍道兼行擊破沙燕堡遂入江取鄂州阿剌罕同斷事官楊仁風東略壽昌得米四十萬斛遂統左翼軍順流東下沿江州郡悉降乃撫輯其人民十二年六月加昭毅大將軍蒙古漢軍上萬戶屯駐建康丞相伯顏受詔赴闕以阿剌罕留治省事拜中奉大夫參知政事丞相伯顏還軍中分軍爲三道並進阿剌罕由西道趁溧水溧陽攻破銀樹東壩至護牙山慶豐坊敗宋軍斬首七千級又擒其將祝堯并裨校七十二人斬首三千級又與宋兵戰斬首七千級逐其援兵退走數十里又敗其都統等三人斬首三千級破建平縣殺其守吏進攻廣德軍獨松關先是宋廣德守張濡殺國信使廉希賢嚴忠範等于獨松關及阿剌罕軍次安吉州上栢鎮濡率兵來拒戰大敗之斬首二千級生擒其副將馮翼戮於軍前濡遁走追斬之十三年春宋以國降詔阿剌罕同左丞董文炳率高興等攻浙東温台衢婺處明越及閩中諸郡降其運使提刑等五百人追襲宋嗣秀王趙與擇至安福縣與擇以軍三萬來拒戰阿剌罕身先士卒率高興撒里蠻等渡江鏖戰四十餘里斬其步帥觀察使李世達生擒與擇及其將吏百八十人悉斬之獲其銅印五軍資器仗無算泉州蒲壽庚降江南平以參知政事佩金虎符行江東宣慰使十四年入覲進資善大夫行中書省左丞俄遷右丞仍宣慰江東十八年召拜光祿大夫中書左丞相行中書省事統蒙古軍四十萬征日本行次慶元卒

于軍中子拜降襲累遷江浙行中書省平章政事仍領本軍萬戶拜降卒弟也速迭兒襲由左手蒙古軍萬戶累遷河南江北行省平章政事兼山東河北蒙古軍大都督

阿塔海

阿塔海遜都思人祖塔海拔都兒驍勇善戰嘗從太祖同飲黑河水以功爲千戶父下花襲職卒阿塔海魁偉有大度才略過人既襲千戶從大帥兀良合歹征雲南身先行陣師還事世祖于潛邸至元九年命馳驛督諸軍攻襄陽襄陽下第功授鎮國上將軍淮西行樞密院副使築正陽東西城五月霖雨宋將夏貴乘淮水溢來爭正陽阿塔海率衆禦之貴走追至安豐城下而還拜中書右丞行樞密院事渡江與丞相伯顏軍合克池州十二月師次建康宋鎮江攝守石祖忠遣使乞降揚州守將李庭芝聞之遣兵突圍出擊阿塔海率師救之宋兵望風退走時真泰諸城尙爲宋守鎮江地扼襟喉城壁不固阿塔海乃立木柵以保障居民又分兵屯瓜洲以絕揚州之援宋將張世傑孫虎臣帥舟師陳于江中焦山下其勢甚張阿塔海與平章阿朮登南岸督諸軍大破之宋殿帥張彥與平江都統劉師勇襲呂城遣萬戶懷都擊之斬彥十月併行樞密院于行中書省仍以阿塔海爲右丞克常州降平江嘉興十二年正月會兵臨安宋降以其幼主母后入覲詔復趨瓜洲與阿朮議淮南事宜淮南平詳見伯顏阿朮傳十四年授榮祿大夫

平章政事行中書省事十五年二月召赴闕拜光祿大夫行中書省左丞相移治臨安二十年遷征東行
省丞相征日本遇風舟壞喪師十七八二十二年行同知沿江樞密院事二十三年行江西中書省事入
朝二十四年扈從征乃顏師還奉朝請居京師二十六年十二月卒年五十六贈推忠翊運宣力功臣開
府儀同三司太師上柱國追封順昌郡王諡武敏子阿里麻江淮行樞密副使累官至江南諸道行御史
臺御史大夫卒

唆都 伯家奴

唆都扎刺兒氏驍勇善戰入宿衛從征花馬國有功李壇叛山東從諸王哈必赤平之還言于朝曰郡縣
惡少年多從間道鬻馬于宋境乞免其罪籍爲兵從之得兵三千人以千人隸唆都爲千戶命守蔡州至
元五年阿朮等兵圍襄陽命唆都出巡邏奪宋金剛臺寨管基窩青澗寨大洪山歸州洞諸隘嘗猝遇宋
兵千餘持羈勒欲竊馬唆都戰敗之斬首三百級六年宋將范文虎率舟師駐灌子灘丞相史天澤命唆
都拒却之隄總管分東平卒八百隸之九年攻樊城唆都先登城遂破襄陽降再與卒五千賜弓矢襲衣
金鞍白金等物入見陞郢復等處招討使十一年移戍郢州之高港敗宋師斬首三百級獲裨校九人從
大軍濟江鄂漢降十二年建康降叅政塔出命唆都入城招集改建康安撫使攻平江嘉興皆下之帥舟

師會伯顏于阜亭山宋平詔伯顏以宋主入朝留參政董文炳守臨安令其自擇可副者文炳請留唆都從之時衢婺諸州皆復起兵文炳謂唆都曰嚴州不守臨安必危公往鎮之至嚴方十日衢婺徽連兵來攻唆都戰却之獲章知府等二十二人復婺州敗宋將陳路鈐于梅嶺下斬首三千級又復龍游縣攻衢州衢守備甚嚴唆都親率諸軍鼓譟登城拔之宋丞相留夢炎降攻處州斬首七百級又攻建寧府松溪縣懷安縣皆下之十四年陞福建道宣慰使行征南元帥府事聽參政塔出節制塔出令唆都取道泉州泛海會于廣州之富場將行信州守臣來求援曰元帥不來信不可守今邵武方聚兵觀釁元帥且往邵武兵夕至矣唆都告于衆曰若邵武不下則腹背受敵豈獨信不可守乎乃遣周萬戶等往招降之唆都趨建寧遇宋兵于崇安軍容甚盛令其子百家奴及楊庭璧等數隊夾擊之范萬戶以三百人伏祝公橋移刺者以四百人伏北門外庭璧陷陣深入宋兵敗走伏兵起邀擊之斬首千餘級宋丞相文天祥南劍州都督張清合兵將襲建寧唆都夜設伏敗之轉戰至南劍敗張清奪其城至福州王積翁以城降攻興化軍知軍陳曠乞降復閉城拒守唆都臨城諭之矢石雨下乃造雲梯砲石攻破其城巷戰終日斬首三萬餘級獲曠支解以徇至漳州漳州亦拒守先遣百家奴往會塔出留攻之斬首數千級知府何清降攻潮州知府馬發不降唆都恐失富場之期乃舍之而去十五年至廣州塔出令還攻潮發城守益備唆都

塞壘填壕造雲梯鵝車日夜急攻發潛遣人焚之二十餘日不能下唆都令于衆曰有能先登者拜爵已
官者增秩總管兀良哈耳先登諸將繼之戰至夕宋兵潰潮州平進參知政事行省福州徵入見帝以江
南既定將有事于海外陞左丞行省泉州招諭南夷諸國十八年改右丞行省占城十九年率戰船千艘
出廣州浮海伐占城占城迎戰兵號二十萬唆都率敢死士擊之斬首并溺死者五萬餘人又敗之于大
浪湖斬首六萬級占城降唆都造木爲城闢田以耕伐烏里越里諸小夷皆下之積穀十五萬以給軍二
十一年鎮南王脫歡征交趾詔唆都帥師來會敗交趾兵于清化府奪義安關降其臣彰憲昭顯脫歡命
唆都屯天長以就食與大營相距二百餘里俄有旨班師脫歡引兵還唆都不知也交趾使人告之弗信
及至大營則塞矣交趾遮之于乾滿江唆都戰死事聞贈榮祿大夫諡襄愍子百家奴

百家奴至元五年從元帥阿朮攻襄陽築新城數立功七年以質子從郡王合達敗宋兵於灌子灘八年
夏四月宋殿帥范文虎等督促糧運輸之襄陽晝夜不絕百家奴乘戰船順流至鹿門山欲塞宋糧道出
擊范文虎軍累獲戰功於是河南行省命爲管軍總把後隸丞相伯顏麾下擢爲知印從攻鄂州宋都統
趙五帥諸軍來迎戰百家奴深入却敵身被數創攻沙洋立雲梯於東角樓登城力戰破之奪其旗幟弓
矢衣甲攻新城先登拔之宋將王安撫棄城宵遁伯顏以百家奴前後戰功上聞世祖大悅曰此人之名

朕心不忘兵燹時大用之朕不食言也今且以良家女及銀椀一賜之以爲左驗從圍漢陽自沙武口與船入江宋制置夏貴來迎戰百家奴與暗荅孫突入敵陳擊之宋兵奔潰遂登江南岸獲其戰船器甲甚多鏖戰至黃州會日暮追擊夏貴至白虎山夜分乃還未幾復攻破金牛埧十二年春正月與千戶薛赤千取雞籠洞還至瑞昌縣遇夏貴潰兵復擊敗之是時宋遣兵救瑞昌未至而縣已下矣復擊宋救兵得宋所執北兵五人來歸圍江州宋安撫呂師夔以城降東池州擊宋平章賈似道及孫虎臣于丁家洲追逐百里餘奪戰船五艘及旗幟器甲擒宋統制王文虎因定黃池略地宣州百家奴爲前鋒與敵兵戰喃呢湖敗之奪其戰船三百艘太平州亦望風歛附其父唆都因說下建康於是伯顏令謁只里論諸將功遂賞百家奴銀二錠以旌之仍命爲管軍總把俄從伯顏入朝加進義校尉賜銀符爲管軍總把攻丹陽呂城破常州皆有功至蘇州宋守臣王安撫以城降秀州湖州皆不煩兵而下諸軍乘勝直趨臨安宋主出降十三年領新附軍守鎮江未幾復從平章博魯歡攻泰壽二州中創遂罷攻後數日與萬戶葉了虔將兵攻泰州新城而家奴力疾先登破之復被兩創已而從阿朮攻下揚州諸郡得宋制置李庭芝都統姜才以功陞武略將軍賜金符爲管軍總管鎮高郵白馬湖是時行省以百家奴襲父唆都郢復州招討使建康宣撫使仍領本翼軍頃之徇地福建行定衢婺信等州城邑至新安縣擊斬宋趙監軍詹知縣

擒江通判道與會軍遇疾戰敗之鼓行而東沈安撫以建寧府降攻陷南劍州張清聶文慶遁去閩清懷安二縣傳檄而定至福州諭以威德王安撫率衆出降攻破興化擒陳安撫及白牒都統別擊東華鄉張世傑軍于泉州俄領諸軍乘戰船入海追逐張世傑于惠州甲子門進至同安縣苔關寨瀕海縣鎮悉招諭下之白望丹王虎陳以戰船三千餘艘來降冬十二月宋二王遣倪宙奉表詣軍門降遂進兵至廣州諸郡縣以次降附明年春正月振旅而還復攻下德勝等寨至蒲仙江聶文慶復敗走攻潮州破之誅馬發等數人廣東遂平三月引宙奉降表來朝未至授昭勇大將軍賜虎符管軍萬戶七月遂朝于上都陞鎮國上將軍海外諸蕃宣慰使兼福建道市舶提舉仍領本翼軍守福建俄兼福建道長司宣慰使都元帥是時福建多水災百家奴出私錢市米以賑貧民全活者甚衆十七年朝京師加正奉大夫宣慰使都元帥二十二年從父唆都征交趾唆都力戰死之百家奴遂與脫懽引兵薄交趾境水陸轉戰輒有功二十五年驛召至南京宣慰司命括五路民馬二十七年除建康路總管武宗卽位遷鎮江路總管至大四年金瘡發卒于家

李恆

李恆字德卿其先姓於彌氏唐末賜姓李世爲西夏國主太祖經略河西有守兀納刺城者夏主之子也

城陷不屈而死子惟忠方七歲求從父死主將異之執以獻宗王合撒兒王留養之及嗣王移相哥立惟忠從經略中原有功淄川王分地以惟忠爲達魯花赤佩金符惟忠生恆恆生有異質王妃撫之猶己子中統三年命恆爲尙書斷事官恆以讓其兄李璫反漣海恆從其父棄家入告璫怒繫恆閹門獄中璫誅得出世祖嘉其功授淄萊路奧魯總管佩金符併償其所失家資至元七年改宣武將軍益都淄萊新軍萬戶從伐宋襄陽守將呂文煥時出拒敵殿帥范文虎復援之恆率本軍築堡萬山扼城西絕其陸路文煥等又以漁舟渡漢水窺伺軍形恆設伏敗之水路亦絕遂進攻樊城十年春恆以精兵渡漢自南面先登樊城破襄陽亦降捷聞帝賜以寶刀遷明威將軍佩金虎符十一年丞相伯顏大會師襄陽進至鄧州宋以舟師截漢水伯顏由唐港入漢捨郢而進攻沙洋新城留恆爲後拒敗其追兵至陽羅堡宋制置夏貴遣其子松來逆戰恆先陷陣額中流矢伯顏止之恆戰益力卒射松殺之諸軍渡江恆與宋兵戰自寅至申夏貴敗走鄂州漢陽俱下以功遷宣威將軍賜白金五百兩遂從伯顏東下十二年春宋將高世傑復窺漢沔乃遣恆還守鄂州時豪民聚衆侵江陵省命恆往討之恆斂兵不動但諭使出降得生口十餘萬悉縱爲民仍禁軍毋得虜掠饋獻充積一無所受十二年從右丞阿里海牙至洞庭擒高世傑下岳州進攻沙市拔之宋制置高達以江陵降留恆鎮守傳檄歸峽辰沅靖澧常德諸州皆下未幾徙鎮常德

以扼湖南之衝俄有詔分三道出師以恆爲左副都元帥從都元帥遜都台出江西九月開府于汀州師次建昌縣擒都統熊飛遂圍隆興轉運使劉槃請降恆察其詐密爲之備槃果以銳兵突至恆擊敗之殺獲殆盡槃乃降下撫瑞建昌臨江軍中有得宋相文天祥與建昌故吏民書恆焚之人心乃安進攻吉州知州周天驥降遂定贛南安廣東經略徐直諒奉蠟書納其所部十四郡前江西制置黃萬石亦以邵武降隆興帥府誣富民與敵連已誅百三十家恆還審其非罪盡釋之宋丞相陳宜中及其大將張世傑立益王昞於閩中郡縣豪傑爭起兵應之恆遣將破吳浚兵於南豐世傑遣都統張文虎與浚合兵十萬期必復建昌恆復遣將敗之堯港浚走從文天祥於瑞金又破之天祥走汀州遣鎮撫孔遵追之併破趙孟潛軍取汀州元帥府罷授昭勇大將軍同知江西宣慰司事加鎮國上將軍遷福建宣慰使改江西宣慰使天祥復取汀州兵出興國縣連破諸邑圍贛州尤急或言天祥墳墓在吉州者若遣兵發之則必下矣恆曰王師討不服耳豈有發人墳墓之理乃分兵援贛自率精兵潛至興國天祥走追至空坑獲其妻女擒招討使趙時賞已下二十餘人降其衆二十萬有旨令與右丞阿里罕左丞董文炳合兵追益王衆議所向皆謂宜趨福建恆曰不可若諸軍俱在福建彼必竄廣東則梅嶺江西非我有矣宜從廣東夾攻之衆以爲然兵至梅嶺果與宋兵遇出其不意敗之乃遁走弼州十四年拜參知政事行省江西十五年益

王殂其樞密張世傑陸秀夫等復立衛王昺守廣東諸郡詔以恆爲蒙古漢軍都元帥經略之恆進兵取英德府清遠縣敗其制置凌震運使王道夫遂入廣州世傑等移屯崖山時都元帥張弘範舟師未至恆按兵不動分遣諸將略定梅循諸州凌震等復抵廣州恆擊敗之皆棄舟走赴水死奪其船三百艘擒將吏宋邁以下二百餘人又破其餘軍於菱塘越十六年二月弘範至自漳州直指崖山恆率所部赴之張世傑集海艦千餘艘貫以巨索爲柵以自固恆遣斷其汲路其勢日迫諭降不可乃陣於船尾由北面逆行擣其柵索絕世傑猶死戰自朝至晡弘範督南面諸軍合擊大敗之陸秀夫先沉妻子于海乃抱衛王赴海死從死者十餘萬人獲其金璽後宮及文武之臣其大將翟國秀凌震等皆解甲降焚溺之餘尙得八百餘艘是日黑氣如霧有乘舟南遁者恆以爲衛王追至高化詢之降人始知衛王已死遁者乃世傑也世傑繼亦溺死於海陵藩嶺海悉平功成入覲帝賞勞甚厚將士預賜宴者二百餘人十七年拜資善大夫中書左丞行省荆湖掠民爲奴婢者禁之常德澧辰沅靖五郡之饑者賑之獄戶之籍於官者奏請一千戶之外悉放散之十九年乞解軍職乃命其長子同知江西宣慰司事散木鯁襲爲本軍萬戶占城之役恆奉旨給其糧餉器械海艦百艘久留瘴鄉冒疾而還俄有詔命恆從皇子鎮南王征交趾結筏渡海奪天長府交趾遂空其國航海而遁恆封其宮庭府庫追襲於海洋敗之得船二百艘幾獲其世子會

盛夏軍中疾作霖潦暴漲浸灌營地識者謂交趾且降請班師恆弗能奪遂還蠻兵追敗後軍王乃改命恆殿後且戰且行毒矢貫恆膝一卒負恆而趨至思州毒發卒年五十後贈銀青榮祿大夫平章政事謚武愨再贈推忠靖遠功臣太保儀同三司追封滕國公子散木鯁江西行省平章政事遷加眞益都淄萊萬戶遜都台同知湖南宣慰使司事孫薛徹干兵部侍郎薛徹充益都般陽萬戶

元史卷一百二十九考證

紐璘傳西南夷雄左都掌蠻得蘭右叛○

臣祖庚

按紀左作挫右作紐

元史卷一百二十九考證

明翰林學士亞中大夫知制誥兼修國史宋 濂等修

列傳第十七

徹里

徹里燕只吉台氏曾祖太赤爲馬步軍都元帥從太祖定中原以功封徐邳二州因家於徐徹里幼孤母蒲察氏教以讀書至元十八年世祖召見應對詳雅悅之俾常侍左右民間事時有所咨訪從征東北邊遠因晉大軍所過民不勝煩擾寒餓且死宜加賑給帝從之乃賜邊民穀帛牛馬有差賴以存活者衆權利用監二十三年奉使江南省風俗訪遺逸時行省理財方急責所在學田以價輸官徹里曰學田所以供祭禮育人才也安可鬻遽止之還朝以聞帝嘉納焉二十四年分中書爲尙書省桑哥爲相引用黨與鉤考天下錢糧凡昔權臣阿合馬積年負逋舉以中書失徵奏誅二參政行省乘風督責尤峻主無所償則責及親戚或逮繫隣黨械禁榜掠民不勝其苦自裁及死獄者以百數中外騷動廷臣顧忌皆莫敢言徹里乃於帝前具陳桑哥姦貪誤國害民狀辭語激烈帝怒謂其毀謗大臣失禮體命左右批其頰徹里辯愈力且曰臣與桑哥無讎所以力數其罪而不顧身者正爲國家計耳苟畏聖怒而不復言則奸臣何

由而除民害何由而息且使陛下有拒諫之名臣竊懼焉於是帝大悟卽命帥羽林三百人往籍其家得珍寶如內藏之半桑哥既誅諸枉繫者始得釋復奉旨往江南籍桑哥姻黨江浙省臣烏馬兒蔑列忻都王濟湖廣省臣要束木等皆棄市天下大快之徹里往來凡四道徐皆過門不入進拜御史中丞俄陞福建行省平章政事賜黃金五十兩白金五千兩汀漳劇盜歐狗久不平遂引兵征之號令嚴肅所過秋毫無犯有降者則勞以酒食而慰遣之曰吾意汝豈反者耶良由官吏汙暴所致今既來歸卽爲平民吾安忍罪汝其返汝耕桑安汝田里毋恐他柵聞之悉款附未幾歐狗爲其黨縛致于軍梟首以徇脅從者不戮一人汀漳平三十一年帝不豫徹里馳還京師侍醫藥帝崩與諸王大臣共定策迎立成宗大德元年拜江南諸道行臺御史大夫一日召都事賈鈞謂曰國家置御史臺所以肅清庶官美風俗興教化也乃者御史不存大體按巡以苛爲明微臧以多爲功至有迫子證父弟證兄奴訐主者傷風敗教莫茲爲甚君爲我語諸御史毋庸效尤爲也帝聞而善之改江浙行省平章政事江浙稅糧甲天下平江嘉興湖州三郡當江浙什六七而其地極下水鍾爲震澤震澤之注由吳松江入海歲久江淤塞豪民利之封土爲田水道淤塞由是浸淫泛溢敗諸郡禾稼朝廷命行省疏導之發卒數萬人徹里董其役凡四閱月畢工九年召入爲中書平章政事十月以疾薨年四十七薨之日家資不滿二百緡人服其廉贈推忠守正佐

理功臣太傅開府儀同三司上柱國追封徐國公諡忠肅至治二年加贈宣忠同德弼亮功臣太師開府儀同三司上柱國追封武寧王諡正憲子朶兒只江浙行省左丞

不忽木

不忽木一名時用字用臣世爲康里部大人康里卽漢高車國也祖海藍伯嘗事克烈王可汗王可汗滅卽棄家從數千騎望西北馳去太祖遣使招之荅曰昔與帝同事王可汗今王可汗旣亡不忍改所事遂去莫知所之子十人皆爲太祖所虜燕真最幼年方六歲太祖以賜莊聖皇后后憐而育之遣侍世祖於藩邸長從征伐有功世祖威名日盛憲宗將伐宋命以居守燕真曰主上素有疑志今乘輿遠涉危難之地殿下以皇弟獨處安全可乎世祖然之因請從南征憲宗喜卽分兵命趨鄂州而自將攻蜀之釣魚山令阿里不哥居守憲宗崩燕真統世祖留部覺阿里不哥有異志奉皇后稍引而南與世祖會于上都世祖卽位燕真未及大用而卒官止衛率不忽木其仲子也資稟英特進止詳雅世祖奇之命給事裕宗東宮師事太子贊善王恂恂從北征乃受學于國子祭酒許衡日記數千言衡每稱之以爲有公輔器世祖嘗欲觀國子所書字不忽木年十六獨書貞觀政要數十事以進帝知其寓規諫意嘉歎久之衡纂歷代帝王名諡統系歲年爲書授諸生不忽木讀數過卽成誦帝召試不遺一字至元十三年與同舍生堅童

太蒼禿魯等上疏曰臣等聞之學記曰君子如欲化民成俗其必由學乎玉不琢不成器人不學不知道
故古之王者建國君民教學爲先蓋自堯舜禹湯文武之世莫不有學故其治隆於上俗美於下而爲後
世所法降至漢朝亦建學校詔諸生課試補官魏道武帝起自北方既定中原增置生員三千儒學以興
此歷代皆有學校之證也臣等今復取平南之君建置學校者爲陛下陳之晉武帝嘗平吳矣始起國子
學隋文帝嘗滅陳矣俾國子寺不隸太常唐高祖嘗滅梁矣詔諸州縣及鄉並令置學及至太宗數幸國
學增築學會至千二百間國學太學四門學亦增生員其書算各置博士乃至高麗百濟新羅高昌吐蕃
諸國酋長亦遣子弟入學國學之內至八千餘人高宗因之遂令國子監領大學一曰國子學二曰太學
三曰四門學四曰律學五曰書學六曰算學各置生徒有差皆承高祖之意也然晉之平吳得戶五十二
萬而已隋之滅陳得郡縣五百而已唐之滅梁得戶六十餘萬而已而其崇重學校已如此況我堂堂大
國奄有江嶺之地計亡宋之戶不下千萬此陛下神功自古未有而非晉隋唐之所敢比也然學校之政
尙未全舉臣竊惜之臣等嚮被聖恩俾習儒學欽惟聖意豈不以諸色人仕宦者常多蒙古人仕宦者尙
少而欲臣等曉識世務以任陛下之使令乎然以學制未定朋從數少譬猶責嘉禾於數苗求良驥於數
馬臣等恐其不易得也爲今之計如欲人材衆多通習漢法必如古昔備立學校然後可若曰未暇宜且

於大都弘闡國學擇蒙古人年十五以下十歲以上質美者百人百官子弟與凡民俊秀者百人俾廩給各有定制選德業充備足爲師表者充司業博士助教而教育之使其教必本於人倫明乎物理爲之講解經傳授以修身齊家治國平天下之道其下復立數科如小學律書算之類每科設置教授各令以本業訓導小學科則令讀誦經書教以應對進退事長之節律科則專令通曉吏事書科則專令曉習字畫算科則專令熟閑算數或一藝通然後改授或一日之間更次爲之俾國子學官總領其事常加點勘務要俱通仍以義理爲主有餘力者聽令學作文字日月歲時隨其利鈍各責所就功課程其勤惰而賞罰之勤者則升之上舍惰者則降之下舍待其改過則復升之假日則聽令學射自非假日無故不令出學數年以後上舍生學業有成就者乃聽學官保舉蒙古人若何品級諸色人若何仕進其未成就者且令依舊學習俟其可以從政然後歲聽學官舉其賢者能者使之依例入仕其終不可教者三年聽令出學凡學政因革生員增減若得不時奏聞則學無弊政而天下之材亦皆觀感而興起矣然後續立郡縣之學求以化民成俗無不可者臣等愚幼見於書聞於師者如此未敢必其可行伏望聖慈下臣此章令諸老先生與左丞王贊善等商議條奏施行臣等不勝至願書奏帝覽之喜十四年授利用少監十五年出爲燕南河北道提刑按察副使帝遣通事脫虎脫護送西僧往作佛事還過真定鐘驛吏幾死訴之按察

使不敢問不忽木受其狀以僧下獄脫虎脫直欲出僧辭氣倔強不忽木令去其冠庭下責以不職脫虎脫逃歸以聞帝曰不忽木素剛正必爾輩犯法故也繼而燕南奏至帝曰我固知之十九年陞提刑按察使有訟靜州守臣盜官物者靜州本隸河東特命不忽木往按之歸報稱旨賜白金千兩鈔五千貫二十一年召參議中書省事時權茶轉運使盧世榮阿附宣政使桑哥言能用己則國賦可十倍於舊帝以問不忽木對曰自昔聚斂之臣如桑弘羊宇文融之徒操利術以惑時君始者莫不謂之忠及其罪稔惡著國與民俱困雖悔何及臣願陛下無納其說帝不聽以世榮爲右丞不忽木遂辭參議不拜二十二年世榮以罪被誅帝曰朕殊愧卿擢吏部尙書時方籍沒阿合馬家其奴張散札兒等罪當死謬言阿合馬家貲隱寄者多如盡得之可資國用遂勾考捕繫連及無辜京師騷動帝頗疑之命丞相安童集六部長貳官詢問其事不忽木曰是奴爲阿合馬心腹爪牙死有餘罪爲此言者蓋欲苟延歲月微幸不死爾豈可復受其誑嫁禍善良耶急誅此徒則怨謗自息丞相以其言入奏帝悟命不忽木鞫之具得其實散札兒等伏誅其捕繫者盡釋之二十三年改工部尙書九月遷刑部河東按察使阿合馬以貲財諂媚權貴貸錢於官約償羊馬至則抑取部民所產以輸事覺遣使按治皆不伏及不忽木往始得其不法百餘事會大同民饑不忽木以便宜發倉廩賑之阿合馬所善幸臣奏不忽木擅發軍儲又鍛鍊阿合馬使自誣服

帝曰使行發粟以活吾民乃其職也何罪之有命移其獄至京師審視阿合馬竟伏誅吐土哈求欽察之爲人奴者增益其軍而多取編民中書僉省王遇驗其籍改正之吐土哈遂奏遇有不臣語帝怒欲斬之不忽木諫曰遇始令以欽察之人奴爲兵未聞以編民也萬一他術皆倣此戶口耗矣若誅遇後人豈肯爲陛下盡職乎帝意解遇得不死二十四年桑哥奏立尙書省誣殺參政楊居寬郭佑不忽木爭之不得桑哥深忌之嘗指不忽木謂其妻曰他日籍我家者此人也因其退食責以不坐曹理務欲加之罪遂以疾免車駕還自上都其弟野禮審班侍坐輦中帝曰汝兄必以某日來迎不忽木果以是日至帝見其羸甚問其祿幾何左右對以滿病假者例不給帝念其貧命盡給之二十七年拜翰林學士承旨知制誥兼修國史二十八年春帝獵柳林徹里等劾奏桑哥罪狀帝召問不忽木具以實對帝大驚乃決意誅之罷尙書省復以大部歸于中書欲用不忽木爲丞相固辭帝曰朕過聽桑哥致天下不安今雖悔之已無及矣朕識卿幼時使卿從學政欲備今日之用勿多讓也不忽木曰朝廷勳舊齒爵居臣右者尙多今不次用臣無以服眾帝曰然則孰可對曰太子詹事完澤可嚮者籍沒阿合馬家其賂遺近臣皆有簿籍唯無完澤名又嘗言桑哥爲相必敗國事今果如其言是以知其可也帝曰然非卿無以任吾事乃拜完澤右丞相不忽木平章政事上都留守木八剌沙言改按察司置廉訪司不便宜罷去乃求憲臣贓罪以動上

聽帝以責中丞崔瑗瑗謝病不知不忽木面斥或不直言因歷陳不可罷之說帝意乃釋王師征交趾失利復謀大舉不忽木曰烏夷詭詐天威臨之寧不震懼獸窮則噬勢使之然今其子日燿襲位若遣一介之使諭以禍福彼能悔過自新則不煩兵而下矣如或不悛加兵未晚帝從之於是交趾感懼遣其僞昭明王等詣闕謝罪盡獻前六歲所當貢物帝嘉曰卿一言之力也卽以其半賜之不忽木辭曰此陛下神武不殺所致臣何功焉惟受沉水假山象牙鎮紙水晶筆格而已麥朮丁請復立尙書省專領右三部不忽木庭責之曰阿合馬桑哥相繼誤國身誅家沒前鑒未遠奈何又欲效之乎事遂寢或勸征流求及賦江南包銀皆諫止之桑哥黨人納速刺丁等既誅帝以忻都長於理財欲釋不殺不忽木力爭之不從日中凡七奏卒正其罪釋氏請以金銀幣帛祠其神帝難之不忽木曰彼佛以去貧爲寶遂弗與或言京師蒙古人宜與漢人間處以制不虞不忽木曰新民乍遷猶未寧居若復紛更必致失業此蓋姦人欲擅貨易之利交結近幸借爲納忠之說耳乃圖寫國中貴人第宅已與民居犬牙相制之狀上之而止有譖完澤徇私者帝以問不忽木對曰完澤與臣俱待罪中書設或如所言豈得專行臣等雖愚陋然備位宰輔人或發其陰短宜使面質明示責降若內懷猜疑非人主至公之道也言者果屈帝怒命左右批其頰而出之是日苦寒解所御黑貂裘以賜帝每顧侍臣稱塞唾旆之能不忽木從容問其故帝曰彼事憲宗常

陰資朕財用卿父所知卿時未生誠不知也不忽木曰是所謂爲人臣懷二心者今有以內府財物私結親王陛下以爲若何帝急揮以手曰卿止朕失言三十年有星孛于帝座帝憂之夜召入禁中問所以銷天變之道奏曰風雨自天而至人則棟宇以待之江河爲地之限人則舟楫以通之天地有所不能者人則爲之此人所以與天地參也且父母怒人子不敢疾怨惟起敬起孝故易震之象曰君子以恐懼修省詩曰敬天之怒又曰遇災而懼三代聖王克謹天戒鮮不有終漢文之世同日山崩者二十有九日食地震頻歲有之善用此道天亦悔禍海內乂安此前代之龜鑑也臣願陛下法之因誦文帝日食求言詔帝悚然曰此言深合朕意可復誦之遂詳論款陳夜至四鼓明日進膳帝以盤珍賜之三十年帝不豫故事非國人勳舊不得入臥內不忽木以謹厚日視醫藥未嘗去左右帝大漸與御史大夫月魯那顏太傅伯顏並受遺詔留禁中丞相完澤至不得入伺月魯那顏伯顏出問曰我年位俱在不忽木上國有大議而不預何耶伯顏歎息曰使丞相有不忽木誠慮何至使吾屬如是之勞哉完澤不能對入言於太后太后召三人問之月魯那顏曰臣受顧命太后但觀臣等爲之臣若誤國卽歎伏誅宗社大事非宮中所當預知也太后然其言遂定大策其後發引升祔請諡南郊皆不忽木領之成宗卽位執政皆迎於上都之北丞相常獨入不忽木至數日乃得見帝問知之慰勞之曰卿先朝腹心願朕寡昧惟朝夕敢沃以匡朕不

逮庶無負先帝付託之重也成宗躬覽庶政聽斷明果廷議大事多采不忽木之言太后亦以不忽木先朝舊臣禮貌甚至河東守臣獻嘉禾大臣欲奏以爲瑞不忽木語之曰汝部內所產盡然耶惟此數莖耶曰惟此數莖爾不忽木曰若如此既無益於民又何足爲瑞遂罷遣之西僧爲佛事請釋罪人祈福謂之禿魯麻豪民犯法者皆賄賂之以求免有殺主殺夫者西僧請被以帝后御服乘黃犢出宮門釋之云可得福不忽木曰人倫者王政之本風化之基豈可容其亂法如是帝責丞相曰朕戒汝無使不忽木知今聞其言朕甚愧之使人謂不忽木曰卿且休矣朕今從卿言然自是以爲故事有奴告主者主被誅詔卹以其主所居官與之不忽木言若此必大壞天下之風俗使人情愈薄無復上下之分矣帝悟爲追廢前命執政奏以爲陝西行省平章政事太后謂帝曰不忽木朝廷正人先皇帝所付託豈可出之於外耶帝復留之竟以與同列多異議稱疾不出元貞二年春召至便殿曰朕知卿疾之故以卿不能從人人亦不能從卿也欲以段貞代卿如何不忽木曰貞實勝於臣乃拜昭文館大學士平章軍國重事辭曰是職也國朝惟史天澤嘗爲之臣何功敢當此制去重字大德二年御史中丞崔彥卒特命行中丞事三年兼領侍儀司事有因父官受賄賂御史必欲歸罪其父不忽木曰風紀之司以宣政化勵風俗爲先若使子證父何以興孝樞密臣受人賄帶徵賦不叙御史言罰太輕不忽木曰禮大臣貪墨惟曰置置不飾若加管

辱非刑不上大夫之意人稱其平恕四年病復作帝遣醫治之不效乃附奏曰臣辱庸無取叨承眷渥大
限有終永辭昭代引觴滿飲而卒年四十六帝聞之驚悼士大夫皆哭失聲木素貧躬自爨汲妻織紵以
養母後因使還則母已卒號慟嘔血幾不起平居服儒素不尚華飾祿賜有餘卽散施親舊明於知人多
所薦拔丞相哈喇孫荅刺罕亦其所薦也其學先躬行而後文藝居則簡默及帝前論事吐辭洪暢引
義正大以天下之重自任知無不言世祖嘗語之曰太祖有言人主理天下如右手持物必資左手承之
然後能固卿實朕之左手也每侍燕閒必陳說古今治要世祖每拊髀歎曰恨卿生晚不得早聞此言然
亦吾子孫之福臨崩以白璧遺之曰他日持此以見朕也武宗時贈純誠佐理功臣太傅開府儀同三司
上柱國魯國公諡文貞子回回陝西行省平章政事嚙嚙由江浙行省平章政事入爲翰林學士承旨

完澤

完澤土別燕氏祖土薛從太祖起朔方平諸部太宗伐金命太弟睿宗由陝右進師以擊其不備土薛爲
先鋒遂去武休關越漢江略方城而北破金兵于湯翟金亡從攻興元閬利諸州拜都元帥取宋成都斬
其將陳隆之賜食邑六百戶父線真宿衛禁中掌御膳中統初從世祖北征四年拜中書丞相與諸儒臣
論定朝制完澤以大臣子選爲裕宗王府僚屬裕宗爲皇太子署詹事長入參謀議出掌環衛小心慎密

太子甚器重之一日會燕宗室指完澤語衆曰親善遠惡君之急務善人如完澤者羣臣中豈易得哉自是常典東宮衛兵裕宗薨成宗以皇孫撫軍北方完澤兩從入北至元二十八年桑哥伏誅世祖咨問廷臣特拜中書右丞相完澤入相革桑哥弊政請自中統初積歲逋負之錢粟悉蠲免之民賴其惠三十一年世祖崩完澤受遺詔合宗戚大臣之議啟皇太后迎成宗卽位詔諭中外罷征安南之師建議加上祖宗尊諡廟號致養皇太后示天下爲人子之禮元貞以來朝廷恪守成憲詔書屢下散財發粟不惜鉅萬以頒賜百姓當時以賢相稱之大德四年加太傅錄軍國重事位望益崇成宗倚任之意益重而能處之以安靜不急於功利故吏民守職樂業世稱賢相云七年薨年五十八追封興元王諡忠憲

阿魯渾薩理

阿魯渾薩理畏兀人祖阿台薩理嘗太祖定西域還時言其人主元國王亦都護請于朝盡歸其民

詔許之遂復西還精佛氏學生乞台薩理襲先業通經律論成師名之曰萬全至元十二年入爲釋

教都總統拜正議大夫同知總制院事加資德大夫統制使年七十卒子三人長曰畏吾兒薩理累官資德大夫中書右丞行泉府太卿季曰烏瓦赤薩理阿魯渾薩理其中子也以父字爲全民幼聰慧受業於

國師八哈思巴既通其學且解諸國語世祖聞其材俾習中國之學於是經史百家及陰陽厯數圖緯方

技之說皆通習之後事裕宗入宿衛深見器重至元二十年有西域僧自言能知天象譯者皆莫能通其說帝問左右誰可使者侍臣脫烈對曰阿魯渾薩理可卽召與論難僧大屈服帝悅令宿衛內朝會有江南人言宋宗室反者命遣使捕至闕下使已發阿魯渾薩理趣入諫曰言者必妄使不可遣帝曰卿何以言之對曰若果反郡縣何以不知言者不由郡縣而言之闕庭必其仇也且江南初定民疑未附一旦以小民浮言輒捕之恐人人自危徒中言者之計帝悟立召使者還俾械繫言者下郡治之計者立伏果以嘗貸錢不從誣之帝曰非卿言幾誤但恨用卿晚耳自是命日侍左右二十一年擢朝列大夫左侍儀奉御遂勸帝治天下必用儒術宜招致山澤道藝之士以備任使帝嘉納之遣使求賢置集賢館以待之秋九月命領館事阿魯渾薩理曰陛下初置集賢以待士宜擇重望大臣領之以新觀聽請以司徒撒里蠻領其事帝從之仍以阿魯渾薩理爲中順大夫集賢館學士兼太史院事仍兼左侍儀奉御士之應詔者盡命館穀之凡飲食供帳車服之盛皆喜過望其弗稱旨者亦請加賚而遣之有官於宣徽者欲陰敗其事故盛陳所給廩餼於內前冀帝見之帝果過而問焉對曰此一士之日給也帝怒曰汝欲使朕見而損之乎十倍此以待天下士猶恐不至况欲損之誰肯至者阿魯渾薩理又言於帝曰國學人材之本立國子監置博士弟子員宜優其廩餼使學者日盛從之二十二年夏六月遷嘉議大夫二十三年進集賢大

學士中奉大夫二十四年春立尙書省桑哥用事詔阿魯渾薩理與同視事固辭不許授資德大夫尙書右丞繼拜榮祿大夫平章政事桑哥爲政暴橫且進其黨與阿魯渾薩理數切諍之久與乖刺惟以廉正自持桑哥奏立徵利司理天下逋欠使者相望於道所在囹圄皆滿道路側目無敢言者會地震北京阿魯渾薩理請罷徵利司以塞天變詔下之日百姓皆慶未幾桑哥敗以連坐亦籍其產帝問桑哥爲政如此卿何故無一言對曰臣未嘗不言願言不用耳陛下方信任桑哥甚彼所忌獨臣臣數言不行若抱柴救火祇益其暴不若彌縫其間使無傷國家大本陛下久必自悟也帝亦以爲然且曰吾甚愧卿桑哥臨刑吏猶以阿魯渾薩理爲問桑哥曰我惟不用其言故致於敗彼何與焉帝益信其無罪詔還所籍財產仍遣張九思賜以金帛辭不受二十八年秋乞罷政事并免太史院使詔以爲集賢大學士司天劉監丞言阿魯渾薩理在太史院時數言國家災祥事大不敬請下吏治帝大怒以爲誹謗大臣當抵罪阿魯渾薩理頓首謝曰臣不佞賴陛下天地含容之德雖萬死莫報然欲致言者罪臣恐自是無爲陛下言事者力爭之乃得釋帝曰卿眞長者後雖罷政或通夕召入論事知無不言三十年復領太史院事明年帝崩成宗在邊裕宗太后命爲書趣成宗入正大位又命率翰林集賢禮官備禮冊命明年春加守司徒集賢院使領太史院事初裕宗卽世世祖欲定皇太子未知所立以問阿魯渾薩理卽以成宗爲對且言成宗

仁孝恭儉宜立於是大計乃決成宗及裕宗皇后皆莫之知也數召阿魯渾薩理不往成宗撫軍北邊帝遣阿魯渾薩理奉皇太子寶于成宗乃一至其邸及卽位語阿魯渾薩理曰朕在潛邸誰不願事朕者惟卿雖召不至今乃知卿真得大臣體自是召對不名賜坐視諸侯王等嘗語左右曰若全平章者真全材也於今殆無其比大德三年復拜中書平章政事十一年薨年六十有三延祐四年贈推忠佐理翊亮功臣太師開府儀同三司上柱國追封趙國公諡文定子三人長岳柱次久住終翰林侍讀學士次買住蚤卒岳柱自有傳阿台薩理贈保德功臣銀青榮祿大夫司徒柱國追封趙國公諡端懇乞台薩理累贈純誠守正功臣太保儀同三司上柱國追封趙國公諡通敏

岳柱字止所一字兼山自幼容止端嚴性穎悟有遠議方八歲觀畫師何澄畫陶母剪髮圖岳柱指陶母手中金釧詰之曰金釧可易酒何用剪髮爲也何大驚卽異之旣長就學日記千言年十八從丞相蒼失禮備宿衛出入禁中如老人至大元年授集賢學士階政議大夫卽以薦賢舉能爲事皇慶元年陞中奉大夫湖廣道宣慰使日接見儒生詢求民瘼延祐三年進資善大夫隆禧院使七年授太史院使英宗視其進止整暇顧謂參政速速曰全院使真故令家子也泰定元年改太常禮儀院使四年授禮部尙書領會同館事俄授江西等處行中書省參知政事天厯元年進榮祿大夫集賢大學士至順二年除江西

等處行中書省平章政事時有誣告富民負永寧王官帑錢八百餘錠者中書遣使諸路徵之使至江西岳柱曰事涉誣罔不可奉命僚佐重違宰臣意岳柱曰民惟邦本傷本以斂怨亦非宰相福也令使者以此意復命時燕帖木兒爲丞相聞其言感悟命刑部詣治得誣罔狀罪誣告者若干人宰相以奏帝嘉之特賜幣帛及上尊酒桂陽州民張思進等嘯聚二千餘衆州縣不能治廣東宣慰司請發兵捕之岳柱曰有司不能撫綏邊民乃欲僥倖興兵以爲民害耶不可宰執皆失色憲司亦以興兵不便爲言岳柱終持不可遣千戶王英往問狀英直抵賊巢諭以禍福賊曰致我爲非者兩巡檢司耳我等何敢有異心哉諭其衆皆使復業一方以寧三年遷河南江北等處行中書省平章政事旋以軍事至揚州得疾明年十二月端坐而卒年五十三岳柱天資孝友母弟久住早卒喪之盡哀尤嗜經史自天文醫藥之書無不究極度量弘擴有欺之者恬不爲意或問之則曰彼自欺也我何與焉母郃氏亦常稱之曰吾子古人也子四人長普達同僉行宣政院事次安僧爲久住後章佩監丞次仁壽中憲大夫長秋寺卿

元史卷一百三十一

明翰林學士亞中大夫知制誥兼修國史宋 濂等修

列傳第十八

速哥

速哥蒙古人父忽魯忽兒國王木華黎麾下卒也後更隸塔海帖哥軍以善馳馬有口辯慎重不泄令佩銀符常居軍中奏白機務往返未嘗失期太宗以爲才賜名動哥居詔動哥居奏事朝至朝入奏夕至夕入奏嘗出金盤龍袍及宮女賜之憲宗時以疾卒速哥亦以壯勇居軍中歲甲寅憲宗命從都元帥帖哥火魯赤等入蜀乙卯萬戶劉七哥阿刺魯阿力與宋兵戰巴州失利陷敵中速哥馳入其軍奪劉七哥等以歸以功賜白金五十兩馬二疋紫羅圍甲一注又從都元帥紐璘敗宋將劉整破雲頂山城紐璘受詔會涪州至馬湖江速哥以革爲舟夜渡江至大獲山行在所陳道梗失期帝慰遣之未幾復自涪州入奏事遇宋軍於三曹山速哥衆僅百餘奮兵疾戰敗之奪其器械旗鼓以歸己未宋兵攻涪州浮橋部將火尼赤戰陷速哥破圍出之又以白事諸王穆哥所復敗宋軍於三曹山還至石羊與劉整遇復擊敗之世祖卽位賜白金弓刀鞍勒中統二年賜銀符命隸紐璘軍至元二年四川行省遣速哥招收降民得三千

餘人三年從行院帖赤戰九頂山四年行省也速帶兒署爲本軍總管從征瀘州五年立德州以
速哥爲達魯花赤擢陝西五路四川行省左右司員外郎從也速帶兒入朝賞賚加厚七年從也速帶兒
敗宋軍于馬湖江用平章政事賽典赤薦遷行尙書省員外郎九年建都蠻叛詔諸王奧魯赤及也速帶
兒討之速哥將千人爲先鋒破黎州水尾砦攻連雲關克之軍至建都戰於東山斬其酋布庫復與元帥
八兒禿迎合刺軍于不魯思河所過城邑皆下十年討欄樓諸蠻襲破連環城還敗宋軍于七盤山辟新
軍萬戶十一年賜虎符眞授管軍萬戶領成都高哇哥等大翼及京兆新軍教習水戰也速帶兒進圍嘉
定速哥率舟師會平康城修築懷遠等砦守其要害十二年遣兵敗宋將咎萬壽於麻平旣而行樞密副
使忽敦等軍至與也速帶兒會於紅崖遣速哥守龍壩城中大震宋將陳都統解于國練率舟師遁速哥
追擊溺死者不可勝計遂與中使沈蒼罕御下流諸城紫雲瀘敘皆降進圍重慶速哥以所部兵鎮白水
馬湖江口十三年帝遣脫朮教化的持詔諭其守臣使降不聽乃分兵爲五道水陸並進攻之衆軍不利
唯速哥獲戰艦三百艘俘其衆百三十人涪州守將遣書納降速哥率千人往察其情僞速哥至涪州果
降遂入其城重慶守臣張萬率衆來襲速哥一日夜出兵凡與十八戰斬首三百餘級萬敗走未幾萬復
以積兵三千人來攻又戰敗之十四年行院辟爲鎮守萬戶嘉定總管府達魯花赤時瀘州復叛速哥從

大軍討平之重慶受圍久其守將趙安開門出降制置使張珩遁速哥追破之虜百餘人及其舟二十餘艘以功授成都水軍萬戶尋改重慶夔府等路宣撫招討兩司軍民達魯花赤十六年除四川南道宣慰使依前成都水軍萬戶鎮重慶夔施黔忠萬雲涪瀘等州十九年文寶不薛蠻叛置順元等路軍民宣慰司以速哥爲宣慰使經理諸蠻二十四年遷河東陝西等路萬戶府達魯花赤播州宣撫賽因不花等赴闕請留之降八番金竹百餘等砦得戶三萬四千悉以其地爲郡縣置順元路金竹府貴州以統之東連九溪十八峒南至交趾西至雲南咸受節制二十九年入朝加都元帥改河東陝西等處萬戶府達魯花赤三十一年僉書四川行樞密院事詔開土番道土番叛以兵圍茂州速哥率師敗之元貞元年行院罷速哥家居數歲卒子壽不赤襲河東陝西等處萬戶府達魯花赤

囊加歹

囊加歹乃蠻人曾祖不闌伯仕其國位羣臣之右祖合折兒管帳前軍兼統國政仕至太師太祖平乃蠻父麻察來歸太祖命與察刺同總管蒙古漢軍由是從世祖伐宋破阿里不哥於失門禿從諸王哈必赤及闊闊歹平李壇皆有功賞賚甚厚賜金符後以子貴贈太傅追封梁國公諡桓武囊加歹幼從麻察習戰陳有謀略佩金符爲都元帥府經歷從阿朮圍襄陽襄陽降以功授漢陽千戶從丞相伯顏攻復州與

宋人戰敗宋兵于風波湖渡江後伯顏南攻鄂州阿朮北攻漢陽分戰艦五十囊加歹與張弘範等焚其蒙衝三千艘兩城大恐皆出降伯顏軍次安慶賈似道督師江上遣宋京來請和軍至池州遣囊加歹偕宋京報似道似道復遣阮思聰偕囊加歹至軍中仍請議和時暑雨方漲世祖慮士卒不習水土遣使令緩師伯顏阿朮與諸將議乘勢徑前遂進軍至丁家洲似道師潰大軍次建康帝聞囊加歹親與賈似道語召赴闕具陳其說遣還諭旨於伯顏以北邊未靖勿輕入敵境而大軍已入平江矣宋使柳岳夏士林呂師孟劉呂等踵至皆命囊加歹同往報之師逼臨安復遣囊加歹入取降表玉璽徵宋將相文武百官出迎王師宋主乃遣賈餘慶等同囊加歹以降表玉璽至阜亭山伯顏遣囊加歹馳獻世祖還傳密旨遷宋君臣北上賜金符授懷遠大將軍安撫司達魯花赤與阿剌罕董文炳等取台溫福州尋領蒙古軍副都萬戶江東道宣慰使佩金虎符如故擢江東道按察使復爲本道宣慰使領萬戶如故召爲都元帥管領通事軍馬東征日本未至而還詔以元管出役軍與孛羅迷兒見管軍合爲一翼充萬戶守建康改賜三珠虎符拜雲南行省叅知政事討金齒緬國得疾召還京師授南京等路宣慰使改河南道宣慰使特旨命襲父職爲蒙古軍都萬戶武宗在濟邸囊加歹嘗從北征與海都戰于帖堅古明日又戰海都圍之山上囊加歹力戰決圍而出與大軍會武宗還師囊加歹殿海都遮道不得過囊加歹選勇敢千人直前

衝之海都披靡國兵乃由旭哥耳温稱海與晉王軍合是役也囊加歹戰爲多以疾而歸成宗崩昭聖元
獻太后與仁宗在懷州太后召囊加歹不憐吉歹脫因不花八思台等諭之曰今官車晏駕皇后欲立安
西王阿難荅爾等當毋忘世祖裕宗在天之靈盡力奉二皇子囊加歹頓首曰臣等雖碎身不能仰報兩
朝之恩願効死力既至京師仁宗遣囊加歹與八思台詣諸王禿剌議事宜時內外洶洶猶豫莫敢言囊
加歹獨贊禿剌定計先發歸白仁宗意猶遲疑固問可否對曰事貴速成後將受制於人矣太后與仁宗
意乃決丙難既平仁宗監國命同知樞密院事武宗卽位真拜同知樞密事階資德大夫賜以七寶束帶
鞍轡衣甲弓矢黃金五十兩以旌其定策之功尋授并縣萬戶府達魯花赤仍同知樞密院事仁宗嘗語
近臣曰今春之事吾與太后疑不能主賴囊加歹一語而定吾聞周文王有姜太公囊加歹亦予家姜太
公也其見稱許如此尋以老病乞骸骨不允仁宗卽位以其家河南特授河南江北行省平章政事佩金
虎符終其身封浚都王子教化山東河北蒙古軍副都萬戶執禮和台河南江北行省平章政事孫脫堅
山東河北軍大都督世襲有位

忙兀台

忙兀台蒙古達達兒氏祖塔思火兒赤從太宗定中原有功爲東平路達魯花赤位在嚴實上忙兀台事

世祖爲博州路奧魯總管至元七年又爲監戰萬戶佩金虎符八年改鄧州新軍蒙古萬戶治水軍于萬山南岸九月以兵攻樊拔古城繼敗宋軍于安陽灘轉戰八十里禽其將鄭高十月大軍攻樊分軍爲五道忙兀台當其一率五翼軍以進焚南岸舟豎雲梯于北岸登櫃子城奪西南角入城命部將據倉粟功在諸將右賞金百兩襄陽降同宋安撫呂文煥入覲賜銀五十兩及翎根甲等物十一年從丞相伯顏平章阿朮南征命與萬戶史格率麾下會鹽山嶺遇宋兵忙兀台突陣殺一人諸軍繼進與戰敗之自郢州黃家原盪舟入湖至沙洋堡立砲座十有二豎雲梯先登焚其樓櫓拔羊角埧破沙洋堡擒宋將四人直抵新城鏖戰自晨至晡大敗之宋復州守將翟貴以城降將由漢口入江至蔡店聞宋兵屯漢口乃率舟師經鬪龍口至沙步入江遇宋兵三百餘艘分道來拒進擊走之次武磯堡宋將夏貴堅守不下十月乙卯平章阿朮率萬戶晏徹兒史格賈文備同忙兀台四軍雪夜泝流西上黎明至青山磯北岸萬戶史格先渡宋將程鵬飛拒敵格被三創喪卒二百人諸將繼進大戰中流鵬飛被七創敗走舟泊中洲宋兵阻水不得近伯顏復遣萬戶張榮寶等率舟來援夏貴率麾下數千將奔大軍乘之大敗走黃州遂拔武磯堡斬守將王達阿朮旣渡南岸翼日丞相伯顏視師則大江南北皆北軍旗幟宋制置使朱禔孫遁還江陵語在阿朮傳己未伯顏次鄂州遣忙兀台諭宋守臣張晏然以城降程鵬飛以本軍降知漢陽軍王儀

知德安府來興國繼降乃留軍鎮鄂漢率諸將水陸東下十二年正月忙兀台諭斬黃安慶池川諸郡皆下之次丁家洲宋賈似道孫虎臣來拒忙兀台擊之奪虎臣所乘巨舟與宋降將范文虎以兵五百諭降和州及無爲鎮巢二軍九月攻常州拔其木城宋降將趙潛叛於溧陽伯顏命忙兀台擊之戰於豐登莊斬首五百餘級擒其將三人復招降湖州守將二人十二月行省第其功承制授行兩浙大都督府事十四年改閩廣大都督行都元帥府事時宋二王逃遁入海忙兀台奉旨率諸軍與江西右丞塔出會兵收之次漳州諭降宋守將何清十五年師還福州拜參知政事詔與唆都等行省于福鎮撫瀕海八郡十月召赴闕陞左丞十六年七月沙縣盜起詔忙兀台復行省事討平之初忙兀台北還左丞唆都行省福建一日帝命召唆都李庭言若召唆都則行省無人宜令建康阿剌罕往帝曰何必阿剌罕其命忙兀台卽往候唆都還則令移潭州可也未幾中書言唆都在福建麾下擾民致南劍等路往往殺長吏叛及忙兀台至招來七十二寨建甯漳汀稍獲安集若移之他處而唆都復往恐重勞民有旨忙兀台仍鎮閩十八年轉右丞時宣慰使王剛中以土人饒贊頗擅作威福忙兀台慮其有變奏移之他道二十一年拜江淮行省平章政事初宋降將五虎陳義嘗助張弘範擒史天祥助完者都討陳大舉又資阿塔海征日本戰艦三千艘福建省臣言其有反側意請除之帝使忙兀台察之至是忙兀台携義入朝保其無事且乞寵

以官爵丞相伯顏亦以爲言乃授義同知廣東道宣慰司事授明珠虎符其從林雄等十人並上百戶二十二年脫忽思樂實傳旨中書省令悉代江浙省臣中書復奏帝曰朕安得此言傳者妄也如忙兀台之通曉政事亦可代耶俄以言者召赴闕封其家貲遣使安驗無狀未幾拜銀青榮祿大夫行省左丞相還鎮江浙時浙西大饑乃弛河泊禁發府庫官貨低其直買粟以賑之浙東盜起蠲田租以紓民力二十三年奏以販鬻私鹽者皆海島民今征日本可募爲水工從之賜鈔五千貫役既罷請以戰艦付海漕又言省治在杭州其兩淮江東財賦軍實旣南輸至杭復自杭北輸京城往返勞頓不便請移省治于揚州復言淮東近地宜置屯田歲入糧以給軍所餘餉京師帝悉從其言二十五年詔江淮管內並聽忙兀台節制二十六年朝廷以中原民轉徙江南令有司遣還忙兀台言其不可遂止閩越盜起詔與不魯迷失海牙等合兵討之御史大夫玉速帖木兒奏宜選將帝曰忙兀台已往無慮也未幾悉平之屢以病上疏乞骸骨乃召還二十七年以江西平章奧魯赤不稱職特命爲丞相兼樞密院事出鎮江西謹約束鋤強暴尊卑殊服軍民安業威德並著在官四十日卒忙兀台之在江浙專復自用又易置戍兵平章不憐吉台言其變更伯顏阿朮成法帝每戒勅之旣死臺臣劾郎中張斯立罪狀而忙兀台迫死劉宣及其屯田無成事始聞于帝云子三人帖木兒不花孛蘭奚襲萬戶亦刺出中書參知政事

奧魯赤

奧魯赤扎刺台人曾祖黠火察驍果善騎射太祖出征每提精兵爲前驅祖朔魯罕有膽力嘗被讒不許入見一日俟駕出趨前曰臣無罪若果有罪速殺臣臣將從先帝於地下不然赦臣願得自効帝笑而復用之辛未與金人戰于野狐嶺中流矢戰愈力克之既還拔矢血出昏眩帝親撫視傅以藥竟不起帝悲悼曰朔魯罕朕之一臂今亡矣賜其家馬四百匹錦綺萬段父忒木台從太宗征杭里部俘部長以獻復從征西夏有功特命行省事領兀魯忙兀亦怯烈弘吉刺札刺兒五部軍平河南以功賜戶二千嘗駐兵太原平陽河南土人德之皆爲立祠奧魯赤性朴魯智勇過人早事憲宗帶御器械特見親任戊午扈駕征蜀攻釣魚山至元五年攻襄陽授金符蒙古軍萬戶明年賜虎符襲父職領蒙古軍四萬戶十一年春詔丞相伯顏大舉伐宋以所部從渡江圍鄂宋兵固守奧魯赤白丞相可遣使諭降乃遣許千戶同所獲宋將持金符抵其城東南門懸金符以招之其夜守門將崔立啟門出遂引立見丞相復遣入城諭守臣張晏然明日晏然以城降遷奧魯赤昭毅大將軍諸郡望風而靡分兵出獨松關宋兵堅守奧魯赤令將校益樹旗幟於山上率精騎突之守兵驚潰棄關走追逐百餘里斬馘不可勝計十三年宋主降分討未下州郡詔加鎮國上將軍行中書省叅知政事未幾以叅知政事行湖北道宣慰使兼領蒙古軍時州郡

初附戍以重兵民驚懼往往逃匿山澤間奧魯赤止侵暴恤單弱號令嚴明民悉復業會詔所在括逃俘有司拘男女千餘人時軍士已還部所括者無所歸衆議悉以隸官奧魯赤曰斯民不幸被兵幸而骨肉完聚復羈之是重被兵也不若籍之爲民衆從之俄徵詣闕賜資優渥及還帝曰武昌襟帶江湖實要害地朕嘗用師于彼故遣卿往治爲朕耳目陞驃騎衛上將軍中書左丞行宣慰使十八年詔移行省于鄂宣慰司于潭時湖南劇賊周龍張虎聚黨行劫隨宜招捕梟二賊首餘悉縱遣復召入見拜行省右丞改荆湖等處行樞密院副使二十三年春拜湖廣等處行中書省平章政事夏四月赴召上都命佐鎮南王征交趾帝慰諭之曰昔木華黎等戮力王室榮名迄今不朽卿能勉之豈不並美于前人乎仍命其子脫桓不花襲萬戶至交趾敗王分軍爲三因險制蠻蠻不能支竄匿海島餘寇扼師歸路奧魯赤轉戰以出改江西行省平章政事二十六年以疾求退不允俄授同知湖廣等處行樞密院事成宗卽位進光祿大夫上柱國江西等處行中書省平章政事大德元年春三月卒年六十六贈金紫光祿大夫大司徒上柱國追封鄭國公諡忠宣子拜住明威將軍蒙古侍衛親軍副都指揮使脫桓不花驃騎衛上將軍行中書省左丞蒙古軍都萬戶

完者都欽察人父哈刺火者從憲宗征討有功完者都廣額豐額長過腹爲人驍勇而樂善好施聽讀史書聞忠良則喜遇姦諛則怒歲丙辰以材武從軍己未從攻鄂州先登賞銀五十兩中統三年從諸王合必赤討李璫于濟南凡兩戰皆有功至元元年合必赤因樞密臣以其武勇聞帝特賞賜之四年十月從萬戶木花里略地荆南還至襄陽西安陽灘遇宋軍敗之既而從丞相阿朮圍襄樊水陸大戰者四皆有功營梯樊城焚樓櫓勇敢出諸軍右幕府上其功十一年授武略將軍爲彰德南京新軍千戶九月從丞相伯顏南征十一月攻沙洋新城始授金符領丞相帳前合必赤軍十二月統舟師由沙蕪口渡江十二年春與宋將孫虎臣戰于丁家洲大捷進武義將軍攻秦州戰揚子橋戰焦山破常州十三年春入臨安下揚州皆有功江南平入見帝顧謂侍臣曰眞壯士也因賜名拔都兒授信武將軍管軍總管高郵軍達魯花赤佩虎符旣而軍升爲路遂進懷遠大將軍高郵路總管府達魯花赤十六年授昭勇大將軍遷管軍萬戶漳州陳吊眼聚黨數萬劫掠汀漳諸路七年未平十七年八月樞密副使孛羅請命完者都往討從之加鎮國上將軍福建等處征蠻都元帥率兵五千以往賜翎根甲面慰遣之且曰賊苟就擒聽汝施行時黃華聚黨三萬人擾建寧號頭陀軍完者都先引兵鼓行壓其境軍聲大震賊驚懼納款完者都許以爲副元帥凡征蠻之事一以問之且慮其姦詐莫測因大獵以耀武適有一鷗翔空完者都仰射之

應弦而落遂大獵所獲山積華大悅服乃聞于朝請與之俱討賊朝廷從之制授華征蠻副元帥與完者都同署華遂爲前驅至賊所破其五寨十九年三月追陳吊眼至于壁嶺擒之斬首漳州市餘黨悉平軍還至揚州奉旨賞賜有差至高郵病七月入覲帝嘉之賜鈔及銀金綺鞍勒弓矢復授管軍萬戶高郵路總管府達魯花赤有虎爲害完者都挾弓矢出郊射殺之二十二年八月以疾召入朝帝屢遣中使存問仍命良醫視之疾平帝大喜賜醫者鈔萬貫拜完者都驃騎上將軍江浙行省左丞兼管軍萬戶初浙西私鹽吏莫能禁完者都躬詣松江上海收鹽徒五千隸軍籍九月授中書左丞行浙西道宣慰使二十五年遙授尙書省左丞二十六年陞資德大夫江西等處行樞密院副使兼廣東宣慰使疾復作召還成宗卽位入見賜玉帶授榮祿大夫江浙行省平章政事大德二年十一月卒年五十九贈効忠宣力定遠功臣開府儀同三司太尉上柱國追封林國公諡武宣子十四人皆仕而帖木禿古思別里怯都尤顯孫二十四人仕者亦多云

伯帖木兒

伯帖木兒欽察人也至元中充哈刺赤入備宿衛以忠謹授武節將軍僉左衛親軍都指揮使司事二十四年征叛王乃顏隸御史大夫玉速帖木兒麾下敗乃顏兵於忽爾阿刺河追至海刺兒河又敗之乃顏

黨金家奴別不古率衆走山前從大夫追戰于札刺馬禿河殺其將二人追至夢哥山并擒金家奴二十五年超授顯武將軍冬哈丹王叛從諸王乃麻歹討之至斡麻站兀刺河等處連敗其黨阿禿八刺哈赤軍轉戰至帖麥哈必兒哈又敗之進至明安倫城哈丹迎戰敗走追至忽蘭葉兒又與阿禿一日三戰手殺五人擒裨將一人至帖里揭突擊哈丹挺身陷陣身中三十餘箭而還大夫親視其創而罪潰軍之不救者車駕親征駐蹕兀魯灰河伯帖木兒以兵從大夫至貴列兒河哈丹拒王師伯帖木兒首戰却之獲其黨駙馬阿刺渾帝悅以所獲賊將兀忽兒妻賜之至霸郎兒與忽都禿兒干戰殺其裨將五人生擒曲兒先九月大夫令率師往納兀河東等處招集逆黨乞蒼真一千戶達達百姓及女直押兒撒等五百餘戶二十六年春正月師還復遣戍也真大王之境五月海都謀擾邊有旨令伯帖木兒以其軍先來行至怯呂連河值拜要叛伯帖木兒卽移兵致討擒其黨伯顏以獻帝深加獎諭賜以所得伯顏女茶倫是年冬立東路蒙古軍上萬戶府統欽察乃蠻捏古思那亦勤等四千餘戶陞懷遠大將軍上萬戶佩三珠虎符二十七年哈丹復入高麗伯帖木兒奉命偕徹里帖木兒進討二十八年正月至鴨綠江與哈丹子老的戰失利伯帖木兒以聞帝命乃麻歹薛徹干等征之仍命伯帖木兒爲先鋒薛徹干軍先至禪定州擊敗哈丹踰數日乃麻歹以兵至合攻哈丹又敗之伯帖木兒將百騎追至一大河虜其妻擊追奔逐北哈

丹尙有八騎伯帖木兒止餘三騎再戰兩騎士皆重傷不能進伯帖木兒單騎追之至一大山日暮遂失哈丹所在乃麻歹嘉其勇賞以老的妻完者上其功于朝賜金帶衣服鞍馬弓矢銀器等物并厚賚其軍二十九年聞叛王捏怯烈尙在濠來倉伯帖木兒率兵擊虜其妻子畜產追至陳河捏怯烈以二十餘騎脫身走遂定其地得所管女直戶五百餘以聞帝命以充漁戶伯帖木兒度地置馬站七所令歲捕魚馳驛以進成宗卽位俾仍其官車駕幸上京徵其兵千人從歲以爲常云

懷都

懷都幹魯納台氏祖父阿朮魯與太祖同飲黑河水屢從征討賜銀印總大軍伐遼東女直諸部復帥師討西夏大戰于合刺合察兒擒夏主太祖命盡賜以夏主遺物繼總軍南伐攻拔信安下宿泗等州諸王塔察兒以阿朮魯年老俾其子不花襲職中統二年不花卒子幼兄子懷都繼領其職中統三年春李璫叛詔懷都從親王哈必赤討之圍瓊濟南夏四月璫夜出兵四面衝突求出懷都直前奮擊斬百餘級俘二百餘人奪兵仗數百瓊退走入城懷都晝夜勒兵與戰秋七月破濟南誅璫哈必赤第其功居最詔賜金虎符領蒙古漢軍攻海州略淮南廬州至元三年充邳州監戰萬戶四年領山東路統軍司從主帥南征至襄陽西渡漢江宋遣水軍絕歸路懷都選士卒浮水殺宋軍奪戰艦二十餘艘斬首千餘級六年軍

次淮南天長至五河口與宋兵戰敗之七年詔守鹿門山白河口一字城九年春懷都請攻樊之古城堡
堡高七層懷都夜勒士卒親冒矢石攻奪之斬宋將韓撥發擒蔡路鈴襄陽既降帥師屯蔡息出巡淮安
還城正陽略地安豐獲生口無算十一年夏宋將夏貴來攻正陽懷都領步卒薄淮西岸至橫河口逆戰
退之九月略地安慶十二年北渡至柵江堡值宋軍三千餘懷都與戰敗之復南渡江駐兵鎮江讞報宋
平江軍出常州懷都領兵千人至無錫與宋兵遇大戰殲其衆秋七月行省檄懷都領軍護焦山江岸仍
往揚州灣頭立木城以兵守之九月樞樞密院事復守鎮江宋殿帥張彥安撫劉師勇攻呂城懷都與萬
戶忽刺出帖木兒追戰至常州奪舟百餘艘擒張殿帥范總管冬十月從右丞阿塔海攻常州宋朱都統
自蘇州赴援懷都提兵至橫林店與之遇奮擊大破之十一月取蘇州徇秀州仍撫治臨安迤東新附軍
民十三年秋同元帥撒里蠻帖木兒張弘範徇温州福建所至州郡迎降十四年授鎮國上將軍浙東宣
慰使討台慶叛者戰于黃奢嶺又戰于温州白塔屯寨轉戰至于漳泉興化平之十六年召至闕下賜玉
帶弓矢授行省參知政事至處州以疾卒子八忽台兒官至通奉大夫浙東道宣慰使都元帥平浙東建
寧盜賊數有功不花子忽都答兒既長分襲蒙古軍千戶從平宋有功授浙西招討使改邳州萬戶後加
榮祿大夫平章政事卒

亦黑迷失

亦黑迷失畏吾兒人也至元二年入備宿衛九年奉世祖命使海外八羅孛國十一年偕其國人以珍寶奉表來朝帝嘉之賜金虎符十二年再使其國與其國師以名藥來獻賞賜甚厚十四年授兵部侍郎十八年拜荆湖占城等處行中書叅知政事招諭占城二十一年召還復命使海外僧迦刺國觀佛鉢舍利賜以玉帶衣服鞍轡二十二年自海上還以叅知政事管領鎮南王府事復賜玉帶與平章阿里海牙右丞唆都征占城戰失利唆都死焉亦黑迷失言於鎮南王請屯兵大浪湖觀釁而後動王以聞詔從之竟全軍而歸二十四年使馬八兒國取佛鉢舍利浮海阻風行一年乃至得其良醫善藥遂與其國人來貢方物又以私錢購紫檀木殿材并獻之嘗侍帝於浴室問曰汝踰海者凡幾對曰臣四踰海矣帝憫其勞又賜玉帶改資德大夫遙授江淮行尚書省左丞行泉府太卿二十九年召入朝盡獻其所有珍異之物時方議征瓜哇立福建行省亦黑迷失與史彌高興並爲平章詔軍事付彌海道事付亦黑迷失仍諭之曰汝等至瓜哇當遣付來報汝等留彼其餘小國卽當自服可遣招徠之彼若納款皆汝等之力也軍次占城先遣郝成劉淵諭降南巫里速木都刺不魯不都八刺刺諸小國二十年攻葛郎國降其主合只葛當又遣鄭珪招諭木由來諸小國皆遣其子弟來降瓜哇主婿土罕必闊耶旣降歸國復叛事並見彌傳

諸將議班師亦黑迷失欲如帝旨先遣使入奏彌與興不從遂引兵還以所俘及諸小國降人入見帝罪其與彌縱士卒必闕耶沒家貲三之一尋復還之以榮祿大夫平章政事爲集賢院使兼會同館事告老家居仁宗念其屢使絕域詔封吳國公卒

拜降

拜降北庭人父忽都武勇過人由宿衛爲南宿州鎮將分守并縣後從世祖南征年幾七十每率先士卒冒矢石身被數十瘡戰功居多徙居大名路清豐縣卒贈廣平路總管封滄陽郡侯忽都卒時拜降生甫數月母徐氏鞠育教誨甚至每曰吾惟一子已童卯矣不可使不知學顧縣僻左無良師友遂遣從師大名城中郡守每旦望入學見拜降容止講解大異羣兒甚愛獎之比弱冠美髯髯儀表甚偉丞相阿朮南攻襄陽江陵諸郡以偏裨隸麾下軍行至安陽灘與宋軍遇宋騎直前突陣陣爲却拜降卽躍馬出陣前引弓連斃數人宋騎稍却復率衆戰良久宋師大潰至元五年圍襄樊戰有功十一年從阿朮渡江水陸遇敵嘗先登陷陣勇冠一軍宋平以功授江浙省理問官時事方草創省臣有所建白及事有不可便宜自決須奏聞者以拜降善數奏數令馳驛往咨于朝及引見世祖遙識之喜曰黑髯使臣復來耶其見器重如此二十七年遷江西行尙書省都鎮撫適獠獠擾邊拜降從丞相忙兀台討定之二十九年遷慶元

路治中歲大饑狀累上行省不報拜降曰民饑如是而不賑之豈爲民父母意耶卽躬詣行省力請得發粟四萬石民賴全活元貞間兩浙鹽運司同知范某陰賊爲姦州縣吏以賂咸聽驅役由是數侵暴細民民有珍貨腴田必奪爲己有不與則朋結無賴妄訟以羅織之無不蕩破家業者兇醜鑠人人咸側目里人欲殺之不果顧被誣訴逮繫者亡慮數十人俱死獄中蘭溪州民葉一王十四有美田宅范欲奪之不可因誣以事繫獄十年不決事聞于省省下理問所推鞠之適拜降至官寃遂得直置范于刑而七人者先瘐死矣惟葉一王十四得釋時論多焉大德元年遷浙東廉訪副使令行禁止豪強懼伏同寅有貪穢者拜降抗章劾之于臺遂免其官後轉工部侍郎賜侍燕服一襲陞工部尙書有能聲至大二年仁宗奉皇太后避暑五臺拜降供給道路無有闕遺恩賚尤渥比至都改資國院使母徐氏卒遂奔喪于杭時酒禁方嚴帝特命以酒十壘官給傳致墓所以備奠禮初徐氏盛年守節教子甚嚴比拜降貴事上于朝特旌其門及老見拜降歷官有聲譽喜曰有子如是吾死可瞑目矣拜降居喪盡禮未及起復延祐二年卒于家贈資政大夫江浙左丞諡貞惠

元史卷一百三十一考證

忙兀台傳忙兀台○一作忙古歹

元史卷一百三十一

明翰林學士亞中大夫知制誥兼修國史宋 濂等修

列傳第十九

杭忽思

杭忽思阿速氏主阿速國太宗兵至其境杭忽思率衆來降賜名拔都兒錫以金符命領其土民尋奉旨選阿速軍千人及其長子阿塔赤扈駕親征旣還阿塔赤入直宿衛杭忽思還國道遇敵人戰歿勅其妻外麻思領兵守其國外麻思躬擐甲胄平叛亂後以次子按法普代之阿塔赤從憲宗征西川軍于釣魚山與宋兵戰有功帝親飲以酒賞以白金阿里不哥叛從也里可征之至靈夏與阿藍蒼兒渾都海戰率先赴敵矢中其腹不懼世祖聞而嘉之賞以白金召入宿衛中統二年扈駕親征阿里不哥追至失木里禿之地以功復賞白金三年從征李璫平之至元五年奉旨同不蒼台領兵南征攻破金剛臺六年從攻安慶府戰有功七年從下五河口十一年從下松江諸郡戍鎮巢民不堪命宋降將洪福以計乘醉而殺之世祖憫其死賜其家白金五百兩鈔三千五百貫併鎮巢降民一千五百三十九戶且命其子伯蒼兒襲千戶佩金符時失烈吉叛詔伯蒼兒領阿速軍一千往征之與襲吉刺只兒瓦台軍戰于押里復與藥

木忽兒軍戰于禿刺及斡魯歡之地十五年春至伯牙之地與赤伶軍合戰五月駐兵呵刺牙與外刺台寬赤哥思等軍合戰其大將塔思不花樹木爲柵積石爲城以拒大軍伯苔兒督勇士先登拔之伯苔兒矢中右股別里吉迷失以其功聞賞白金二十兩授虎符定遠大將軍後衛親軍都指揮使兼領阿速軍充阿速拔都達魯花赤二十二年征別失八里軍于亦里渾察罕兒之地與禿呵不早麻軍戰有功二十六年征杭海敵勢甚盛大軍乏食其母乃咬真翰己帑及畜牧等給軍食世祖聞而嘉之賜予甚厚大德四年伯苔兒卒長子斡羅思由宿衛仕至隆鎮衛都指揮使次子福定襲職官懷遠大將軍尋改右阿速衛達魯花赤兼管後衛軍至大四年兄都丹充右阿速衛都指揮使福定復職後衛陞樞密同斂命領軍一千守遷民鎮尋授定遠大將軍斂樞密院事後衛親軍都指揮使提調右衛阿速達魯花赤二年進資翫大夫同知樞密院事後至元間進知樞密院事

步魯合苔

步魯合苔蒙古弘吉刺氏祖按主奴太宗時率蒙古軍千人從諸王察合台征河西至山丹攻下定會附文諸州以功爲元帥佩金符駐軍漢陽禮店戍守西和階文南界及西蕃邊境換金虎符真除元帥父車里襲職從都元帥紐璘攻成都宋將劉整以重兵守雲頂山車里擊敗之進圍其城整遣裨校出戰敗走

追至簡州斬之殺三百餘人遂拔其城攻重慶車里將兵千人爲先鋒渡馬湖江敗宋兵于馬老山俘獲百餘人戊午諸軍還屯灰山宋兵夜來劫營車里擊敗之斬首三百級世祖卽位賜金符爲奧魯元帥又改征行元帥至元二年車里以老疾不任事諸王阿只吉命步魯合蒼代領其軍至元八年制授管軍千戶佩金符宋將智萬壽攻成都僉省嚴忠範遣步魯合蒼將兵七百人禦之于沙坎流矢中右頰拔矢戰愈力大敗其軍十一年行院汪田哥以兵圍嘉定步魯合蒼卽率其衆攻九頂山破之嘉定降進攻重慶宋軍突圍出走銅鑼峽行院忽敦遣步魯合蒼追之至廣羊埧斬首二百級瀘州叛還軍討之步魯合蒼以所部兵攻寶子寨歲餘不下乃造雲梯先登急擊遂破之殺虜殆盡十六年取重慶以功遷武略將軍征行元帥二十一年命統蒙古探馬赤軍千人從征金齒蠻平之都元帥蒙古歹征羅必甸步魯合蒼率游兵先行江水暴溢衆泗水而渡去城三百步而營居七日諸軍會城下乃進攻之步魯合蒼先登拔其城遂屠之又從征八百媳婦國至車厘車厘者其酋長所居也諸王闊闊命步魯合蒼將游騎三百往招之降不聽進兵攻之都鎮撫侯正死焉步魯合蒼毀其北門木遂入其寨其地悉平賜金虎符授懷遠大將軍雲南萬戶府達魯花赤卒子忙古不花襲管軍千戶初按主奴三子長車里次黑子次帖木兒黑子別賜金符爲奧魯元帥兼文州吐蕃達魯花赤卒其子那懷幼以帖木兒攝其官那懷長解職授之

改授帖木兒隨路拔都萬戶後移鎮重慶卒

玉哇失

玉哇失阿速人父也烈拔都兒從其國主來歸太宗命充宿衛歲戊午從憲宗征蜀爲游兵前行至重慶戰數有功嘗出獵遇虎於隘下馬搏虎虎張吻欲噬之以手探虎口抉其舌拔所佩刀刺而殺之帝壯其勇賞黃金五十兩別立阿速一軍使領其衆從世祖征阿里不哥又從親王哈必失征李璫俱有功賜金符授本軍千戶從下襄陽又從下沿江諸城宋洪安撫旣降復叛誘其入城宴乘醉殺之長子也速歹兒代領其軍從攻揚州中流矢卒玉哇失襲父職爲阿速軍千戶從丞相伯顏平宋賜棗縣二千五十二戶只兒歹拔率所部兵擊之至懷魯哈都擒其將失刺察兒斬于軍其衆悉平諸王和林及失刺等叛從皇子北安王討之至斡耳罕河無舟躍馬涉流而渡俘獲甚衆時北安王方戰失利陷敵陣中玉哇失從諸王藥木忽兒追至金山王乃得脫歸賞白金五十兩鈔二千五百貫改賜金虎符進定遠大將軍前衛親軍都指揮使諸王乃顏拔世祖親征玉哇失爲前鋒乃顏遣哈丹領兵萬人來拒擊敗之追至不里古都伯塔哈之地乃顏兵號十萬玉哇失陷陣力戰又敗之追至失列門林遂擒乃顏帝嘉其功賜金帶只孫錢幣甚厚乃顏餘黨塔不歹金家奴聚兵滅捏該從大軍討平之旣而哈丹復叛於曲連江追擊其軍

渡河而遁又與海都將八憐帖里哥歹必里察等戰於亦必兒失必兒之地戰屢捷成宗時在潛邸帝以海都連年犯邊命出鎮金山玉哇失率所部在行從皇子闊闢出丞相朶兒朶懷擊海都軍突陣而入大破之復從諸王藥木忽兒丞相朶兒朶懷擊海都將八憐八憐敗海都復以禿苦馬領精兵三萬人直趨撒刺思河欲據險以襲我師玉哇失率善射者三百人守其隘注矢以射竟全軍而歸帝嘉之賜鈔萬五千緡金織段三十匹海都朶哇以兵來襲擊走之武宗鎮北邊海都復入寇至兀兒禿玉哇失敗之獲其駝馬器仗以獻時扎魯花赤孛羅帖木兒所將兵爲海都困於小谷帝命玉哇失援出之帝喜謂諸將曰今日大丈夫之事會玉哇失其誰能之縱以黃金包其身猶未足以厭朕志武宗南還命玉哇失後從敵懼莫敢近因留之戍邊賜以金察刺二玉束帶渾金段各一仍賜秫米七十石使爲酒以犒其軍後海都子察八兒等遣人詣闕請和朝廷許之遂撤邊備玉哇失乃還帝錄其功賜鈔五萬貫進鎮國上將軍仍舊職大德十年五月晝寢于衛舍不疾而卒子亦乞里歹襲亦乞里歹卒子拜住襲

麥里

麥里徹兀臺氏祖雪里堅那顏從太祖與王罕戰同飲班真河水以功授千戶領徹里臺部征討諸國卒于河西父麥吉襲職從太宗定中原以疾卒麥里襲職從定宗略定欽察阿速斡魯思諸國從憲宗伐宋

有功世祖卽位諸王霍忽叛掠河西諸城麥里以爲帝初卽位而王爲首亂此不可長與其弟桑忽荅兒率所部擊之一月八戰奪其所掠扎刺亦兒脫脫憐諸部民以還已而桑忽荅兒爲霍忽所殺帝聞而憐之遣使者以銀鈔羊馬迎致麥里賜號曰荅刺罕尋卒子禿忽魯

探馬赤

探馬赤禿立不帶人從諸王沒赤征蜀後以兵從塔海紺卜火魯赤紐璘諸大帥歲戊午紐璘攻涪州還至馬湖江宋兵連艦絕江不得進探馬赤率精兵二千擊之奪其舟以濟又於橫江嘉定宣化三縣造浮橋以達成都紐璘以爲能命將千人從萬戶昔力荅略地徇門黎雅土蕃昔力荅死行院帖赤以探馬赤爲萬戶領其軍中統四年授蒙古漢軍萬戶至元九年從行省也速帶兒征建都獨以銳卒千五百人與建都兵戰于梅子嶺大敗之夜馳與速哥會直擣其營斬首數十級生擒百餘人獲其輜重以歸復益兵三千人與左丞曲立吉思乘勝進擊建都勢感請降又從行院汪田哥忽敦等攻嘉定重慶瀘敘諸州以功兼崇慶府達魯花赤十九年卒子拜延襲蒙古軍萬戶戍甘州

拔都兒

拔都兒阿速氏世居上都宣興憲宗在潛邸與兄兀作兒不罕及馬塔兒沙帥衆來歸馬塔兒沙從憲宗

征奪各思城爲前鋒將身中二矢奮戰拔其城又從征蜀至釣魚山歿于軍拔都兒從征李璫圍濟南身二十餘戰世祖嘉其能賞納失思段九命領阿速軍一千常居左右尋於阿塔赤內充怯薛百戶後從塔不台南征與敵軍戰于金剛臺又以功受賞師還言於帝曰臣願從軍爲國效死世祖留之仍命充孛可孫兼領阿速軍御馬必令鞚引至元二十三年授廣威將軍後衛親軍副都指揮使賜虎符明年夏從征乃顏于亦迷河擒斃家奴塔不台以歸賞鈔及衣段加定遠大將軍大德元年卒子別吉連襲至大四年河東陝西鞏昌延安燕南河北遼陽河南山東諸翼衛探馬赤爭草地訟者二百餘起命往究之悉正其罪積官懷遠大將軍致和元年從丞相燕鐵木兒擒倒刺沙黨烏伯都刺等領諸衛軍守居庸關及諸要害地天祿元年十月王禪兵掩至羊頭山攻破隘口勢甚張別吉連從丞相擁衆奮擊之突入其軍王禪敗走文宗賜御衣二襲三珠虎符及弓矢甲冑金帛等物以旌其功尋以疾辭子也連的襲

昂吉兒

昂吉兒張掖人姓野蒲氏世爲西夏將家歲辛巳父甘卜率所部歸太祖以其軍隸蒙古軍籍仍以甘卜爲千戶主之從木華黎出征病卒昂吉兒領其父軍從征諸國有功至元六年授本軍千戶佩金符俄略地淮南所向無前時國兵初南塞馬當暑往往疥癘昂吉兒以所部馬入太行療之所病良已由是軍中

馬病者率以屬焉歲療馬以萬數宋輸糧金剛臺意將深入昂吉兒將兵馳往斷其輸道因上言河南邊郡與宋對境宋兵時爲邊患唐州東南皆大山信陽在蔡州南南直九里武陽平靖五水等關宋兵必經諸關以入信陽實其咽喉守禦莫急焉往年金亡朝廷得壽泗襄鄆而不留兵守卒使宋得之請城信陽以扼宋得旨令率河西軍一千三百人城之城成九年加明威將軍信陽軍萬戶佩虎符分木華黎及阿朮所將河西兵俾將之加懷遠大將軍丞相伯顏渡江留阿朮定淮南東道其西道則屬之昂吉兒駐兵和州宋淮西制置夏貴遣侯都統將兵四萬來攻有謀內應者悉誅之潛兵出千秋澗塞其歸路因出城奮擊大敗之獲人馬千計鎮巢軍降阿速軍戍之人不堪其橫都統洪福盡殺戍者以叛昂吉兒攻拔其城擒福及董統制譚正將遂攻廬州夏貴使人來言曰公毋吾攻爲也吾主降吾卽降矣宋亡貴舉所部納款昂吉兒入廬州民按堵無所犯遷鎮國上將軍淮西宣慰使宋丞相文天祥復起兵海道舒民張德興應之襲破興國德安諸郡還據司空山詔昂吉兒攻之一戰而定殺張德興執其二子以獻江左初平官制草劾權臣阿合馬納賂鬻爵江南官僚冗濫爲甚郡守而下佩金符者多至三四人由行省官舉薦起授宣慰使者甚衆民不堪命昂吉兒入朝具爲帝言之且枚舉不循資歷而驟陞者數人帝驚曰有是哉因謂姚樞等曰此卿輩所知而不爲朕言昂吉兒顧言之邪卽命偕平章哈伯左丞崔斌翰林承旨和

魯火孫符寶奉御董文忠滅狄之選曹以清仍詔諭江淮軍民俾通知之時兩淮兵革之餘荆榛蔽野昂吉兒請立屯田以給軍餉帝從之既而阿塔海言屯田用人牛農具甚衆今方有事日本若復調發民兵將不勝動搖矣議遂寢未幾宣慰使燕楠復以爲言帝乃遣數千人卽芍陂洪澤試之果如昂吉兒所言乃以二萬兵屯之歲得米數十萬斛加輔國上將軍河南行省參知政事淮西宣慰使都元帥進驛騎衛上將軍行中書省左丞加龍虎衛上將軍行尙書省右丞兩官皆兼淮西使帥日本不庭帝命阿塔海等領卒十萬征之昂吉兒上疏其略曰臣聞兵以氣爲主而上下同欲者勝比者連事外夷三軍屢劄不一以言氣海內騷然一遇調發上下愁怨非所謂同欲也請罷兵息民不從既而師果無功昂吉兒屢爲直言雖帝怒甚其辭不少屈臺臣慮昂吉兒難制以牙以迷失不畏強禦奏爲本道按察使以察之牙以迷失時搃搃昂吉兒細故以聞及廷辨帝察其無他輒遷其官後竟以微過罪之元貞元年卒子五人其顯者曰昂阿禿廬州蒙古漢軍萬戶府達魯花赤曰暗普海北海南道肅政廉訪使孫教化的世襲千戶

哈刺解

哈刺解哈魯氏初從軍攻襄樊蒙古四萬戶府辟爲水軍鎮撫至元十二年從丞相伯顏渡江改管軍百戶賞甲冑銀鞘刀十二年秋從丞相阿朮與宋兵戰焦山敗之獲海舟二阿朮與王世強招討造白鶴海

船百艘就四十一萬戶翼摘遣漢軍三千五百新附軍一千五百俾哈刺鯁王世強并統之攻宋江陰許浦金山上海崇明金浦皆下之獲海船三百餘艘遂戍澈浦海口十三年春行省檄充沿海招討副使宋將張世傑舟師至慶元胸山東門海界哈刺鯁追之獲船四艘上其功行省增撥軍七百并舊所領士卒守定海港口秋七月宋昌國州胸山秀山戍兵舟師千餘艘攻奪定海港口哈刺鯁迎擊虜其裨將并海船三艘八月宋兵復攻定海港口哈刺鯁擊退之行省檄充蒙古漢軍招討使十月哈刺鯁引兵至温州青嶼門遇宋兵奪船五艘遣使諭温州守臣家之柄以城降十一月至福州奪宋海船二十艘擒毛監丞等十四年賜金符宣武將軍沿海招討副使行省檄充沿海經略副使俾與劉萬戶行元帥府事於慶元鎮守沿海上下南至福建北趾許浦六月行省檄充沿海經略使兼左副都元帥督造海船千艘八月有旨江西省右丞塔出等進兵攻廣南哈刺鯁以兵從十月進昭勇大將軍沿海招討使時宋處州兵復温州哈刺鯁率兵復取之進至潮陽縣宋都統陳懿等兄弟五人以奮兵七千人降塔出兵攻廣州踰月下哈刺鯁引兵繼至諭宋安撫張鎮孫侍郎譚應斗以城降從攻張世傑于大洋獲其軍資器械不可勝計諭南恩州宋閩門宣贊舍人梁國傑以奮軍萬人降十五年還軍慶元秋八月入覲帝問曰汝何氏族對曰臣哈魯人賜金織文衣鞍勒擢昭武大將軍沿海左副都元帥慶元路總管府達魯花赤將所部軍

戊海口十六年日本商船四艘篙師二十餘人至慶元港口哈刺解讞知其無他言于行省與交易而遣之海賊賀文達顧潤等寇掠海島哈刺解讞降之得舟六十餘艘十八年擢輔國上將軍都元帥從國兵征日本值颶風舟回明年二月還戊慶元二十二年罷都元帥改沿海上萬戶府達魯花赤二十四年入朝帝問日本事宜哈刺解讞對甚悉令還戊海道授浙東宣慰使賜金織文段玉束帶鞍勒弓矢有差二十五年樞密以水軍乏帥奏兼前職冬徵入見明年拜金吾衛上將軍中書左丞行浙東道宣慰使領軍職如故大德五年徵入見擢資德大夫雲南行省右丞偕劉深征八百媳婦國至順元年宋龍濟等叛夷師而還深誅哈刺解亦以罪廢十一年以疾卒于汝州皇慶元年贈榮祿大夫平章政事寧國公諡武惠子哈刺不花襲沿海萬戶府達魯花赤

沙全

沙全哈刺魯氏父沙的世居沙漠從太祖平金戊河南柳泉家爲全初名杪兒赤甫五歲爲宋軍所虜年十八留劉整幕下宋人以其父名沙的使以沙爲姓而名曰全全久居宋險固備知之中統二年整以瀘州來歸全與之同行宋軍追之全力戰得脫授管軍百戶至元三年整出兵雲頂山與宋將賈貴兵遇全擊殺甚衆五年命整領都元帥事出師圍襄樊以全爲鎮撫整遣全率軍攻仙人山陳家洞諸寨破之陞

千戶賜銀符敗宋將張貴拔樊城與劉整軍會修正陽城引兵渡淮與宋將陳安撫戰敗之十二年從丞相阿朮與宋將張世傑孫虎臣大戰于焦山水陸並進宋人不能支盡棄鼓旗走獲其將士三十三人從攻常州克之乘勝下沿海諸城至華亭戒士卒毋殺掠遂傾城出降以功授華亭軍民達魯花赤時民心未定有未附鹽徒聚眾萬掠華亭全擊破之籍其名得六千人請于行省遣屯田于淮之芍陂行省以邑人新附時有反側委萬戶忽都忽等體察欲屠其城全言鹽卒多非其土人若屠之枉死者眾以死保其不叛遂止賜金符加武略將軍兼領鹽場職如舊尋陞華亭爲府以全爲達魯花赤賜虎符時盜賊蠶起其最盛者有眾數千人全悉招來之境內得安改松江萬戶府達魯花赤始專領軍政二十二年召見遷隆興萬戶府達魯花赤得請復舊名曰杪兒赤未幾帝以爲松江瀕海重地復命鎮之賜三珠虎符于官

帖木兒不花

帖木兒不花蒼蒼里帶人父帖赤歲乙未同都元帥塔海紺下將兵入蜀并將蒙古也可明安和少馬賴及砲手諸軍攻下興元利劍成都諸郡所降宋將小王太尉之眾悉隸麾下中統二年賜虎符授西川便宜都元帥俄進行樞密院率諸軍略定西川未下郡邑至元元年遷益都等路統軍使死軍中帖木兒不

花中統初入備宿衛至元七年授虎符代張馬哥爲淄萊水軍萬戶將其衆赴襄陽與宋將范文虎戰于
灌子灘手殺四十餘人奪其戰艦追至雲勝洲大敗之行省上其功賜白金五十兩衣一襲鞍轡一副九
年授益都新軍萬戶十二年改益都淄萊新軍萬戶從丞相伯顏伐宋敗其大將夏貴於陽羅堡大軍渡
江論其功最多賜白金五百兩又從下鄂斲黃江建康常秀蘇杭諸郡累加昭武大將軍從參知政事阿
剌罕略定紹興溫台福建諸郡授台州路總管府達魯花赤遷廣東宣慰使十六年加都元帥追宋將張
世傑於香山島世傑死降其衆數千人廣東諸郡及海島盡平領諸降臣及將校之有功者入見於太安
閣命太府監視其身製銀鼠裘成親賜予之授中書左丞行省江西其餘爵賞有差二十五年拜四川等
處行尚書省平章政事兼總軍務改行中書省平章政事其兄帖木脫斡初以蒙古軍千戶從伐蜀有功
行樞密院承制授萬戶并將列別朮塔海帖木兒也速帶兒匣刺撒兒四千戶軍從大軍攻重慶重慶降
收其衆徇下流諸城留鎮夔門兼本路安撫司達魯花赤進懷遠大將軍蒙古軍萬戶遷定遠大將軍兼
嘉定守鎮萬戶本路總管府達魯花赤尋陞鎮國上將軍諸蠻夷部宣慰使加都元帥亦奚不薛蠻畔與
岳刺海會雲南兵討平之改征緬都元帥死于軍子忽都答兒嗣

元史卷一百三十二考證

杭忽思傳○

臣祖庚

按後阿塔赤傳作昂和思又阿塔赤事實已備載是傳而一百三十五卷又復立傳

顯屬重出